

ASO LULU, 18 MATI 2020

Na nofoia e le Fofoga Fetalai le Nofoa i le itula e 9:10 i le taeao.

Tatalo.

FOFOGA FETALAI: Ou te faasilasila atu ua toe amatalia nei Galuega ma Taualumaga a le Fono Aoao Faitulafono.

TULAFONO TAU FAAOFI O TEUTEUGA O LE FAAVAE 2020
– faitauga faalua

FOFOGA FETALAI: E tolopo Galuega i le aso Fono ananafi ua maea ona saunoa le sui usufono mo Gagaemauga Nu.3. Ua i ai le manatu e le o toe toatele ni sui usufono e fia saunoa i lenei mataupu, ona e i ai le faamoemoe e tuuina atu le tatou Tulafono Tau Faaofi lenei i le Komiti ma maua ai avanoa o le paia o le Palemene faatasi foi ma le atunuu e latou te faaalia i ai o latou finagalo. Ia, e matau atu e i ai se isi sui usufono e fia saunoa? Ia masalo toe o tamaitai o le Maota se i vaeatu a outou Afioga ma sui usufono e toatolu o lo o tulai mai ona toalima lea. A tai lua lava minute o le sui usufono ua manaia.

Ia, tulai maia le Afioga i le Taitaifono o le Komiti o Tupe.

Afioga ALIIMALEMANU ALOFA TUUAU (Alataua Sisifo): Faafetai lava mo le avanoa. E faatalofa atu i lau Afioga i le Fofoga Fetalai i lenei taeao matagofie. A o le i faia se tala, ou te ta malamala lava se upu i lenei ituaso leaga e faigata o lea ua afifio le paia ma le mamalu o le Palemene, le paia maualuga lea o sui usufono o itumalo taitasi, faapea foi ona faatasi mai Ofisa Sili o Pulega o Matagaluega ma Faalapotopotoga faapea auaunaga eseese, ae se i taumafai atu se manatu o le Alataua Sisifo i le teuteuga o le Faavae. E puupuu lava.

E muamua ona faafetai i le teuteuga o le Faavae e ala i le Tulafono Tau Faaofi ina ia sili atu ona amanaia Samoa, i totonu lava o la latou lava Faavae faa-Samoa ma ia faaaoga aloaia i totonu o le tatou Faavae ma Tulafono le aano moni o le agaga o tatou aganuu, ia faapea tu ma aga ua tatou masani ai.

18 MATI 2020

Tulafono Tau Faaofi o Teuteuga o le Faavae 2020
– faitauga faalua

O le taua la i lenei itumalo o teuteuga ona e talitonu Alataua Sisifo, e sili ona tele le tau pe a le foia faafitauli nai lo le tau o teuteuga o suiga lea ua tuuina mai i le Palemene o le Faavae. I le fausiaina o le Faavae, sa ou faitau ai i faamaumauga e faasino i Faamasinoga i le tau tapenaina o lenei Faavae. Ma i lona aotelega o lo o i ai faaupuga e faapea, “O lenei vaega o Faamasinoga o le a tagofia ai na o mataupu tau Tulafono o solitulafono ma mataupu tau le va o tagata i totonu o Samoa.” Ona toe faapea mai lea, “E i ai foi vaega faapitoa e ese ai o lo o faasino i le Faamasinoga o Fanua ma Suafa.” Atonu e le o aofia uma ia mataupu e aofia i le faafoeina o le faamasinoga o le amiontonu. O ni faaiuga tau i ia itu, e manaomia ai ni aiaiga faaletulafono i se taimi mulimuli ane e faia e le Palemene. Ou te talitonu o le taimi tonu lenei ma le Paeaiga lenei lea sa faatali i ai tamalii o le atunuua ua lagomau mai tiasa latou te faamaeaina lea vaega o le Faavae e faasino i le Faamasinoga o Fanua ma Suafa. Faafetai le lototetele e faatino ia teuteuga i le Faavae.

O le a le toe afea le tele o manatu lelei sa folasia e sui usufono o itumalo taitasi i le aso ananafi. Na pau lau Afioga i le Fofoga Fetalai o nai manatu e agai i le mataupu e uiga i le Faamasinoga o Talosaga ma Iloiloga o Fanua ma Suafa lea o lo o faapea mai, faamasino e taitaia e se Faamasino Samoa ua malolo litaea o le Faamasinoga Sili pe le tatau ona tuu loa i ai e i lalo ifo o le 75 tausaga le matua ina ia tutusa ma le Faamasino o Talosaga a le Faamasinoga Sili, ia tutusa ma le Supreme Court.

O lea e matau atu e toatolu Faamasino Samoa o le Faamasinoga Sili lea o lo o auai ai i sui o le Faamasinoga lea Toe Iloilo. I so matou lava vaivaiga, pe le talafeagai ona tuu pea i ai Faamasino o le Faamasinoga Samoa, le Faamasinoga o Fanua ma Suafa, a ua lava le tasi lea e i ai lea e fai ia ma Taitaifono, le Faamasino Samoa lea ua litaea e faia iloiloga, ua lava le Taitaifono e aumai mai le Faamasinoga Sili. Ona e pei e foliga mai e pei ona fai atu i so matou lava vaivaiga, pei a oo loa i appeals ua aumai Faamasino o le Supreme Court e iloilo talosaga mo iloiloga. E manaia ae faataua pea a tatou Faamasino o Faamasinoga o Fanua ma Suafa. Na o nai manatu e faatupu manatu aua le faaleleia o le tatou vaa e fautele.

O si atugaluga lava o si o matou itumalo lau Afioga i le Fofoga Fetalai, ia aua ne i faaaogaina Loia e finauina mataupu tau Samoa po o totonu o le Land and Titles Court, ona o le popolega, e le gata i le taugata, ae faapea foi le puipui i measina a aiga ma nuu.

18 MATI 2020

Tulafono Tau Faaofi o Teuteuga o le Faavae 2020
– faitauga faalua

Lau Afioga i le Fofoga Fetalai, o nai motugaafa na a lenei itumalo, a o le aotelega, o le agaga o le faafetai i le Tulafono Tau Faaofi mo le teuteuga o le Faavae. Ia manuia le Fonousu a Samoa, manuia Samoa o faafogfa tapuai mai. Faafetai.

FOFOGA FETALAI: Malo faafetai saunoa, ua malie taliga e faalogo. Tulai mai le sui usufono mo Gagaifomauga Nu.3.

Afioga FAAULUSAU ROSA DUFFY STOWERS (Gagaifomauga Nu.3): Faafetai lava i lau Afioga i le Fofoga Fetalai mo le avanoa. E faatalofa atu foi i lau Afioga faapea le Palemia ma le mamalu o le Maota, Samoa ua potopoto faapea foi Samoa o lo o faafogfa mai.

Ia, e tulai atu foi ma le agaga faaaloalo tele i sina manatu foi aua le Tulafono Tau Faaofi e pei ona opea i le Maota. A teuteu le Faavae, e talitonu lava o la e tofu silafia uma lava e sui usufono mamalu. A teuteu se Faavae o se atunu, e taua mai ai i i e le o moemoenoa le Faigamalo o lo o tulai mai, e silasila i vaega eseese uma e tapue ma poupou ai le sa o lo o folau ai. Ma o le faafetai lena, malo lava faafetai le tofa fetalai i le faatauaina o le tatou aganuu ina ia faapena ona galulue faatasi le tuulau ma le lavelau ia ogatasi ai le futia ma le umele i le faatauaina o le tatou aganuu i totonu o le tatou Faigamalo. Malo lava le fai o le faiva. O au foi lea e tulai atu, ou te talitonu na sui ai le Faavae o le tatou Malo i lou ofi mai lea i totonu o le tulaga o le faatauaina o tina ma tamaitai. Ma o le tatalo foi lena a lou sui usufono i lenei itula, ua maua atu ua siitia ai le fuainumera o le Kapaneta, o lo o i ai foi le Tulafono e siitia ai sui usufono mamalu o le Maota lenei. O a fa i ina i lau Afioga i le Palemia ma le paia o le Maota lenei, e a, e le ono siitia ai foi la ma le fuainumera o tina ma tamaitai i le 15%, mai le 10% i le 15% ona paleni lelei a lea. A le o lena foi, ia faapena foi ona faamautuina ai ma se nofoa o le tamaitai i totonu o le saofaiga a le Kapaneta, ona seki lelei lava lea o le tatou teuteuga. Ma lou faaaloalo.

FOFOGA FETALAI: Malie le sui usufono se i tulai mai le Palemia.

18 MATI 2020

Tulafono Tau Faaofi o Teuteuga o le Faavae 2020
– faitauga faalua

Susuga Hon Tuilaepa Auelua Fatialofa Luplesoliai Lolofietele Neioti Aiono Galumalemana Dr. Sailele Malielegaoi: Lau Afioga i le Fofoga Fetalai, e ala ona faapasene le tulaga lea, ona e i ai mafuaaga. Sa fesiligia au e le savali mai le Malo Aufaatasi, po o le a le mea ua le faapasene ai i le taimi ae le i faia le teuteuga lea, le tulaga o le aofai o tina e tatau ona i totonu o le Palemene. Ia o lau tali i ai, ailoga o outou manatumatu ma outou malamalama i le Faavae o Samoa? E leai se pasene o i ai. O le uiga o lena upu, o lea e faatafagaloa. Fai mai lea, o le a le uiga o lau faamatalaga? O le uiga o lau faamatalaga, e mafai ona tatala ai le avanoa ia 100% tamaitai e omai i totonu o le Maota. A o le mea lea e fai mai ai outou o le faapasene o tamaitai e taomia ai le aofai o tina ae atili toatele ai toeaiina i totonu o le Maota. A o le a fai le mea lena tou te fai mai ai. A o le tulaga o lo o outou talanoa mai ai, e atagia mai ai le tou le malamalama i le tele o le tofa na fau ai le Faavae. O le mea la lea e fai i i, na pau lava le mea, o sina pasene ina ia aua ne i pau i lalo ifo o le 5 Tamaitai Faipule a o le agai i luga, e leai se pasene. O lona uiga, e mafai ona 100% tamaitai e omai i totonu o le Maota. Vaai la i ai i le taua o le mea lena. Afai la i le Tulafono lea e faapasene ai, afai e alu atu le tatou Faiga Palota e sili atu i le toalima tina mai le Maota lenei, ona le aoga lea o le teuteuga lea e faataatia ese e matua le aoga lava lau Afioga i le Fofoga Fetalai. O le agaga lena o le teuteuga lea na fai, afai e sili atu tamaitai i le toalima, faaleaoga loa le teuteuga lea na fai. O lona uiga o le agaga ia oo i luga i le 100% tina.

O le mea la lea ou te faamalamalama atu ai, o la outou tina e fai le tou talaiga ia tina uma le Maota lenei aua e leai se tapulaa o i ai. Afai la o e malamalama i le mea lena, ona e silafia ai lea ua matua 500% le mea lea o lo o i ai nei, na o le tapulaa maualalo ae leai se tapulaa alu i luga. O lona uiga, fai le tou galuega ia faatosina ai tina e avea ma faipule.

FOFOGA FETALAI: Malo faafetai. Ua manino auofala i lea vaega. Tulai mai le sui usufono.

Afioga FAAULUSAU ROSA DUFFY STOWERS: Lau Afioga i le Fofoga Fetalai, se malo lava i le Palemia mo le faamalamalamaina o le vaega lea. Afai lava la e omai uma le faiga palota e uma ifoga na o le itupa o outou lea e ofi mai i totonu i i, ona faapefea lea? E 100% a e aumai i totonu?

18 MATI 2020

Tulafono Tau Faaofi o Teuteuga o le Faavae 2020
– faitauga faalua

Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoi: Lau Afioga i le Fofoga Fetalai, ia o lea foi ua toe aliali mai le le atoatoa o le malamalama o le sui usufono. O le mea lena ou te fai atu ai, aua e te talanoa i le Faavae pe a le atoatoa lau tapenaga. Na o le pau lava le mea lea e i ai, o le tapulaa maualalo ia aua ne i pau ifo i lalo ifo o le 5 faipule tina, a ia 5 agai i luga i le 100%. E 5 faipule ia aua ne i lalo ifo o le 5 lena. A o le alu atu la lea i luga, pe atoa uma lava le Maota lenei ia outou tina, ona o uma lava lea o matou o tama e tautua mai outou i tua.

FOFOGA FETALAI: Na ona faamanatu atu foi i le sui usufono mamalu, masalo na o Samoa lava i le Pasefika o lea ua i ai nofoa mo sui usufono tamaitai. Na ona faamanatu atu, ae a e gafatia lava le 100% matou tapuai uma ae omai outou e faapena, pei ona saunoa le Palemia.

Afioga FAAULUSAU ROSA DUFFY STOWERS: Faafetai lava, o lea ua maua atu, e alu agai i luga. Ioe, a o le minimum lea e 10%. O le talosaga lea e avatu i le Afioga i le Palemia, ia siitia le minimum agai i luga i le 15% a o lea ua maua lelei atu lava lou finagalo.

Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoi: Ioe, o lea ou te malamalama. A o le lui lea ou te avatua, pe sii i luga i le 50% ae a le faia le galuega a outou itupa o tina e fesoasoani i ai, e le mafai lava ona oo i luga i lena numera.

FOFOGA FETALAI: Ia, see ese loa mai lea tulaga. O la e tatala le avanoa ae...

Afioga FAAULUSAU ROSA DUFFY STOWERS: O lea o le a faauma atu. Ae ou te le i nofo la i lalo, e faailoa atu pea i le mamalu o le Maota lea ma le faafogfa a Samoa, o le tele ia o le sao o tina lea e i ai i totonu o Samoa i le taimi lenei, e le fesiliglia le sao o tina lea e i ai i le Faigamalo lenei. Ma o le agaga lena o lea na tuitui atu ai.

18 MATI 2020

Tulafono Tau Faaofi o Teuteuga o le Faavae 2020
– faitauga faalua

Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoi: Lau Afioga i le Fofoga Fetalai, e leai foi se isi o fesiligia le sao, e leai ma se isi o fesiligia le sao.

Afioga FAAULUSAU ROSA DUFFY STOWERS: Lau Afioga i le Palemia, ua uma, lea o le a ou nofo i lalo.Na pau lava le eseesega.

Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoi:O le mea lea e i ai nei, o le tele o tou fono lea e fai pei e foliga mai e le o faatauaina e tama le tou sao. Oi a le faatauaina e pule tina i tama? O e malamalamā i ai i le mea lena? O au ia, e matua pule lava si au loomatua ia au. O le faalavelave lea ou te talanoa atu ia oe, o i ai sou alii pe leai?

Afioga FAAULUSAU ROSA DUFFY STOWERS: Ua ala ona ou toe tulai lau Afioga i le Fofoga Fetalai, ou te fia tali atu i le fesili mulimuli lea a le Afioga i le Palemia. O le mafuaaga la lena e faapena ai au faamatatalaga, ona o lea e tau saili lava se isi e ma te toalua i le taimi lenei. Ma le agaga faaaloalo, ia manuia le Fono.

FOFOGA FETALAI: Aua ne i galo i le sui usufono mamalu, o le tele o le saofaiga lea e i totonu o le Palemene, o la e sauaina e tina. E i ai se mea Namulaunu?

Tofa Namulaunu Leota Sami Leota (Faasaleleaga Nu.2): Oi, faapea lava o lea ua e tofi mai au e faatea atu le matou itu, ma lou faaaloalo lau Afioga.

FOFOGA FETALAI: Oi, a o lea e le o maua lou suafa i i i sui usufono... E le o maua foi ma le sui usufono lea o le Vaimauga.

Tofa Namulaunu Leota Sami Leota: E vave lava lau Afioga ma le faaaaloalo lava.

18 MATI 2020

Tulafono Tau Faaofi o Teuteuga o le Faavae 2020
– faitauga faalua

FOFOGA FETALAI: Se i tulai mai Namulaauulu. Se i faapuupuu mai. Leaga ua tatau ona tatou see i isi a tatou Tulafono, ua tagatasi lava saunoaga a sui usufono. Vagana la le sui usufono lea faatoa uma atu nei o le sui usufono mo Gagaifomauga Nu.3 o lea e pei e ese ai lana mataupu o le mataupu tau tina, o lea la ua uma ona faamalamalama, ae saunoa mai.

Tofa NAMULAUULU LEOTA SAMI LEOTA: Faafetai lau Afioga i le Fofoga Fetalai ua maua se avanoa o lenei itumalo. E faatalofa atu foi i le mamalu o le Maota, Taitai o le Maota aemaise foi le vasega o le Kapeneta, Minisita Lagolago aemaise foi pou faifaia o le Palemene o Samoa i lenei taeao matagofie.

O le suiga o le Faavae ua taatia mai, o le masina na tea atu nei sa ma agai atu ai ma se tasi o sui usufono o le Maota i se fonotaga foi sa faia i Ausetalia, sa auai uma lava le toatele o nisi o sui usufono mai le Pasefika. O le mea moni, o le tatou Palemene e ese lota mimita ai i le tulaga lea e matua faaamuia lava i latou ia tatou, ona o vaega la faapenei, o le mafai ona tatou talanoa ma fefaasoaii ma lauiliu le tofa ma le faautautaga mamao lea e mafai ai ona faia suiga ia. O le mea moni o le suiga ua taatia mai i luma o le Fono Faitulafono e le o se vaega itiiti, e taua tele lea i le tele o le mamalu o le atunu. Masalo e tasi lea vaega sa fautua mai ai lou itumalo i le tulaga lea e i ai suiga ia o le Faavae, aemaise lava le tulaga lea i le amanaia o le pulega a nuu ma faipule, faatasi ai ma le aiatatau a le tagata e toatasi. E tasi lava le tuualalo e tuuina atu i se vaivaiga foi o lenei itumalo e pei ona sauia i se tasi o saunoaga i le aso ananafi i le tulaga lea ia consistent, le tulaga o le a taatia mai ai le Faavae aemaise foi ma nisi o Tulafono pei ona faataatia mai. Ia sau se taimi o lo o foli mai le Tulafono lea o Faiga Palota ia o lo o i ai foi se tulaga faapena ona e tele ni luitau o lo o tulai mai ai aemaise lava le tulaga lea o le tasi o le finagalo o alii ma faipule i se sui ae osofaia e se tasi o sui ona o lana aiatatau.

E momoli atu ai le faamalo i lau Afioga i le Palemia aemaise foi o i latou sa tapenaina lenei Tulafono Tau Faaofi, e lagolagoina malosi e le matou itumalo.

O le isi vaega taua, o suiga o le Faavae o lo o tulai mai o lo o atagia ai le anavatau a le tatou Malo o lo o faapea ona tauaveina, le tulaga lea o le faiga pulega lelei po o le good governance ma le tulaga foi lea ia manino, le transparency ma le accountability, o le faiga tonu manino ma mafai ona tali atu, o lo o faapea ona afifi mai ai i suiga ia o le Faavae.

18 MATI 2020

Tulafono Tau Faaofi o Teuteuga o le Faavae 2020
– faitauga faalua

O se isi lea o vaega e matua lagolagoina ai e lou nei sui usufono ma le matou itumalo le suiga ua tuuina mai e le Faavae. O le Matagaluega lea o Faamsinoga, faafetai o lea ua toe ae le tofa ma le faautautaga e agai i ai le suiga lea. E tasi lenei o Matagaluega e pele i lou nei loto, ona o le Matagaluega lenei sa amata ai le olaga tautua.

FOFOGA FETALAI: Toe lua minute o le sui usufono.

Tofa NAMULAUULU LEOTA SAMI LEOTA: O le taimi foi o Pule Sili le Afioga ia Fonotoe ua tatou faatasi ai i le Maota nei. O le vaega lea e tau aau atu, ona o lea faafetai e i ai le vaega sa tuuina mai i le taimi sa fai ai reform e faapea, ia o lava Faamasino e focus i Faamsinoga, ae tuuina mai le faatautaia o galuega a le Faamsinoga i administrators. O le tulaga lena ua tuuina atu ai foi i le afioga i le Minisita se i tagatagai ane i le vaega lea. Ae lagolagoina e le matou itumalo le vaega o le suiga o le Faavae o lo o i ai.

O le vaega lona lua o le tulaga o i ai Minisita, e lagolagoina. O upu masani a le atunu, e le faatuaoia mea lelei, o le tele o lima e mama ai se avega. E faaiu atu ai le faamatalaga a lenei itumalo, e momoli atu le faafetai tele i le Afioga i le Palemia ona e pei lava e le o amanaia le tulaga lea i ana polokalame o lo o faifaipea i vaiaso taitasi, o le Taimi ma le Palemia, ia ma le Palemia ma le 2AP. O le tele ia o le aoga o polokalame ia e faalauiloa atu ai galuega fai a le Malo i tua i nuu i tua. Na pau lava le fautuaga a lou sui usufono i le matou itumalo, faalogologo i polokalame lea ona outou malamalamama ai lea i mea o lo o agai i ai galuega a le Malo. O le faataitaiga; o le taimi lea sa tulai mai ai le faamai lea o le corona, sa avatu ai upu nei; epidemic ma le pandemic. Na faamalamalama e le Afioga i le Palemia, o le andemic o le etemi, pandemic o le petemi. Ia e faanunumi lava mafaufau o toeaiina, o le ekemi ua na o se atunu. O le petemi po o le patemi, o lona uiga ua tele le afaina. E faanunumi lava le vaavaai a toeaiina, fai mai loa ma le Palemia, o lona uiga ua kokemia mea uma. O lona uiga ua faaletonu, ua tele le faaletonu. A o le manaia ia o le saunoaga a le Palemia lea na laualalo atu ai le tulaga lea, ia aua ne i popole vale le atunu, aua le atuatuvalo.

FOFOGA FETALAI: Ia se i tulai mai le sui usufono mo Gagaifomauga Nu.3.

18 MATI 2020

Tulafono Tau Faaofi o Teuteuga o le Faavae 2020
– faitauga faalua

Susuga Hon Laauli Polataivao Leuatea (Gagaifomauga Nu.3): Lau Afioga i le Fofoga Fetalai, ioe, malie lau Afioga i le Fofoga Fetalai, e leai lava se agaga e faalavelave i le lauga a le sui usufono mamalu, ae taliu lava ae popoe. Vaai le gagana, lau Afioga, aveese upu ia, ua lava ia aso na tatou le mafaufau ai i le Palemene.

Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoi: Lau Afioga i le Fofoga Fetalai...

Susuga Hon Laauli Polataivao Leuatea: Faafoi upu ia lau Afioga i le Fofoga Fetalai. O lau tatalo lena, o la e faafofoga le atunuu, e le mafaufau upu. Lau Afioga o lau tatalo lena.

FOFOGA FETALAI: Ia, se i onosai mai le sui usufono se i tulai mai le Palemia.

Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoi: Lau Afioga i le Fofoga Fetalai, o le mea tonu lava lea o lea e agai i ai le Faavae o le tu ma tatou aganuu. E le mafai ona tatou malamalama pe a faaaoga pea upu faa-Peretania ia, upu mai fafo, ae tatau ona tatou taumafai i se gagana e faafaigofie ai, i se upu e faafaigofie ai. Ma o le mea lea o le pandemic lena e faa-Samoa atu o le patemi, andemic, o le etemi po o le enitemi. A tatou talanoa loa i le andemic po o le enitemi po o le etemi po o le upu faafaigofie, o le faamai e aofia uma ai tagata o le atunuu. Ae a tatou talanoa loa i le pandemic po o le patemi, tatou talanoa i le lalolagi atoa ua aafia le lalolagi atoa. E le o ni upu laulauvavale na upu, se i vagana ua le malamalama le sui usufono. O lena e sao lelei, o lea e taumafai tatou...

Susuga Hon Laauli Polataivao Leuatea: Lau Afioga i le Fofoga Fetalai...

FOFOGA FETALAI: Malo. Malie le sui usufono o lea se i...

18 MATI 2020

Tulafono Tau Faaofi o Teuteuga o le Faavae 2020
– faitauga faalua

Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoi: O lea e taumafai tatou i se gagana faafaigofie, gagana faigofie. O le mea lena o lea e taumafai i ai tatou o le gagana faigofie, ae le o le aumai o le fiapoto o le tagata i inei ma le gagana i le aganuu ae le malamalama.

Susuga Hon Laauli Polataivao Leuatea: Ou te tulai atu lau Afioga ina ia manino lava si au taumafai atu...

FOFOGA FETALAI: Se i onosai mai lava le sui usufono mo Gagaifomauga Nu.3 se i fai atu le fautuaga. Malo faafetai. Ia e tofu lava le tagata ma lana faauigaina. Ae silasila foi Namulauulu, se o le mea lava lea na ota fai atu ai e faamuta maia. Ia o le a e toe susue foi.

Tofa Namulauulu Leota Sami Leota: Faafetai, o lea o le a faauma atu lau Afioga.

Susuga Hon Laauli Polataivao Leuatea: Lau Afioga i le Fofoga Fetalai, ina ia manino le mea lea ou te taumafai atu ai. E le o le upu lea na ttau a e le sui usufono. O le isi upu lea o le palauvale faapapalagi. Lau Afioga o le agaga lena, e tatau ona tatou le toe gagana ma fai upu ia i le Maota. Malie lau Afioga, o le agaga lena o lea ou te tulai atu ai, afai o ni folasaga ia e fai e le Palemia i fafo, faitalia ia ma le lalolagi ma le tapuaiga a le atunu, a o le Maota, lau Afioga i le Fofoga Fetalai, e malu i lalo o le gagana a le atunu.

FOFOGA FETALAI: Malo. O lea ua ou maua atu...

Susuga Hon Laauli Polataivao Leuatea: O lea foi e te maua au upu e fai atu soo, le gagana, le gagana a le atunu o lea e faafofoga.

FOFOGA FETALAI: Ia, se i onosai mai.

Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoi: Lau Afioga i le Fofoga Fetalai, o le mea lea tatou te taumafai i ai, o le a le aoga o le tele o mataupu ia e avatu, ia malamalama gofie, malamalama gofie, aemaise pe a oo i le tulaga o gasegase e feoti ai tagata.

18 MATI 2020

Tulafono Tau Faaofi o Teuteuga o le Faavae 2020
– faitauga faalua

A tatou talanoa loa i i faamai e oti ai tagata, tuusao upu, ae le o le aumai o le fia mapo gagana, lau Afioga o le tulaga taua lena. O le ala lea ua tele ina le malamalama tagata, e oo foi i fomai, tau sao upu. A o le gagana lea a oo loa ina talanoa fomai, o le matua faigata lava ona malamalama.

Lau Afioga o le fesoasoani atu lena, tatou faaaaoga gagana e faafaihofie i le tatou atunu, lea foi e oo i totolu o Faamasinoga. O le fautuaga foi lena e ave i le Faamasinoga, soia tou te toe faapalagia ni faamasinoga, faamasinoga lea solitulafono, faa-Samoa ina ia faigofie i le tatou atunu ona malamalama. O le mea taua lau Afioga, ia malamalama.

FOFOGA FETALAI: Faafetai. Se i malie le sui usufono, malie le sui usufono.

Susuga Hon Laauli Polataivao Leuatea: Lau Afioga ma le agaga faaaloalo, e ese lava le gagana ese le le mafaufau, o le mea lena ua fai, tuulafoai upu. Ua ova le le mafaufau soo.

FOFOGA FETALAI: Malie le sui usufono o lea ua ou tapa lou finagalo, ua ou tapa lou suafa. Ioe. O lea e faamalamalama e le Palemia le uiga o le upu mo le faamai, ioe, ona ua iloga le ogaoga o le sau a le faamai i le soifua ma le ola o le tatou atunu. A o le upu lea e te toatamai ai, o le upu a le sui usufono mo Faasaleleaga Nu.2, e le o se upu a le Palemia. Ioe. O le ala la lea ou te fautuaina ai foi sui usufono mamalu, se i lavapapale mai i se fautuaga a le Nofoa, aua tou te le amanaia loa le fautuaga a le Nofoa, sopotuaoi loa le gagana aemaise o le taimi, ona tau loa lea o le pua e ula ma faapena ona tiga ai le sui usufono.

Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoi: Lau Afioga i le Fofoga Fetatalai, pau lava lea o si mea, se o le mea lea e leaga ai tagata e fou mai i le Maota lenei. O le taimi na ou sau ai i inei, o i i le Tama a Aiga. A outou faitau i upu na sa saunoa ai le Tama a Aiga, e matua maoae, e sili atu ona mataga i le faafogafoga mai a Samoa. O le faalavelave lea o tatou, ua mapo upu tele, o le mea taua, ia malamalama le feau lea e ave i le atunu. A outou tilotilo lelei i faamaumauga, se e matua maoae, maoae le mataga o upu na fai i totolu o le Maota lenei. Leaga o le taimi lena e fai upu ia o la e aoga le alii lea e le i taitai, e le malamalama i mea ia sa fai, e laitiiti e le i taitai.

18 MATI 2020

Tulafono Tau Faaofi o Teuteuga o le Faavae 2020
– faitauga faalua

FOFOGA FETALAI: Malo. Ia avea ia lenei avanoa... Se malie le sui usufono...

Susuga Hon Laauli Polataivao Leuatea: Ia, tasi ae foi lau Afioga i le Fofoga Fetalai, ua uma sou lagona. Na pau lava lea o lau tautaulemau, e malu le Maota i lau Afioga. O le upu lea i lou laitiiti, Tuilaepa, e sili atu le matua o le peleue lea i totonu o le Palemene lenei i lo oe, sili atu.

Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoi: Lau Afioga i le Fofoga Fetalai, ua ou toe tulai atu lava i le mataupu lea. Ua tele au amio sese ua fai i totonu o le Maota lenei.

Susuga Hon Laauli Polataivao Leuatea: E tele foi au mea sese...E sili atu le matua o le peleue lea i totonu o le Palemene i lo oe.

Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoi: Lau Afioga i le Fofoga Fetalai, e sili ona ou toe tulai atu lava i le mataupu lea...

FOFOGA FETALAI: Onosai mai...

Susuga Hon Laauli Polataivao Leuatea: E sili atu, e sili atu le matua o le peleue lea ia te oe i le Maota lenei.

FOFOGA FETALAI: Ua e soli fono....

Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoi: Ua tele au amio sese e fai i totonu o le Maota lenei.

Susuga Hon Laauli Polataivao Leuatea: E tele foi au amio sese.

Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoi: E le o toe avea oe ma Fofoga Fetalai...

18 MATI 2020

Tulafono Tau Faaofi o Teuteuga o le Faavae 2020
– faitauga faalua

Susuga Hon Laauli Polataivao Leuatea: E leai sau amio sese lea e fai...

FOFOGA FETALAI: Alala mai i lalo le sui usufono.

Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoi: E le o oe o se Fofoga Fetalai, alala i lalo...

FOFOGA FETALAI: Ua ou fautuaina le... ina ia tulai ese le sui usufono mai le tatou Fonotaga. Onosai, se e faapena....Ae te le i tulai, ou te fautuaina le paia o le Palemene, tatou te matau loa masei, o le upu lena sa fai e isi Fofoga Fetalai, a tatou matau masei ua tatou faaau i le fetotoai, a o tua o le fetotoai o le tauaimisa. O le upu lea sa mafua ai ona tatou vevesi o se upu lava o lea e talanoa ai tamaiti. E uso lava ma le tulou, e sala le gagana, o le upu lava e uso ma le upu, se ua kokemia se le atunu talu ai lenei faamai, e uso ma le upu lena. A o upu sa felaua'i i aso ia... ioe... o lea ua saunoa le Palemia, malele ai le tele o sui usufono matutua, e faapena uiga o le soifuaga. O upu foi nei a fai atu le toeaina i lona atalii e alu e ta ae fai mai tiga, a fai atu e alu e taele ae fai mai e fefe. O upu faapena, o le mea lena o lea e mafua ai ona ou fai atu. Se i alolofa se aua tatou te matau masei. Leaga e faaau ai tatou... tatou te oo ai i le tauaimisa. Ou te faamalulu atu i lau afioga i le Palemia, ona e talu ai o le le usitaia o tatou Tulafono Tumau e sui mamalu. So o se vesiga e tulai mai po o se sue avanoa e fia saunoa ai le sui usufono, seivagana ua ou tapa le suafa o le sui usufono. Ae a ou tapa loa le suafa o le Malo, Palemia po o le Minisita, o le taimi la lena e tatau ai ona alala mai le sui usufono i lalo ae faafogofoga, leaga o mataupu uma e foi i le Malo mo le latou faamalamalamaga.

O lea e saunoa le sui usufono mo Faasaleleaga Nu 2, e pei e viivii mai tulaga o galuega a le Malo, o lea ua sese ai lona vaa i le upu lea e tiga ai lou finagalo,...e leai lava se mea o sese, e leai foi ni upu ua matuia. Laauli ua ou tapa fua e le o se tuligavale...o lenei mea....ua leva foi ona ou mafuta i lou tuaa, e le faapea lou tuaa, ae ua e tulai mai, e maoae foi...e te i lau faalogo. O le mea la lea, ia... se onosai oe e...vaai i lena Koluse tele e te fealuai ma feamoai ae e te le o mafaufau i le Koluse. Se i e alofa tuutuu mamao le tofa i le Atua e maua ai mea lelei.

18 MATI 2020

Tulafono Tau Faaofi o Teuteuga o le Faavae 2020
– faitauga faalua

Ou te faamalulu atu foi i lau Afioga i le Palemia, talu ai ona o tulaga e pei ona aliali mai i le solifono o Laauli, ua ou manatu, e ui lava o lea sa ou tapa le Satini o le Maota ina ia faatulai Laauli, ae ua ou manatu e fai ia ma aoaiga. Laauli fai ma aoaiga, faafofoga tapuai mai Samoa. Ma ua ou manatu foi o le a faamuta ai foi i i le lauga a Faasaleleaga Nu 2... ma o le a see atu le mataupu...ia Laauli..

Susuga Hon Laauli Polataivao Leuatea: Lau Afioga i le Fofoga Fetalai, e momoli atu malu i puega, silasila foi ma le faafofoga a le Maota i lenei aso aemaise foi le faafofoga a Samoa tapuai mai. O se upu ua laavale pe ua ou soli le vatapuia. Toleafoa, e tasi lava lou lagona ma le agaga lena na momoli atu, ina ia mamalu le Palemene. Ae afai ua laaloa, faamalulu atu, faamalulu atu foi i le Afioga i le Palemia. E fetaai lava ona o le lagona ia malu le atunu. Faatoese atu, ma lou agaga faaaloalo.

FOFOGA FETALAI: Atonu e le o le finagalo foi lea o le Palemia ina ia tulai se mea faapea i lenei taeao, ioe, ou te talitonu e le o le finagalo lea o le Palemia ina ia faatulai se sui usufono. Ae o lea ua ou manatu ai, e ui lava ina ou tapa, ae tatou o i le finagalo o le Atua, tatou maua le agaga o le fefaamagaloi.

Malie le sui usufono o Faasaleleaga Nu.2. ua uma ona fai lau faaiuga. O le a tuu atu se lua minute i le sui usufono mo Vaimauga, tai lua minute uma sui usufono ia e totoe, tuu atu loa ma le fesili. Se i faamotu mai le sui usufono mo Vaimauga i Sasae.

Afioga SULAMANAIA FETAIAI TAUILIILI TUIVASA (Vaimauga Sasae): Faafetai mo le avanoa i lau Afioga i le Fofoga Fetalai mo lenei itumalo. Sa matau lava ma le totoa ananafi le felafolafoaiga a lenei Maota, sa lagona lava i tino le agaga faagaeetia, ona o le Maota lenei o le Malae i Tiafau nei, e faaututagi i ai Samoa aoao. Matau foi lenei taeao a o le i amataina o lenei Fonotaga sa faaauau pea lea tulaga, i le afio mai o lau Afioga i le Fofoga Fetalai i totonu o le Maota e lagona le faagaeetia. Ona o le a? Ona o ni suiga tetele ua i totonu o lenei Maota i le matau a le atunu ma le matau foi a lenei sui usufono. Faafetai i le Atua, faafetai o lo o faatotoe e le Atua ni taitai e ala i le taitaiina o lenei Maota i lau Afioga i le Fofoga Fetalai, o lou lea agaga fiafia.

18 MATI 2020

Tulafono Tau Faaofi o Teuteuga o le Faavae 2020
– faitauga faalua

Ae amuia foi lenei sui usufono, e fou mai i le Palemene a o lo o i ai ni taitai totoa o lo o taitaia lenei Maota, e ala i lau Afioga ma toeulutaia e ala i le taitai ma nisi o toeulutaia o lenei Maota e faafoe ai le sa o Samoa. Faafetai e ui ina faatino lea tulaga vaai i totonu ua alala i lalo ae fai le tatalo, viia le Atua. E ui ina gasegase lou soifua ao le fatu lena e ia te oe le tama, se i tau tulou atu, o le malosi, faamanuia le Atua i lou tulai mai e faafoe le atunuu ma lana Fonotaga i lenei taeao.

Leaga fai mai o le malae, o Lalotea o le malae e faaututagi ai Tumua na o Tumua lava, a o le malae lenei i Tiafau e faaututagi i ai Samoa. O lenei foi la taeao i le faalogologo a lenei sui usufono, e matau lava ma le totoa taualumaga a lenei Palemene o Samoa, leaga o la e faalogologo le atunuu. Ona o lenei Fonotaga o lo o lotea ai le Faavae o si o tatou atunuu. E le faigofie e maaleale, ae ou te faafetai i le Atua ua i ai le sui usufono o Vaimauga i Sasae e ala i lenei sui usufono, e matauina suiga tetele e le mafai ona sui e nisi, na o ni taitai totoa e faalogologo i le musumusuga a le Agaga Paia, lea e i ai le taeao lenei. O suiga i totonu o le Faavae ou te faafetai i tuaa ua lagomau mai i tiasa na faafoeina o lea tulaga, o lea ua tatou o mai ua tatou solisolimulivae ai. O lea foi ua ola le atunuu, ua tupu le atunuu, lea ua i ai le suiga lenei, e faatatau i le soifuaga ma lenei foi vaitau ua tatou ola ai, o lou agaga lea faafetai i le Atua. E oo mai i le taeao lenei o lo o viia pea le Atua e le o afea lava Samoa e lenei faamai oti. Ona o le a? Faavae na faia e o tatou tuaa, e faavae i le Atua Samoa. O le mea lena o lea e manuia ai, a o le Tulafono ma le suiga o le Faavae, e avatu ai se agaga faafetai, i le taitai o le Malo, e afua mai mauga le manuia o se atunuu, e afua mai i le Maota lenei le manuia o Samoa. O le mea lena na totofi ai tatou, tatou te o mai e poipoi le manuia o le atunuu. Faafetai i augafaapae po o i latou nei e tulai mai i Matagaluega nei, e pei o le Matagaluega o le Toe Fuataina o Tulafono, le Tamaitai Loia po o le Tamaitai Fomai, aemaise foi o le tamalii lea o le Vaimauga ua tulai mai i le Faamasinoga, ae a le sui o le Ofisa o le Loia sili, o outou o augafaapae o le atunuu, ae a? O lea ua aumai suiga o le faavae, faafetai i le vave ona aumai i totonu o ni mea o lo o manaomia. E ui i Tulafono uma e aumai loa tulai ai lenei sui usufono, a o lenei Tulafono o le Faavae, e nofonofa lava ma mafaufau ma faalogologo i le Agaga po o le a le taimi e talanoa ai. O lea ua aumai lenei suiga, viia le Atua, ona o le a?

18 MATI 2020

Tulafono Tau Faaofi o Teuteuga o le Faavae 2020
– faitauga faalua

O le tulaga sa tatou o mai sa i tua le... lua Matagaluega a le Soifua Maloloina. E le iloa e tatou e sau se faamai oti e ala i le misela. Na oo mai loa tutu faatasi loa. Ua a nei la? A lea e sau le misela ua tasi le Matagaluega a le Soifua Maloloina, e sau lenei faamai ua sauni. O mea e le i vaaia e mata e le i oo foi i ai se mafaufau o se isi, o le mea lena e fai e le Atua po o ni taitai po o ni tagata alolofa i le Atua, e i ai le atunuu lenei.

O lenei taeao lau Afioga i le Fofoga Fatalai o le suiga o le Faavae, e amata mai i le tulaga o le suiga mai o numera o Minisita ua i ai le finagalo o lenei Faigamalo. E ui lava i Tulafono uma, a o le suiga o le Faavae i Matagaluega ma latou Tulafono Tau Faaofi e aumai i totonu i le Minisita ma Ofisa Sili o Pulega o Matagaluega, a o lenei Tulafono Tau Faaofi e faamau mai i finagalo o taitai nei o le atunuu. Na o mai loa vaai lea e faamau mai, o lea la suiga, o le suiga atoa lava o tatou lenei, faatasi ai ma le atunuu o lo o tapuaia o tatou faiva. O le suiga o le faavae i le 2012 – 2014, e i ai se talosaga a lenei sui usufono, e le o lava le suiga lea. Mafua i se a? E tapuaia uma lava e itumalo o latou sui usufono e fia Minisita uma lava, ae faaopoopo na o le lua. E tuualalo atu le sui usufono mo Vaimauga, lau Afioga i le Palemia, se tusa lava pe tofu le Matagaluega a le Malo ma le Minisita. O le mea lena e fia manao o tatou itumalo ia aumai loa sui usufono faa-Minisita, ae le mafai ona Minisita pe a le alu le faa-lua. Seiloga lava e faalua ni terms faatoa tofi i le Minisita. O le manatu o lenei sui usufono ona o le tulaga lea, ona o lea e pei e fefefe i tatou i tupe, o tupe e totogi ai vaega o auauanga nei faa-Minisita.

Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoi: E pau lea o si mea e tulai atu e fia faasao, e leai e le faapena le HRPP, e i ai lava sui usufono foi faatoa tulai mai mo le uluai taimi e tofi e avea ma Minisita, o Faiga Faavae na a le HRPP. E taumafai lava le HRPP e tofi uma... e tofu lava le vaega. Le vaega faatoa ofi mai i totonu ma vaega ua fai si leva i totonu o le tatou Palemene. E taua lava le vaega lea ina ia silafia ai, leaga o le fesili lena na tuu mai ia te au e le isi foi sui usufono independent o le vaega lenei, ua folafola ma polomisi e sau ae te i ua le sau, i paeaiga ua leva. O le fesili lena na aumai, po o le Kapaneta ea o le faigamalo a le HRPP e na o tagata ua leva, a o le taimi lena o lea faatoa tasi lau nofoaiga.

18 MATI 2020

Tulafono Tau Faaofi o Teuteuga o le Faavae 2020
– faitauga faalua

O lau tali, e leai o lena e te sese, o au le isi e fou mai, a o lea na tofi e le Palemia i lena taimi. Ae o lea faatoa amata, o lona uiga la, o le Faiga Faavae lena, ona o le vaega lenei, o le Vaega e Puipuia Aiatatau a Tagata. E tofu uma lava sui o le HRPP ma aiatatau. Lau Afioga i le Fofoga Fetalai, o le faamalamalamaga lena, te i ua i ai se sui usufono o fia sau i le Faigapalota fou ona taitai seseina lea i le lauga a le sui usufono.

FOFOGA FETALAI: Malo faafetai, ua manino lea vaega. Ae faaiu maia le saunoaga, aua o mea uma lava sa...

Afioga SULAMANAIA FETAIAI TAUILIILI TUIVASA: O le a ou see ese ma le tulaga lea, o le mea lena e pei o le faataitaiga, tulou le uso foi mai Faleata, aua o le uso lea sa i le Itu Agai, ae na oso mai totonu o le Faigamalo faapea e maua sona Minisita, o Leala ae sau loa i i, poloka ai loa i, i le Minisita lagolago lea e i ai i l e taimi lenei. Lau Afioga i le Fofoga Fetalai i le suiga lona lua, o le tulaga lea i Fanua ma Suafa, o le autu lea o lenei faamoemoe. E lagona le agaga faafetai ina ua faatulai mai...

Tofa Lealailepule Rimoni Aiafi: Lau Afioga i le Fofoga Fetalai,

FOFOGA FETALAI: Malie le sui usufono se i tulai mai le sui usufono mo Faleata, po o le sui usufono lea e faasino i ai lau saunoaga pe leai.

Tofa Lealailepule Rimoni Aiafi: Ua leva lava ona ou sau ma ou vaavaai i le omo lapotopoto lea e i i po le a le mea e aoga i ai. Ou te tatalo i lau Afioga, aumai le sui usufono se i o ma iloilo i totonu o le omo lapotopoto lea. Leaga o Faleata o Vaimauga o le mea lava lea e tatau ona fai. Ae ui i lea, lau afioga i le Palemia, ou te tatalo atu, vaai Nofoa ia e lua, e aumai le tama lea e faa-Minisita pe a toe sau.

FOFOGA FETALAI: O le mea taua aua e te amanaia lea mea....

Afioga SULAMANAIA FETAIAI TAUILIILI TUIVASA: Lau Afioga i le Fofoga Fetalai, tulaga i le faatutoatasi o le Matagaluega o Fanua ma Suafa o le auga lea o le lagolago a lenei itumalo. Ona o i, o le Matagaluega lea a lo tatou Malo o lo o ave uma i ai faamoemoega ma le faatuatuaga o le atunu. Faafetai foi i tamalii o lo o totofi i ai.

18 MATI 2020

Tulafono Tau Faaofi o Teuteuga o le Faavae 2020
– faitauga faalua

E lagolagoina le faatutoatasiina ma ia faatino lava ia tatou aganuu, ma le tulaga o lo o i ai si o tatou atunuu i fanua ma suafa, o measina a le atunuu. Ae na o le tuualalo a lenei sui usufono, se i silasila ane, ou te vaai atu e le o aafia ai ma o tatou matai foi ia e le lava le aaoaga se i tulou. Tama foi na, na ona uma lava o le aoga o loa tausinuu. O latou na o lo o faia o tatou nuu i le taimi lenei, o tulafale aemaise foi o tamalii faauluuluga o le atunuu o lo o i ai le tofa ma le faautautaga, pe le mafai ona afea e aumai i totolu, aua o lea o le a faatino faaleaganuu ma faatino faasamo le faiga. O le isi tulaga e lagolago ai lenei Tulafono o Fanua ma Suafa, ua lava le taimi e soalaupule ai mataupu a aiga. O lo o tuuavanoa pea i le soalaupulega lea, aua se i tulou le Maota lenei, o le tele o isi matai, e le o manao i soalaupulega, ona o le a? E manao e sue avanoa e faatino pea e le faamasinoga, ae o lenei Tulafono ua aumai, o lo o taumafai ai lava e faatino i le faaleaganuu, soalaupule toe o i tua toe o mai soalaupule. O i ina e maua ai le auro, a o isi o aiga o lo o taumafai e vave tatai i le faamasinoga, ina ia totofi mai ai e, e le au ma faapena, ae o lou lea lagona, o lou lea faafetai o lo o tuuavanoa ai e faatino ai e le aganuu. Tulaga foi o le fefefe o lo tatou Palemene ma le Malo i benefiti foi, e leai, fai ...fai e tusa lava pe faatutusa tulaga i faamasino la e i luga, ia tofu foi faamasino Samoa ma taavale. Faatino, ona o le a? o i o le fatu lea, a o le tatalo foi a lenei itumalo e lagolagoina ai lenei Tulafono, ta te popoe ne i te i ua toe aafia mai e pei ona saunoa foi nisi o sui usufono, o le a toe aumai ai nisi faamasinoga ua uma ona Iloilo.

O lau la tatalo, o i ina tonu lava e toe vevesi ai si o tatou atunuu. O ai lava faamasinoga ua tamau, pe lagona foi e o tatou tagata na faiaina ai, ua fao ai a tatou measina, o la e sisila fofoga alofa o le Atua, e i ai le taimi. Ae o lou popolega ne i avea lenei Tulafono o le a toe tuuavanoa e toe tatala ai ma toe Iloilo ai ni faaiuga ua tamau pe sa i ai, lea foi e pei ona popole lenei Maota, e o lava isi i le tuugamau, o la e o ma le faanoanoa, o mea patino lava na a le Atua. O lau la tatalo i le Minisita ma le tatou Maota nei, se i silsila i le vaega lea...

Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoi: Lau Afioa i le Fofoga Fetralai, o le agaga tonu lea o le faatuina o le Faamasinoga lea, ia tau siitia le tulaga maualuga ma ia matua iloilo totoa mataupu ina ia amiotonu ia faaiuga fai.

18 MATI 2020

Tulafono Tau Faaofi o Teuteuga o le Faavae 2020
– faitauga faalua

O le eseesege o le Faamsinoga lea o Fanua ma Suafa ma le Faamsinoga o Soligatulafono. A faamaonia lau solitulafono pe falepuipui pe sala e na o oe lava e aafia ai, uma loa uma. A o le faamsinoga lea o Fanua ma Suafa, e le gata ina aafia ai matai ia e tausia le aiga, aafia uma ai lava le auaiga, aafia ai ma le extended family, latou uma e tau i le gafa la e i o i Amerika, la e i o i Niu Sila la e i o i Ausetalia i le taimi nei ma le lumanai mamao i luma e oo i fanau e le i fananau mai, ua matua soloia i le aufuefue a latou aiatatau i o latou fanua ma igoa matai a aiga. O le mea la lena e taua tele ai le mea lea, o le ala lena o lea sa saunoa mai le sui usufono lea Taitaifono o Tupe, i le taua o suesuega ma manatu ua oooo i ai, lea sa silafia lelei i le faatofalaiga a o tatou matua na latou pasia le Faavae. O le a taoto le Faavae i lona tulaga, ae lafo mai i augatupulaga o i luma ia silasila totoa i mea ia, mea ia o le aiatatau a tagata e ono aafia, ona teuteu ai lea o ni teuteuga e tatau ona fai mo le puipuia o measina a Samoa. O lona uiga, o le mafuaaga lena, e le toe aia mai ia aga ma tu faapapalagi, e le toe aia i mea ia. O tatou Faamsinoga tau Fanua ma Suafa e tutoatasi lava le Faamsinoga. O lea foi e atagia i le Faavae, e le tatau ona aafia faaiuga e fai i i, e fai ai se faaiuga a le Faamsinoga o Soligatulafono.

Lau Afioga i le Fofoga Fetalai, o le taua lena ia to manatunatu i ai le sui usufono ona o saunoaga ia e aumai, e tatau ona matua tuutuuloloto le tofa. O au lea e taunu mai i ai, ua le iloa e tagata po o fea a sulu i ai, i faaiuga e fai, i le tulaga o gafa e avatu, ona ua toatele tele tagata e popoto e fau gafa. E tiga lava ona le tau i ai, ae feosi feosi foi a, tau i le gafa. Ae a tau loa la i gafa ua aafia ma fanua. O le tulaga lena, leaga e sosolo mai i le tulaga o le matai le pule i fanua. O le tulaga lena, e taua tele ai i o tatou tagata le teuteuga lenei ua fai i le aso. O lea la ou te faamanatu atu i le sui usufono, e le faapea a sese se faaiuga, ona tuu ai lava lea e alu ai pea, o le ala lena e faatulaga ai faamsinoga e tatau ona i ai se tulaga maualuga e oo i ai, ina ia toe faasao se mea na sese. Lau Afioga i le Fofoga Fetalai o le tulaga lena e faatauaina ai, leaga o lea ou te tau popole i le mea lea, afai loa o se iuga po o le sese po o le sao, taatia ai faapena, e leai. E le tatau ona taatia pea se mea sese e alu loa, talu ai ua leva ona fai se iuga sese ma ua tau fai alu sese uma ai le auaiga atoa. Lau Afioga i le Fofoga Fetalai, o le tulaga lena e taua tele ai le teuteuga lenei o le Faavae ma le tulaga foi lena e taua ai le tutoatasi o le faamsinoga o Fanua ma Suafa.

FOFOGA FETALAI: Tulai mai le sui usufono.

18 MATI 2020

Tulafono Tau Faaofi o Teuteuga o le Faavae 2020
– faitauga faalua

Afioga SULAMANAIA FETAIAI TAUILIILI TUIVASA: Lau Afioga i le Fofoga Fetalai, o le saunoaga foi a le Palemia o lea e malamalama lelei lava le sui usufono. Ae pei o le uiga o lau matau, o le faataitaiga la, pe a toe tuu la i tua tulaga o faamasinoga, aemaise la lou itumalo lenei o Vaimauga i Sasae, o ou eleele la e i ai nei, lea ua ave e le Esetete i taimi o Siamani, o eleele o pulega a alii ma faipule, o eleele a lou itumalo. A tuu la i tua, e tatalo e toe faafoi mai eleele a lou itumalo..

Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoi: O le mea e fia faasao, o la e i ai i le faamasinoga, lafo pea i le faamasinoga le mamao i tua e oo i ai. O la e i ai i tulaga o faaiuga le mamao i tua e agai i ai ma le mea e le tatau ona oo i ai. E oo foi la i tulaga o fanua ia, ua leva ona uma ona fai i ai faaiuga i eleele nei ma ave i le taimi o Siamani. O lea ou te tomanatu nei, e 1500 le aofai o faamasinoga o faatauga fanua na fai, i le taimi o Siamani na fai i le faamasinoga maualuga e Siamani ma faamaonia ai nisi o faatauga fanua na fai, ma teena ai nisi o faatauga fanua na fai. O lona uiga la o le tulaga na fai ai fanua ia i aso la, ua uma. O lea foi la na pasi ia Niu Sila, pasi mai e Niu Sila ia Samoa fanua nei, o lea la ua i lalo o le pulega a le Malo, lea e mafua ai ona i ai le tele o eleele nei o lo o umia e le Malo ma faatino ai galuega faalemalo, ma le tele foi o isi eleele ua toe faamatuu atu i tua. A o le tulaga ia lena i tua atu o aso o Siamani ua uma ona fai i ai iuga i na foi vaitau. E faigata la ona toe... ua leva ona taumafai i ai nisi o nuu, ae ua uma ona taoto iuga, e le toe lotea mea na ua uma.

Lau Afioga i le Fofoga Fetalai se i vagana la mataupu ia o le a tuu ese ese ia faamasinoga. O lea e alu le tulafono lenei i le Komiti faapitoa ona agai lea i ai o fesili faapena, ae ou te lagona e leai se tuivalea i totonu o le tatou Malo e matua agai ai i tua ni faaiuga e fai.

Afioga SULAMANAIA FETAIAI TAUILIILI TUIVASA: O le a ou see ese ma le tulaga lea. O le isi Tulafono o le eleele tanu se i tulou le faafogofa a le atunu. E masalo o lea e lau silafia uma lava, o lea e i ai le tulaga o tuamaota e mafai ona fai le pemita i le MNRE ona tanu lea. A o le tulaga lea e pei e atagia mai ai nei, o eleele foi na... aemaise o lea tatou te vaaia i le suiga o le tau lea ua i ai, o tatou lava fanua sa i ai ae ua sau le vai ua faapena ona alofia, ma le sami foi. A o lea o le a te i ua maua fua e le malo o tatou lava eleele ia.

18 MATI 2020

Tulafono Tau Faaofi o Teuteuga o le Faavae 2020
– faitauga faalua

E pei o le tuualalo pe le na... o se tulaga i le sami aemaise o tatou lava eleele sa i ai, o le suiga o le tau, ae pei o lea e foliga mai o le a umia e le Malo. O le agaga o lou sui usufono, se i tau silasila ane i le tulaga lea i eleele, o mea lava a tatou sa i ai, ae ua tuu foi i le tulaga foii suiga o le tau. O suafa matai, e lagolagoina e lenei sui usufono ona o tulaga nei o lo o vevesi ai si o tatou atunu. E iloa gofie lava afioaga o lo o malu pulega a alii ma faipule, e tasi lava le sao e faauluulu uma lava i ai pulega o aiga ma afioaga foi. Ae iloa gofie lava afioaga e tele ia sao, ta te vaai atu lava i ai, ae o lou lagolagoina o le tulaga lenei...

FOFOGA FETALAI: Faaiu mai le saunoaga ua maea lou taimi.

Afioga SULAMANAIA FETAIAI TAUILIILI TUIVASA: O le a faaiu atu, lau Afioga i le Fofoga Fatalai manuia lenei Fonousu. E ava tele le sui usufono mo Vaimauga i lou tulai mai. E moni lava o lau afioga o le tama Aana, a o lou toala fanau lava o le Vaimauga. Manuia le Fonousu a lou atunu, toega o lenei aso, ia i ai le agaga o le Atua i le atunu. Faafetai.

FOFOGA FETALAI: Malo faafetai. Se i tulai mai lea itu o le Maota.

Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoi: O lea e matauina e feololo a tatou Tulafono, se i fesili atu lava pe toafia sui usufono ia e totoe, ae po o le a foi le umi o latou saunoaga.

FOFOGA FETALAI: E toe toafa sui usufono ia e totoe,toe toatolu... oi lea toe toa lua. A tai lua la minute, ia na o le fa minute.

Afioga Peseta Vaifou Tevagaena: Lau Afioga i le Fofoga Fatalai...

FOFOGA FETALAI: E leai e le i tulai mai le sui usufono le la muamua. E uma loa le sui usufono mo Faasaleleaga ona totoe lea o le toatas.

18 MATI 2020

Tulafono Tau Faaofi o Teuteuga o le Faavae 2020
– faitauga faalua

Afioga PESETA VAIFOU TEVAGAENA (Faasaleleaga Nu 4): Faafetai mo le avanoa i lau Afioga i le Fofoga Fetalai. E tele lava ni manatu sa taumafai atu ai le matagofie o le teuteuga o le tatou Faavae, ae ua ou manatu o le a faga sao loa se manatu ona o le utiuti o lou avanoa. E momoli le faafetai i lau Afioga i le Palemia ona o lenei Tulafono i le teuteuga o le tatou Faavae. Momoli foi le faafetai i le susuga i le tamaitai loia, o le tamaitai Ofisa Sili o Pulega o le Matagaluega o Faamasinoga o Fanua ma Suafa, aua foi le tapenaga o lenei teuteuga o le tatou Faavae. O le agaga faafetai i lou nei sui usufono, ua tupu tonu lava lenei teuteuga, o lea ua o ta i totonu o lenei Paeaiga. Aua e tautalaaso le tamaloa. O lea e saunoa soo lava le tatou taitai i le mea lea, aua le fefefe e fai suiga. E ala ona fai suiga o se Malo e sui ua mea lelei. O lea ua aumai i totonu le pule mamalu a alii ma faipule, e faapea foi ma tagata taitoatasi i le latou aiatatau, o le agaga faafetai lea a lou nei sui usufono i le teuteuga lea ua i ai. E pau lava lea o le talosaga a lou nei sui usufono lau afioga i le Fofoga Fetalai, ona e manaia pe a aumai loa i totonu le tulaga lea, faasalaga faaleaganuu, faanaonapo lea o lo o faia pea i totonu o nuu ma afioaga, ona matagofie ai lea o le Teuteuga o le Faavae.

Silasila foi lau Afioga i le Fofoga Fetalai, e tele nuu ma afioaga e eseese pulega e le tutusa pulega. A o faasalaga ia o lo o feagai pea i totonu o le tatou atunu, o lo o i ai faasalaga matuia, e pei o le mu o le foaga, soloia ma le aufuefue, tu le tootoo ma isi faasalaga e tele e sunui ai fale o aiga ma faaleagaina meatotino a aiga. O lea ua aumai nei, e tasi lava le Faamasinoga. Ae a fua i tu ma aga a si o tatou atunu, o lea lava e fai lava faamasinoga a nuu ia, fai faasalaga i totonu o nuu ma afioaga. Pe moni pe le moni i totonu o pulega a nuu ni sala e tuu atu, e fai lava, e le tau suesueina pei o le faamasinoga o lo o i ai nei.

O le agaga lena o se talosaga a lou nei itumalo lau Afioga i le Fofoga Fetalai, pe le mafai i le Teuteuga o lenei Faavae ona tuu atu i ai i totonu ma le tulaga lena, tapu loa, tapu loa ma nei tulaga o faasalaga faanaonapo. O lea ua i ai le Tulafono e see uma mai i ai mea uma, ua i ai le Tulafono e aumai uma i ai mataupu tau i suafa, tau i fanua, ae le o le tulaga lea e ese le faamasinoga e fai i nuu ma faasalaga e fai i nuu ae aumai i inei i le mea o lo o i ai le Tulafono ua ese foi.

18 MATI 2020

Tulafono Tau Faaofi o Teuteuga o le Faavae 2020
– faitauga faalua

FOFOGA FETALAI: Ou te fautuaina le sui usufono mamalu, ona o le tulaga o lou finagalo pei ona faaalia, ma le suiga o lo o i ai le tatou Faavae. E pei o nai lagona foi nei aua o lea e ave i le Komiti ona faapena lea ona oo i ai e faaali i ai lo ouluu finagalo e afua ai se latou teuteuga aua pei e ese le tulaga o teuteuga ia o lo o tulai mai i le mataupu lenei.

Afioga Sulamanaia Fetaiai Tauiliili Tuivasa (Vaimauga Sasae): Lau Afioga i le Fofoga Fetalai e fia tulai pe maua se avanoa ona e manumanu tele lenei sui usufono i le taimi. O lea foi e fia sausaunoa lenei itu i nisi o sui usufono. Ae o le Palemia Lagolago a le Palemia le sui usufono le la, o laua e ona le Tulafono lenei, ua alu ai le tatou taimi, ae o lana Palemia e ona le Tulafono. Ae le tuu mai le avanoa i nisi o sui usufono. E pei o le agaga lena o lea e tau avatu ai i lau Afioga, ona o lea ua tau tuli tamoe a matou lauga ona o le faasaoina o le Palemia Lagolago le la a le Palemia faamolemole.

Susuga Hon Tuilaepa Auelua Fatialofa Luplesoliai Lolofietele Neioti Aiono Galumalemana Dr. Sailele Malielegaoi: Lau Afioga i le Fofoga Fetalai, masalo ua laaloa i le vaai a le Palemia Lagolago, o la e foi e i ai le Tulafono o le pulega mamalu a alii ma faipule e lotea ai mataupu na, a o le mataupu lea e pei e fai si loloto atu ae o la e ua i ai le Tulafono e tagofia ai mataupu na.

FOFOGA FETALAI: Faafetai. Masalo o le ala lea o lou faapaimalu atu ma faauilavea i le saunoaga a lau Afioga i le sui usufono mo Faasaleleaga Nu.4. Se malie ia ae tuu maia le avanoa e faaauau ai le tatou galuega, ae i ai le taimi ona outou toe feutagai lea e tusa ma lou finagalo.

Afioga PESETA VAIFOU TEVAGAENA: Faafetai lava i lau Afioga i le Fofoga Fetalai. O le mea sili o lena ua tuu atu le manatu o lenei sui usufono, ae na ona faaila atu pea o se manatu o lenei sui usufono, aua o lea e tapena le tatou Tulafono. Talu ai ona o le tulaga lea o le eseese lava o pulega, e pei foi o lea e tupu i lou itumalo. Ou te tautala leaga o lea e tupu i lou itumalo le mea lea, e i ai se tasi o afioaga o lou itumalo o lea e tapu ai isi nuu o lou itumalo. E pei la a tilotilo i ai i pulega nei, e pei o tulaga nei. A o le agaga maualuga lea ua avatu lau Afioga i le Fofoga Fetalai, ae ua uma foi se manatu. Na ona faaila atu lava ona o lea e faagasolo le tapenaga o le Tulafono aua le teuteuga o le Faavae. Ma lou faaaloalo lava.

18 MATI 2020

Tulafono Tau Faaofi o Teuteuga o le Faavae 2020
– faitauga faalua

FOFOGA FETALAI: Faafetai lou lagolago mai i le ta galuega, le galuega a le Fofoga Fetalai. Masalo o lou finagalo foi lea le sui usufono mo Faleata Sasae, ae lafo maia se i faagasolo le tatou galuega.

Afioga Salausa John Ah Ching (Faleata Sasae): E fia maua se avanoa faamolemole i lau Afioga.

FOFOGA FETALAI: Ia, se i alofa e faapuupuu mai la, leaga o lea ua tele ina leai se mea o toe... o mea uma lava ua taua i saunoaga a sui usufono mamalu. O le ala foi lea o le manatu a i ai nisi mea o totoe, ia ave i le Komiti, ae tulai mai le sui usufono e...

Afioga SALAUSA JOHN AH CHING: Faafetai i lau Afioga mo le avanoa. E tulai atu lava i le ava ma le faaaloalo tele i lenei taeao. Ua ala ona tulai le sui usufono lenei, ona o le suiga o le Faavae. Ia o le mafuaaga lena, na ona faaleo atu o le agaga o le sui usufono mo Faleata Sasae, e lagolagoina le suiga o le Tulafono i le Faavae. Ma o le tasi lenei o tulaga ou te iloa sa moomoo lava i ai le Komiti Faufautua a le tatou atunu i le taimi ae le i tutoatasi Samoa ina ia tuu i ai mea ia o tu ma aga i totonu o Tulafono Faavae a Samoa. O lea lava la e faagasolo mai, ona o Peretania sa faaaaoga e tatou e fai ma tatou Tulafono. O lea la ua uma ona tatou sua le Faavae i le Atua Samoa, o lea ua i totonu o le tatou Faavae. O le isi la lea mea ou te iloa o lo o moomoo i ai. E avatu le faafetai ina ua laga le mataupu lenei.

E avatu foi le faafetai i Matagaluega ia e tolu sa galulue i le mea lea. Ma o le tuualalo foi, e tatau lava ona faaaauau le galuega lenei ona e tatau lava ona reform Tulafono ia a Peretania sa tatou faaaaogaina, e le uma, e tatau lava ona oo i se taimi e aveese uma ai lava Tulafono ia a Peretania o lo o tatou faaaaogaina. O le faafetai, e ese le manaia o le aso na tulai mai ai taitai ia e toatolu faamalamalama le Tulafono lenei, ma o le mea lena sa sili ona taua i lou nei sui usufono o le vaai atu i le galulue faatasi o Matagaluega ia e tolu, Faauluuluga e fai ma faataitaiga i totonu o le tatou faagasologa o le tatou galuega.

Ia, o le isi vaega lea sa taua i le Lauga Faa-Minisita a le Afioga i le Palemia, o le faamai lea o le coronavirus. E tasi lava si mea sia e fia faaopoopo i ai ina ia tatou tapenapena i ai. O le 80% o tagata e aafia i le faamai lenei e le tigaina, e mitimiti, e mai mitimiti.

18 MATI 2020

Tulafono Tau Faaofi o Teuteuga o le Faavae 2020
– faitauga faalua

O le 15% e mai feololo, 5% e mai tigaina. O i latou ia e mai tigaina, o i latou ia o le a ave i le falemai e taooto ai, a o le 80% e tausi i le fale. O le isi la lea mea e ao ona tapenapena i ai nuu ma alaalafaga ma o tatou aiga taitoatasi, e faapefea ona tausi i le fale, o ai e tausia, o fea le potu e tuu ai, o fea le vaega o le fale e tuu ai, o fea le faletaele e taele ai, o ai e tapena taumafa, o ai e faia tagamea. O mea uma ia e ao ona puipuia ai le tatou atunu, ae faafetai tele i le Minisita Lagolago ma le Matagaluega ua tele vaega o le puipuiga o lo o faagasolo nei.

Faafetai tele i le Malo o Niu Sila, o Niu Sila lea na sau le faasalalauga anapo, o ananafi i le vaveao i le fa i le vaveao...

FOFOGA FETALAI: Malo. E faamalulu atu i le sui usufono mamalu, a ua maea loa lau saunoaga, o le a faagasolo le tatou galuega.

Afioga SALAUSA JOHN AH CHING: O lea ua faauma atu, ioe. O le fa i le vaveao ananafi, o lea na amata ai le isi puipuiga a Niu Sila, o tagata uma e fia agai mai i le Pasefika, o la e ua fai foi suega i le malae vaalele ae le i o i e aumai a latou bookings. O le mea lea faafetai tele ia Niu Sila ma le Palemia.

O le mea mulimuli lau Afioga, ia, o eleele ia ua lofia i le sami. Ua lofia eleele ia ona o le suiga o le tau. O le manatu o lenei sui usufono, fofo alamea le suiga o le tau i le mea lea, o a ni seleni ua maua mai i le suiga o le tau, fofo ai i, fofo ai le mea lea, faatumu lauelele ia. A le o lena a faigata, o le a se isi fuafuaga a le tatou Malo, pe relocate nai aiga ia ma se tulaga. A ua faauma atu, faafetai tele i lau Afioga mo le avanoa ua tuuina mai. Manuia le Fono a Samoa.

FOFOGA FETALAI: Malo. Faafetai. Ia, malo, e uso lava le le usitai ma le le mafaufau, ae le afaina.

Ia se i tulai mai le Palemia.

Susuga Hon TUILAEPA AUELUA FATIALOFA LUPESOLIAI LOLOFITELE NEIOTI AIONO GALUMALEMANA Dr. SAILELE MALIELEGAOI: Lau Afioga i le Fofoga Fatalai, e i ai nai mataupu ia ou te manatu e tatau ona ou tali atu i ai, ae ao lava ona ou faapaimalu atu foi i le Maota.

18 MATI 2020

Tulafono Tau Faaofi o Teuteuga o le Faavae 2020
– faitauga faalua

O le anava lea a le Maota lenei, e le milia faauu upu a le Maota lenei pe a oo ina soalaupule mataupu ogaoga, e oo lava i le ooooga o upu lafolafo i le Maota lenei. Ae o upu e masani ai Samoa, “E tetele a pesega ae matua lava i le oo.” O le a le uiga? A oo lava i le taimi e oo ai le talanoa ona o le lavelave o mataupu e feagai ma le Maota e aafia ai le atunuu atoa, e faapena, e le mafai lava ona aveesea le avafatafata lau Afioga i le Fofoga Fatalai, o a tatou tu ma agaifanua o le faaaloalo. O le mea lea, e faamalulu atu foi ia te outou pe a faafogafoga mai ua taliaa se manatu. E faamalulu atu foi i lau Afioga Tupua o le Aloalii, lau Afioga Puletui o le Maopu Taulagi e tausi e Fatialofa ma Auelua lau Afioga Laauli. O Tupua o le matai o le itumalo lenei, o le Tapau o le itumalo lenei o Lepa, ou te tausivaatele foi aua le puipuiga.

Lau Afioga i le Fofoga Fatalai, ou te faamalulu atu foi i sui usufono mo Anoamaa Sasae ma le sui usufono mo Anoamaa Sisifo pe afai ua fesopoai pe ua ou feaveai o la itumalo. E i ai le fagogo a le isi Fofoga Fatalai na fai i totonu o le Maota lenei. Fai mai le Fofoga Fatalai, ua toatamai le isi faifaatoaga i lana lapiki se i tulou. E faatulou atu i te i foi ua toatamai se isi. Ona tuliloa loa lea e le faifaatoaga lenei o le a fasi o le a tape. Ia ua tamoe mai la le lapiki oso loa i lalo o le laulapa ae tilotilo atu le lapiki, o lea e tutu mai le isi foi faifaatoaga e tuaoi ma le faatoaga a le toeaina. Fai atu loa le lapiki i le toeaina, shhhh se faamolemole aua e te taua au, o le toeaina la e sau e faauma au i le agaese. Fai mai loa lea o le faifaatoaga, “ua lelei.” Sau loa le toeaina lea fai le faifaatoaga, “Na e vaai mai i lau lapiki o sau i i? Se o le lapiki matua leaga tele.” Ae faasino loa le lima o le toeaina i le mea lea e lafi ai le lapiki ma fai mai, ou te le i vaai lava i se lapiki.” Ia fai mai loa le lapiki, sole, o lena e sao lou lima ae sese lou guku. Ia o le mea la lea, e faamalulu atu ia oulua pe a ua felauai lua Sasae ma lua Sisifo, ae o le lua itumalo foi e afua ai le isi talitonuga, e salasala lava aso. A oo lava ina timu aso ua sasae, sisifo, ae sisifo, sasae.

Ou te manatu e taua tele le toe tomanatu i le Tulafono lenei i ona otootoga o le taua o le Tulafono Tau Faaofi lenei.

- (1) o le Tulafono o le Teuteuga o le Faavae, ia matua amanaia ma puipuia a tatou aiatatau faaleaganuu i totonu o le Tulafono o le Faavae.
- (2) ua faatulafonoina le faamalosia o le Faamsinoga o Soligatulafono ona amanaia tu ma aga a Samoa i ona taualumaga.

18 MATI 2020

Tulafono Tau Faaofi o Teuteuga o le Faavae 2020
– faitauga faalua

- (3) ua tutoatasi le Faamsinoga o Fanua ma Suafa i ana faaiuga, faaiuga apili, faaiuga iloilo i lalo o le Vaega 9 o le Tulafono Faavae.
- (4) ua atagia tu ma aga a Samoa ma le Faamsinoga o Fanua ma Suafa i totonu o le Tulafono Faavae ae Samoa.
- (5) ua le toe i ai se malosiaga o le Faamsinoga o Soligatulafono e iloilo ai se faaiuga o le Faamsinoga o Fanua ma Suafa, vagana ai lea tulaga, e tumau pea le malosiaga masani a Faamsinoga o Soligatulafono. O lona uiga o le Faamsinoga Faaitumalo, Faamsinoga Maualuga ma le Faamsinoga Apili.
- (6) e mafai e le Peresetene i lalo o se pepa faamaonia ona faatagaina le toe iloilo o se mataupu tuga o se tali atu lea i le taofiofiga o le toe iloiloina o se mataupu res judicata ua leva ona tuua.
- (7) e le faaaogaina Tulafono o tu ma aga a Egelani, Tulafono ia mai fafo i le Faamsinoga o Fanua ma Suafa.
- (8) e manino mai i le faavaa fou, ua i ai nisi avanoa e duesue atili ai se mataupu faa-Faamsinoga o Fanua ma Suafa. A o faaiuga uma a le Faamsinoga o Apili ma le Iloiloga, e tumau lea ma mausali.

Lau Afioga i le Fofoga Fetalai, o otootoga lautetele na ua ou manatu e tatau ona toe faasilasila. Ae o se taimi mulimuli ona ou faatuina atu lea o ni lafo taua, i le Tulafono lenei o le a see i o i le tulaga masani i le Komiti Faapitoa e iloiloina ma toe avanoa ai foi le mamalu o le Maota lenei e ave i ai outou fanoga, e faapena foi ona valaau le mamalu o le atunu.

O lona uiga, e mafai ai ona toe faatoai i ai nisi o faapopolega sa aumai manino i le taeao lenei ma le aso ananafi. E taua uma lava outou finagalo sa faaalia, a o lea e tele lava le avanoa e toe tilotilo i ai le Komiti Faapitoa o le a ou faatuina atu i se taimi mulimuli.

E i ai le mataupu lea sa laga i le suiga o le tau ma le aia o nisi o tatou gataifale. Ia, ma le aiaiga lea o lo o i ai i le Faavae, sa i ai lava i le Faavae mai le amataga o lea lava e tumau, o eleele uma i lalo o le sami po o... o lona uiga e aafia ai ma matafaga, e oo i le mea e gata ai le sua o le tai oooo, o i ina e oo atu i ai le pule a le tatou Malo. E le i soona faia le faaiuga lena i le Faavae. Na mafua ona fai o le puipuiga o le gataifale ma alatetele o le Malo. Aua ana leai le mea lena, semeamanu o malepelepe uma le gataifale ae faatau faasoloatoa le oneone.

18 MATI 2020

Tulafono Tau Faaofi o Teuteuga o le Faavae 2020
– faitauga faalua

O le ala lena o lea e mamao tele le tofa na oooo i ai o tatou tuaa. A faasaoloto atoa, faatafagaloa le gataifale, ona pule lava lea o le aiga ia e o ifo e lau le oneone ma faatau, ae a faapefea le auala? Ona leaga lea o le auala toe omai foi i le Malo e o atu e fai, aemaise lava le taimi lenei o lea ua sailigata le oneone, ua i ai le fuafuaga mamao a le Malo e fofa ai le tulaga lena. Ae le i soona faataoto aiaiga ia i le Faavae. A o le lavelave lea ua toe aumai nei, ona o le siisii o le tai. O lea ua saunoa le sui usufono mo Faleata, o le tulaga lena e fai, e tatau lava ona fesoasoani foi le Malo, o lea e talosaga Malo nei i fafo i a latou seleni e aumai ona taumafai lea e fai seawalls o pa ia i gatai e puipui ai eleele o le atunu, ae tautuana foi i aiga aua le aveesea le oneone e atili aia ai le gataifale. A o uiga ia o le tatou atunu, e le popole lava i ai aiga ia na pau lava le mea o le manatu faapito e le o manatu i se vaaiga lautele tai pei foi o le mea lea e tupu nei o le tau taofiofiga o le fagafuga, ma le maisu ma mamao.

O le mea lena e taga loa i le Malo, e le atoa le masina ua leai se mea. O le ala lena o lea ua faapena ai isi atunu o le Pasefika. O le ala lena o lea e tapu ai e le Kabeneta figota nei o le sami, tuu pea a tatou mea e taumamafa ai le atunu i le lumanai, a tatou fanau. A o mea ia e oo lava i le maisu e i ai le ituaiga kuka e kuka ai le maisu, e vela mai, e matua manaia lava i le taumafa. O mea la ia e tai pei o le oneone, o le tagata ia ma lona natura e manatu faapito lava mo ia po o le aiga, a o le Malo e tele lana vaai i le lumanai, e fanau mai ma soifua mai a tatou fanau o la e i ai pea mea e mafai ona faatino ai lo latou soifua i le agai atu i le lumanai. E pei foi la o le puipuiga lea ua i ai nei measina a Samoa ona e mamao le aafiaga, aafia a tatou fanau e le i fananau mai, le latou aiatatau i eleele faapea foi ma suafa. Ia puipui ma aiatatau a tatou aiga uma lava, gafa o aiga o lo o salalau i le lalolagi, e i ai le tausaga e omai ai a latou fanau ma fanau a fanau ae i ai se eleele ma ni suafa e faasino i ai o latou tagata. O le uiga, o le mataupu lena e lafo mai pea i le Malo.

E i ai isi tulaga ia na aumai e tai pei foi o le faapopolega i tamaitai. E taua le manatu foi na aumai. O au ia, I play the devil's advocate, ou te tulai atu ai ma lui, challenge le sui usufono e tulai mai, ae le faapea la o le a challenge atu ona nofonofa ai lea. E mafai lava ona ave le mataupu lea i o e toe tilotilo i ai le Komiti lenei pe afai e malosi pea, a o lea lava ua uma ona ou talanoa atu, o lea lava e faatafagaloa i le agai i luga le aofai o Tina e fia ofi mai i totonus o le Palemene.

18 MATI 2020

Tulafono Tau Faaofi o Teuteuga o le Faavae 2020
– faitauga faalua

O le tulaga i tausaga o Faamasino, e taua foi le taofi na aumai, e faapea foi ma le tulaga i Loia ma tatou Faamasino, o mataupu uma na o lea o le a silasila i ai le tatou Komiti. E i ai le mataupu lea sa laga, pe tatau ona toe tolopo le faiga palota. Masalo a oo atu i ai ua matua tele le pisia ma le mamai o tagata, masalo e leai lava se ituaiga potopotoga e le oo i ai se faiiuga, ae aoga le faatupu manatu.

Ia, e pei o mataupu na lea sa laga ina ne i le tali atu ona faapea lea ua alo i le ata o le niu le Malo, le Kapaneta faapea foi lenei Itu o le tatou Maota. Ae ou te faamalo tele atu i le faatupu manatu i lenei taeao i le tatou Maota nei, ma a talanoa loa i le Faavae, o le Faavae e fua uma i ai tatou Tulafono, ma o lea foi e manino lava saunoaga i le taeao nei, manino foi i lalo o le fefaaaliga o manatu na faia i le Fono i le tausaga e 1960, le Fono lea o le Faavae, manino ai i saunoaga a Taitai o Samoa e taitoatolu, taitoafa tupu ma ee o Samoa mai nuu taitoatasi, itumalo taitasi sa nopiai ai i le fonotaga lea ma faaali o latou manatu, ma o le tulaga lena o lea sa faaalia. O aiaiga ua tuu i totonu o le Faavae i le taimi lenei, e aoga mo le taimi lea, a o nisi mataupu e tulai mai i le lumanai e pei la o le mataupu lea sa saunoa i ai le Taitaifono, le Tamaitai Taitaifono o le Komiti o Tupe a le tatou Malo, o lea na anticipate e le Fono Faavae nisi Teuteuga e tatau ai fai e latou o faipule o le Maota i le lumanai.

O lona uiga, o lea lava na silafia e Taitai o le Faavae, e tatau ona toe teuteu le tulaga lea i le Faamasinoga o Fanua ma Suafa ina ia taoto i lagatonu le mataupu lea ona o le tele o le lavelave na faasolo mai ai lenei mataupu mai le taimi o pulega faa-kolone o le tatou atunu.

Lau Afioga i le Fofoga Fetalai, o le tali atu lena a le Malo e tusa ai o finagalo sa faaalia.

FOFOGA FETALAI: Malo faafetai.

Na faamaonia le lafo ma faitauina le Tulafono Tau Faaofi o Teuteuga o le Faavae 2020 i lona faitauga faalua.

FOFOGA FETALAI: Ia, ou te tapa lau Afioga i le Palemia mo se lafo.

18 MATI 2020

**LAFO MO LE TOFIA O LE KOMITI FAAPITOA FAA-
PALEMENE**

Susuga Hon TUILAEPA AUELUA FATIALOFA LUPESOLIAI LOLOFIETELE NEIOTI AIONO GALUMALEMANA Dr. SAILELE MALIELEGAOI: Lau Afioga i le Fofoga Fetalai, ou te tulai atu ma le ava tele ou te faatu ai lafo nei e lua. O le lafo muamua, *Ia faataatiaese le Tulafono Tumau e ono noatia ai le tofia o se Komiti Faapitoa Faa-Palemene e iloiloina Tulafono Tau Faaofi nei e patino i le Faamasinoga, o lona uiga e aofia ai le Tulafono lea ma le isi Tulafono lea e mulimuli mai.*

O le lafo lona lua, *Ia tofia sui usufono nei o lea Komiti Faapitoa: Gatoloaifaana Amataga Alesana Gidlow – Taitafono, Namulaunu Leota Sami Leota – Sui Taitafono, Sulamanaia Fetaiai Tauiliili Tuivasa – sui, Faaulusau Rosa Duffy Stowers – sui, Fuimaono Teo Samuelu Teo – sui, Leaana Ronnie Posini – sui, Ili Setefano Taateo Tafili – sui.*

Lau Afioga, o lafo na e lua ua tuuina atu.

Faaluaina e le Minisita mo Pisinisi, Alamanua ma Leipa ma le Minisita mo Tina ma Tamaitai, Atinae o Nuu ma Afioaga ma Agafesootai.

Na faamaonia le lafo.

**TULAFONO TAU FAAOFI O TULAFONO O LE FAAMASINOGA
O SOLIGATULAFONO 2020 – faitauga faalua**

FOFOGA FETALAI: Ou te tapa lau Afioga i le Minisita o Faamasinoga o lea lava e lava ia le tatou taimi.

Afioga Hon FAAOLESA KATOPAU T AINUU: Lau Afioga i le Fofoga Fetalai ou te faatu le lafo, *Ina ia faitauina nei le Tulafono Tau Faaofi o le Faamasinoga o Soligatulafono 2020 i lona faitauga faalua ma ou te fia tautala faamalamalama i ai.*

Na faaluaina le lafo e le Minisita mo Aoga Taaloga ma Aganuu ma le Minisita o Tupu.

FOFOGA FETALAI: Saunoa lau Afioga o lea e lava le taimi.

18 MATI 2020

**Tulafono Tau Faaofi o Tulafono o le Faamasinoga o Soligatulafono
2020 – faitauga faalua**

Afioga Hon FAAOLESA KATOPAU T AINUU: Lau Afioga i le Fofoga Fetalai o le auga o le Tulafono Tau Faaofi lenei o le tapenaga o le Teuteuga o le Tulafono o Faamasinoga o Soligatulafono i le 1961.

O le tasi lenei o Tulafono tuai sa tusia ae le i tutoatasi Samoa ma sa tapena faatasi e lagolago i le Fono Faavae o Samoa 1960. Sa tusia lenei Tulafono e faataatia ai e faatuina o le Faamasinoga Maualuga o le Faamasinoga o Apili, e sui ai le Tulafono sa i ai. O le tele o vaega o lenei Tulafono tuai, sa atagia ai foi faamaumauga ua uma ona aafia i lalo o le Tulafono Faavae 1960. E matauina ua tele le suiga o le olaga, o metotia sa i ai le amiotonu aemaise auala faa-tekonolosi ua talafeauga le taimi e toe timata ai le upega, mo lenei Tulafono ua leva, ona o le galuega sa faatinoina a ua sui ai ni isi vaega o le Tulafono Faavae, ua alagatatau ai loa ona fai ni suiga talafeagai e teuteu ai ia lenei Tulafono tuai, ma ua maua ai foi le avanoa e faataoto manino ai na o Tulafono ma le faagaioiga o taualumaga o le Faamasinoga o Soligatulafono o Faamasinoga mo Apili i lalo o Tulafono Tau Faaofi.

O nai teuteuga o le Tulafono o Soligatulafono o le 1961 ua avea ma Tulafono Tau Faaofi o le Soligatulafono 2020.

1. Aofai o Faatapulaa mo Faamasinoga Apili i mataupu tau aitalafu a tagata ma Kamupani (civil appeal). Ua siiitia le aofai o se claim, e mafai ai ona agavaa mo se apili, mai i le \$300 i le \$3,000.
2. Mataupu faamaumau faalua i lalo o le Tulafono tuai ma le Faavae. Ua aveeseina uma vaega tau Faamasinoga Malosiaga ma le faatulagaina o Faamasinoga Maualuga, o Faamasinoga tau Itumalo sa i lalo o le Tulafono tuai, ae tuuina i lalo o le Tulafono Faavae.
3. O ni isi o suiga iloga o mataupu sa i lalo o le Tulafono tuai 1961 ae ua tuu i lalo o le Faavae.
 - (i) Ia tofia se Faamasino Taitai mo le Faamasinoga Maualuga Supreme Court e taua o le Senior Supreme Judge, e fesoasoani tele mo le faagaioiga o galuega a faamasino e pei foi o le Senior District Judge.
 - (ii) Laulau o le Faamasinoga, Faamasino o le Faamasinoga Apili, ua fautuaina le tofia o Faamasino malolo litaea Samoa mai i le Faamasinoga Maualuga e avea ma faamasino e iloiloina mataupu o Faamasinoga Apili. O le localisation lea o le Panel o le Court of Appeal.

18 MATI 2020

**Tulafono Tau Faaofi o Tulafono o le Faamasinoga o Soligatulafono
2020 – faitauga faalua.**

(iii) O le suiga o le faataatiaga o le Komisi o Galuega a le Faamasinoga e sui ai le Peresetene o Fanua ma Suafa ona o lea o le a aumai i le Tulafono o Fanua ma Suafa.O lea o le a see le Peresetene i le Komisi o Galuega o Fanua ma Suafa, o le a avanoa ai loa ia le isi toa 5 o lea e i ai nei i le Komisi o Galuega o Faamasinoga, o lea la ua tatau ai ona fautuaina e faasee e appoint i ai se isi sui.

Lau Afioga i le Fofoga Fetalai o se faamatalaga puupuu lea i suiga ia o lo o taumafai mo le Tulafono lenei. O lea foi sa tatou faatasi ma sui usufono mamalu i le tatou semina faalauiola lea ma avatu ai le folasaga lava lea e tasi.

O lea ua manino ma ou te iloa e le toe i ai se isi e fia fesili, ia ma le faaaloalo lava.

FOFOGA FETALAI: Ia malo faafetai. Ia o lena ua saunoa faamalamalama le Minisita, ae e i ai ni sui usufono e... ia o le a faapena ona maua avanoa pe a tatou taliu mai i le tatou malologa masani. Ou te faamalulu atu i sui usufono mamalu, ae afai foi e maua avanoa ia, fesili ifo i tua ae tatou te le i omai.

Ia o le a faataatiae galuega a le Fono Aoao Faitulafono mo lana malologa masani.

Na faataatiae Taualumaga a le Fono Aoao Faitulafono mo lana malologa masani i le itula e 10:46 i le taeao ma toe faaaauau i le itula e 11:40 i le taeao.

FOFOGA FETALAI: Ou te faasilasila atu ua toe amatalia Taualumaga ma Galuega a le Fono Aoao Faitulafono.

E faia le malologa ua maea ona saunoa faamalamalama le Minisita o Faamasinoga e tusa ai o le Tulafono Tau Faaofi o le Soligatulafono 2020. Ia, ma ua avanoa foi le Palemene, pe i ai se isi e fia saunoa e tusa ai ma lenei mataupu ua maea foi ona tatou faamalamalama.

Ia tulai maia le sui usufono mo Faleata Sisifo.

18 MATI 2020

**Tulafono Tau Faaofi o Tulafono o le Faamasinoga o Soligatulafono
2020 – faitauga faalua**

Tofa LEALAILEPULE RIMONI AIAFI (Faleata i Sisifo): E momoli atu le faafetai i lau Afioga i le Fofoga Fatalai mo le avanoa. Faafetai foi i le mamalu o le Matagaluega mo le malu taeao. Ia faatoa lelei lava lea o sa ta inuti pe a fai tatou Fono. Faafetai ua maua le faasiligamalosi aua le faaauauina o le tatou galuega.

Ae tusa ai o le Tulafono ua faataatia, e momoli le faafetai i le Afioga i le Minisita ma le Matagaluega e tusa ai ma le tapenaga o lenei Tulafono aua le faafaigofieina ma le siitia o le auaunaga. So o se Tulafono lava e tatou te faia e pei ona ou taua pea, e tasi lava le auga e ala ai ona sui le Tulafono, ona ua i ai ia se mafuaaga tatau. O lea mafuaaga tatau, ua manaomia le siitia, faaleleia atili, faaleleia faifaipea o le auaunaga mo tagata lautele, aemaise lava i le tulaga o Faamasinoga.

E le o po se lilo lau Afioga, i le tulaga o lo o i ai nai lapse, i le faatinoina o Faamasinoga i lenei vaitau, ma lau matau i le faasologa o lenei tausaga. Sa i ai le manatu, o le Tulafono lea ua tuuina mai nei, o le a mafai ona faatino ai pe fai ai ni suiga mo lea vaega.

Muamua, upu foi lea e fai soo e tagata “Justice delayed is justice denied” i le tuu umi o Faamsinoga. Ou te talitonu, ua tatau ma talafeagai, ona faia ia se Tulafono faapitoa o le vaega lea. A matau i ai lau Afioga, o lenei vaitau ua tele le siitiaga o mea e faatino ai galuega. E le gata ua faatupulaia ia le tele o tama fanau e o mai ma le poto faapitoa i mataupu tau Tulafono, ua tele taavale, o le mea o le IT mo le information technology lea ua faaaoga, ua matua tele mea ua siitia ai le auaunaga ma faatelevave le faiga o faaiuga ma mea fai a lea e tumau lava e pei e alu i tua.

I lou la talitonuga lau Afioga, ua tatau ona faia ia se Tulafono, ina ia ave ia se taimi faatapulaa i faamasino, o Faamasinoga Maualuga ma Faamasinoga Soligatulafono ia fai ai ia latou faaiuga. A faatali se faaiuga i se 12 masina, o se mea e le talafeagai ma le amiotonu. Pe 6 masina foi, ua matua tuai tele.

Manatua lau Afioga, o lea ua tele ia loia ia ua iu mai, e mafai ona faaaoga e faamasino e o atu e fesoasoani i a latou faaiuga fai. O e fai research, o e suesue mai ma tilotilo i faaiuga talafeagai e tusa ai o soligatulafono, e oo i le taimi e fai ai ia faaiuga a faamasino, ua tele ia le galuega ua uma ona faatino e i latou nei.

18 MATI 2020

**Tulafono Tau Faaofi o Tulafono o le Faamsinoga o Soligatulafono
2020 – faitauga faalua**

O lea lava e tuufesili ia le Malo, o lava mea e fai ai ia tou galuega? Ma o tausaga uma, o Tala o Tupe a le Malo, o mea ia e ave i ai ia faamuamua a Matagaluega, o mea ua moomia aua le faaleleia o auauunaga. Ou te talitonu, ua tatau ona i ai se suiga i lenei vaitaimi. Ua tatau ona i ai se tapulaa. A 3 masina, ua talafeagai, pe 2 foi masina, ave i ai i faamasino e tapena mai ai faaiuga o faamsinoga. O ni isi aiga, e maliliu lava i latou e ana faamsinoga e le i faia faaiuga. O le vaega muamua lea lau Afioga e tatau ona faatino, ma e tatau ona fai i ai se fuafuaga.

O le isi vaega, e i ai ia mataupu ia lea e tutupu mai i lenei vaitau, e tatau ona ave i ai se faamuamua. E tatau ona i ai ia se latou faatulagaina o mataupu ogaoga, aemaise lava i mataupu o lo o tele ia le public interest. O lo o mataitu e tagata, e pei o le case lea e i ai nei i ai latou ia e foufou e tagatavaleina ia le Palemia ma tulaga faapena i tagata o le Malo. E tatau ona ave se faamuamua i le vaega nei lau Afioga, ua matua... e uma le aso lea ou vaai i le pepa lea e pue mai ai le ata o le tama lea na toe bail i tua, lea e tu mai i luma ma ona foliga, e tu faalepopoi le mafaufau i luma o le pepa. E uma le aso ou te le moe i nei ituaiga uiga le mafaufau le talafeagai lea ua oo i ai ia lo tatou atunu.

E tatau la i le Faamsinoga ona ave se faamuamua i ituaiga mea nei. E le gata i le puipuiga o tagata o le Malo ae o le puipuiga foi o latou nei e faia nei faalavelave. Aua o Samoa o lena e te silafia, e aiga tagata uma. Ae e le o avea i ai se faamamafa, o le fautuaga la, e tatau ona atagia i Tulafono nei ia suiga ia ua aumai, o suiga talafeagai, e ala la ona sui ia Tulafono, ona e mai i lea taimi i lea taimi, o talafeagai ma tatau, e tutusa ai ma tu ma aga, ma mea o tutupu mai i lea vaitau.

Ia ae momoli le faafetai i le Afioga i le Minisita e tusa ai ma le localisation. O le mea lea ua taumafai e ave le faamuamua ma le faataua i o tatou lava tagata ua i ai le tomai ma le agavaa, aemaise i le Court of Appeal, ia o vaega taua ia, ma o vaega ia e atagia ai e pei ona ou talanoa atu, o lea ua sii sii i luga ia tagata foi mai, ma tagata ua i ai le tomai, i lo tatou atunu, e faatino ai lava e tatou ia tatou galuega, seivagana ua manaomia ia ni poto faapitoa, ia e avanoa lava le aumai o tagata mai i fafo e fesoasoani. Ae o le tuualalo lea i lau Afioga i le Minisita ma le tatou Matagaluega e manaia se suiga o le Tulafono lea, ae e le i uma ia lenei Paeaiga, ma le faaaloalo lava faafetai.

18 MATI 2020

Lafo mo le Suia o Itula Fono

FOFOGA FETALAI: Malo faafetai, talu ai e matau atu e i ai ni isi o sui usufono o lo o tulai mai, e faapea e toaitiiti ae e lelei ona faataoto pea ia se finagalo o le Malo i le tulaga o le taimi o le tatou galuega, ina ia utagia e sui usufono mamalu, ia le tatou galuega ma le taimi e fuafua e tatou te manava ai i le aso lenei. Ae se i tuu mai pea ia se finagalo o le Malo e ala i se lafo e faatuina mai e le Taitai o le Maota.

Tapa ma le faaaloalo lau Afioga i le Palemia.

LAFO MO LE SUIA O ITULA FONO.

Susuga Hon TUILAEPA AUELUA FATIALOFA LUPESOLIAI LOLOFIETELE NEIOTI AIONO GALUMALEMANA Dr. SAILELE MALIELEGAOI: Lau Afioga i le Fofoga Fetalai faapea foi ia le paia o le Maota nei, ona e taua tele ia isi Tulafono ia e mulimuli mai, ou te tulai atu ai ma le faaaloalo faatu le lafo, *Mo le suia o Itula Fono, e faapea, ia faaaauau Taualumaga a le Fono Aoao seia oo lava ina maea ona faitau faalua Tulafono o lo o faagasolo nei, ma iloilo auiliili ma faitau faatolu Tulafono o i totonu o le Pepa o Galuega ua faataatia mo le aso ona tolopo ai lea o le Fono Aoao. O lona uiga o le a lava le itula o lenei aso e manaomia e faaiu i ai ia tatou Tulafono ua taoto nei i le tatou Polokalame i le aso, ina ia faaaauau pea ona faatino le tatou galuega seia maea ia ona tatou malolo ai lea.*

O le lafo lea ma le agaga faaaloalo.

Faaluaina e le Minisita o Galuega, Felauaiga ma Atinae Eseese ma le Minisita o Pisinisi, Alamanuia ma Leipa.

FOFOGA FETALAI: O le lafo, e faaaauau ia le tatou galuega seia maea ia le tatou galuega, e faaaauau ia le tatou Fonotaga, seia maea galuega o lo o i totonu o Pepa o Galuega o le aso. O le a lava le taimi, ona faatoa faamaea lea ma manava ia le tatou galuega.

Na faamaonia le lafo.

FOFOGA FETALAI: Ou te fautua atu i le sui usufono mamalu, aumai na o mea aanoa e tai pei o le sui usufono o Faleata lea faatoa uma atu nei. Aumai na o mea aanoa e vave ai le tatou galuega.

Ou te tapa le sui usufono mo Salega Sasae.

18 MATI 2020

**Tulafono Tau Faaofi o Tulafono o le Faamasinoga o Soligatulafono
2020 – faitauga faalua**

Tofa OLO FITI AFOA VAAI: Faafetai, faafetai i lau Afioga i le Fofoga Fetalai ua maua so matou avanoa. E le umi foi ia... e na o nai mea ia na misi i le talanoaina o le suiga o le Faavae, o le a faapuupuu atu ai ia se mea sa pau ia matou, o le matou lauga. E pei na pau lava si vaega e pei o lau tilotilo atu i le Tulafono, pe o le a se finagalo o le tatou Malo, aemaise le Afioga i le Minisita, ae faatulaga mai le taimi e avanoa ai le Nofoa, po o le avanoa o le Peresetene i lana galuega e faatino ai le galuega, ona o le tulaga lea e i ai i le tatou Faavae ma le aumaiga o le Tulafono lea o le Faavae, e fai i lalo i se finagalo o le Ao mamalu o le Malo, i lalo o se fautuaga a le Palemia. E le o tutoatasia ia le...

Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoi: Lau Afioga i le FofogaFetalai, e sese ia le Tulafono lea e tulai mai ai le sui usufono. O lea e tatou te talanoa i le Tulafono o Soligatulafono.

E pau lava le mea lau Afioga i lalo o le vaega 24 vaega 3, ua uma le talanoaina o le Faavae. Ao Faamasinoga o Soligatulafono lea e tatou te talanoaina.

O le mataupu lea sa saunoa i ai le sui usufono o Faleata e taua tele, i le tulaga lea o mea nei o galuega faale-Faamasinoga. E tatau ona silafia e le Faamasinoga mea taua e ave i ai le faataua, ona ave lea i ai le faamuamua. E le gata i lea, o le mea lea o le umi ona faatali. E i ai isi Faamasinoga ua ova ma le 20 tausaga o faatali iuga. Ae ua leva ona feoti tagata sa faamasinoina. Ua ta lelava foi i le aumai soo o tusi a loia ia te au, pe i ai sau fesoasoani e faamalosia ai le Faamasinoga e aumaia faaiuga ua toeitiiti feoti uma tagata.

O le culture la o lea e i ai nei e tatau ona sui. Ma e sao ai le mataupu lea na laga e le sui usufono, ae o lea ou te vaai atu i le vaega 24, (3) ia galuega e tatau ona fai e le Judicial Service Commission, Komisi lea e feagai ma le faataatiaga o faatinoga o galuega, e mafai ona faatino ai i i, ia le faagasologa o galuega, ma faatulaga ai ia le umi e faatali ai ia faaiuga o Faamasinoga. E sao le mea lea o le faatali i le 12 masina e tusia ai se faaiuga ua matua tuai tele. E atagia ai le vaivai o Faamasino o i ai nei. O le mau lea sa talanoa mai ai le sui usufono o Faleata Sasae, o le ‘Justice delayed is Justice denied’. O se taiala lelei. O le umi o faatali ia faaiuga, ua atagia ai o lo o fesoasoani foi le faamasino i le faatupuina o le le amiotonu.

18 MATI 2020

**Tulafono Tau Faaofi o Tulafono o le Faamasinoga o Soligatulafono
2020 – faitauga faalua**

O le tulaga la lena o faamasino o latou e fesoasoani i le faia o iuga amiotonu. Ae e le o le fesoasoani atili e faatupu ia le le amiotonu, i le tulaga o le tuai ona faatino le tusi o latou faaiuga, ia ma iu ai ina toe fai ai isi faamasinoga faalua faatolu, faafia ona fai, ia ma faatali lava i iuga e le i tusia. Ae o lea foi o manatu e talanoa pea i ai latou ua tuanai, afai e le lava faamasino, tau mai, ae aumai ni faamasino mai fafo, e faia faamasinoga. O lea e nofo sauni le Malo e fai le fesoasoani. O le faamaoniga o lena mea, o lea na avatu nei isi foi talosaga, e le i mamao atu, e 1 ae uma ifo ua 7 faamasino na pasia mai e le tatou Kapaneta.

O le vaega lona lua lau Afioga i le Fofoga Fetalai, o le tulaga lea i mo mea o Faamasinoga Apili. O Faamasinoga Apili, talu mai ona tutoatasi, sa aumai papalagi mai fafo e le malamalamama i tu ma aganuu a Samoa e faia, e fai apili. O lea la ua taoto mai i le Tulafono lenei, o le a fai lava ia le tatou Faamasinoga o Talosaga, o lea ou te talanoa atu i solitulafono. O le a fai lava tatou e faaaoga i ai ia tatou faamasino litaea, ma ua toatele latou ua i ai nei. Ia ae i le tatou lava Faamasinoga o Apili e aumai na o se toatasi mai fafo ina ia i ai foi se isi leo e ese e faalelei atili ai se faaiuga.

O le isi lenei taeao e pei ona faatulai mai, o le fai o le tatou lava Faamasinoga o Talosaga, na i lo le faatalitali pea i papalagi ia mai fafo e fai, ae o lea ua i ai le tomai o tatou tagata e malamalamama i le tatou tu ma agaifanua. O le ala foi lena o lea sa pisa soo ai, i mea nei o faamasinoga pe a uma ia faiga palota, ma fesiliglia ai ni isi o uiga e fai e matai i totonu o nuu, ma fesiliglia ma taua ai o mea corrupt po o ni faiga le amiotonu, piopio. E tauvalea ai lea o le tatou atunu a o upu a faamasino e le malamalamama i a tatou tu ma agaifanua.

Lau Afioga i le Fofoga Fetalai, o le itu taua lena o le Tulafono lenei, lea na oo i ai le saunoaga a le sui usufono a Faleata Sasae ma o lea foi la e faatu aloaia ai ma lo tatou lava Faamasinoga o Talosaga ona e toatele ia tatou faamasino ua litaea e mafai ona auai, na i lo le faalagolago pea i faamasino mai fafo ma taugata ai le faatinoga o a tatou Faamasinoga.

Ia ma le vaega lona 3, ia o le isi lea mea e tatau ona tilotilo i ai ia Judicial Service Commission, faa-Samoa uma ia talanoaga e fai i totonu o le potu faamasino ae soia le fia fenanui. O le tatou tu ma le tatou aga lea ia fai foi e loia. E faapena foi i loia, o lona uiga e tilotilo latou i tusi Tulafono, i tulaga e tatau ona atagia ai ia tatou tu ma tatou agaifanua ia faatino i totonu o potu faamasino. O uiga mai fafo nei o lenei lava e tauave e loia nei a Faamasino pei ni atua o le a 60 Tausaga le Tutoatasi a o lenei lava e fai pea.

18 MATI 2020

**Tulafono Tau Faaofi o Tulafono o le Faamasinoga o Soligatulafono
2020 – faitauga faalua**

E i ai le Faamasinoga na valaaulia ai au sa ou molimau ai. Ia na ou alu atu lava lea fenanui mai loia ae faa-Samoa lava au. Ia na ou fai atu lea o lau upu i ai, ‘o le mea tonu lava lena, e faaigoa o le lape o upu’. Ou tilotilo atu i loia ia e tutu mai e toa 4, ua na ona pupulato’ a mai e le malamalamā i le uiga o le lape o upu. Ai faatoa faalogo lea i ai aua o le tele o nei mau loia e fai nei latou practice, o isi ua matai ae e le saofafai i fono a nuu. E faalogologo i ai i le faatofalaiga ma le tatalaina o le tofa teumau, i matai o le nuu e atamamai ai i aga faa-Samoa.

Lau Afioga i le Fofoga Fetalai, ua tatau foi ona faa-Samoa uma mea e fai i totonu o le Faamasinoga o Soligatulafono.

Lau Afioga i le Fofoga Fetalai, o le faaopoopo atu lena e taua tele ia le Tulafono lenei e pei ona tolaulauina e le Afioga i le Minisita o Faamasinoga.

FOFOGA FETALAI: Malo, ua manino lea vaega, faaiu mai le saunoaga a le sui usufono...

Tofa OLO FITI AFOA VAAI: Faafetai i lau Afioga, o le aitu lava o le moomu. E mafai lava e pei o le vaega lea sa saunoa...

Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoi: Lau Afioga i le Fofoga Fetalai, na ala ona ou talanoa atu, o i lea e talanoa ai i le Faamasino Sili. Ae e ta te le o talanoa i se Peresetene. O le Peresetene o le Faauluuluga o le tatou Faamasinoga o Fanua ma Suafa. Ae o le Faamasinoga o Soligatulafono lea tatou te talanoa ai, o le Faamasino Sili po o le Sui Faamasino Sili.

Lau Afioga i le Fofoga Fetalai, o le ala lena na ou tulai atu ai ua fai si ou televave, ae e le o talafeagai ia le mea lea sa e saunoa mai ai.

Tofa OLO FITI AFOA VAAI: Faafetai, ia o le a ou alu atu i le Faamasino Sili. Na pau lava si vaega lea lau Afioga i le Fofoga Fetalai, e tatau ona manino mai i le Tulafono, ina ia atagia ai le tutoatasi o le Faamasinoga. O lea sa ou tatalo atu ai i le tulaga, ia faatulaga mai ia se taimi e avanoa ai ia le Nofoa o le Faamasino Sili.

18 MATI 2020

**Tulafono Tau Faaofi o Tulafono o le Faamasinoga o Soligatulafono
2020 – faitauga faalua**

O le mea lea e i ai i le taimi lenei, e faalagolago i le tofiga a le Ao mamalu o le Malo, i lalo o le fautuaga a le Palemia. Afai lava la e le fautua le Palemia i le Ao o le Malo, ia e tuai foi la ona tofi ia se tatou Faamasino Sili. Ae o se tulaga i le vaai i totonu o so o se atunu temokarasi, e tatau ona saofai ia le Faamasino Sili i lona Nofoa, e foia ai foi ia faafitauli ia na vevesi mai ai foi ia le sui usufono o Faleata, i le le faia o faaiuga a faamasino i matapu a le atunu.

O le mea lena o lea ou te tatalo atu ai i le Afioga i le Palemia ma le Malo...

Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoi: Lau Afioga i le Fofoga Fetalai, ona o lea ua agai ia le sui usufono i le tulaga lena, e manatua foi o tofiga uma e mai i le Atua. E tatou te faalagolago i le musumusuga lilo. A oo loa i le taimi e aumai ai le musumusuga lilo, ona faatoa faatino loa lea. O le atunu lenei e faavae i le Atua. A! Ua galo ia te oe e faavae i le Atua le Malo o Samoa.

Lau Afioga i le Fofoga Fetalai, e leai se mea e televave ai. Ua silafia uma e uma le tofiga seiloga e oo i lou 68 tausaga ona litaea lea. A sasi loa la i i, ia o lona uiga la, o tausaga uma lava na tatou te faafeagai ai ma faaletonu. O le mea lea e matua faaeteete i mea faapenei. E oo loa i mea e saili ai le amiotonu, e tasi lava le mea e tatou te faalagolago i ai faalagolago i le Atua. E aumai ai le musumusuga, masalo toeitiiti lava oo mai. Aua le popole, o le mea lea o lea e tupu i le lalolagi lenei, e fai mai e faalagolago i le Atua ae toe o saili ua le lavā faatalitali - aua - onosai ma faatalitali.

FOFOGA FETALAI: Malo!

Tofa OLO FITI AFOA VAAI: Lau Afioga i le Fofoga Fetalai, ia o le tuualalo i le Afioga i le Palemia, soso i le Atua ina ia vave ona musumusu atu ia oe.

FOFOGA FETALAI: Ou te fautua atu i le sui usufono mamalu, o lou manatu foi... e tasi lea tiute o le Fofoga Fetalai, o le taofiofi ma faagasolo ma fautuaina ia sui usufono mamalu e tatou te galulue i le tatou galuega e sologa lelei ai ia felafolafoaiga o finagalo.

18 MATI 2020

**Tulafono Tau Faaofi o Tulafono o le Faamasinoga o Soligatulafono
2020 – faitauga faalua**

O lou lea finagalo ua faaali mai, o lea ua saunoa ia le Palemia, uma ai i i. E te le tulai mai e fai ia se faafinauga, aua foi e leai se feau a oe i ai. O oe ia o le sui usufono a le Palemene e aumai le fautuaga, taoto lea i le au fai faaiuga. O ai le faaiuga? O le Kapaneta ma le Palemia, o le uiga na o mea. E le faapea o le a fosi e ioe i lou finagalo. Se leai, e faapena. Afai e te le usitaia lau fautuaga, ia ua lava foi ia lau lauga leaga o lea...

Tofa OLO FITI AFOA VAAI: Ia o le a faauma atu. Na pau lava le mea e faamanatu atu i lau Afioga i le Fofoga Fatalai, e taiala lou sui usufono i Tulafono Tumau o le Maota. E i ai lou avanoa ou te fesiliglia ai le Palemia po o le Kapaneta atoa. O lea la ou te sosolo lava i le Tulafono, Tulafono o lau Afioga ma le Palemene. Ae e le faapea e leai sau feau. E i ai lau feau i lalo o le Tulafono Tumau a le Maota ma lou agaga faaaloalo.

FOFOGA FETALAI: Se i onosai mai. E i ai lou avanoa e te fesiliglia ai. So o se sui usufono e i ai lou avanoa, ae o le final say o le Kapaneta. Aua foi o latou lea e aumai ai le faaiuga o lou finagalo. O le a la le tonu? E fai e tatou le faaiuga pe lafo i le... leaga e eseese mea. O le mea lea e fai atu ai, aua tatou te feteenai, i a tatou faaaliga.

Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoi: O le mea e fia faasao, ona e sao lou finagalo i mataupu ia tatou te talanoaina. Ae o le faauigaina o le Tulafono Tumau, o lau Afioga i le Fofoga Fatalai o lo o i ai le pule. Ae o lea la o le pule o lo o ia te oe a o lea foi ua faaali le fiapoto o le sui e faauiga le tulafono. A saunoa le Afioga i le Fofoga Fatalai, ona o ta nofo loa lea i lalo. O lea foi la o le a ou nofo i lalo.

Tofa OLO FITI AFOA VAAI: Lau Afioga i le Fofoga Fatalai, e fiu mo le tiapolo e faaososooso, o oe o le Tiakono Toeaina o le Ekalesia. Ua vaai i le faaoloataua o mea ia. Sa tatau la ona e saunoa i le faaoloataua o lena e i lalo o le Tulafono Tumau. Ia ua uma le lauga, faafetai i lau Afioga.

FOFOGA FETALAI: Malo faafetai. Masalo toe pau lea o le saunoaga i lea mataupu.

Tulai mai le Taitaifono o le Komiti o Tupu, le sui usufono mo Alataua Sisifo.

18 MATI 2020

**Tulafono Tau Faaofi o Tulafono o le Faamasinoga o Soligatulafono
2020 – faitauga faalua**

Afioga ALIIMALEMANU ALOFA TUUAU: Lau Afioga i le Fofoga Fetalai, ia, o le a ou le tuliloaina le lauamanu ae o le a vaai le faamulioatu. Aua e taua i le Alataua Sisifo le faamulioatu. O le faamuli la lea o atu lea ua faataatia lelei le Tulafono aemaise o le tele o mataupu sa i totonu o le Tulafono lenei o Faamasinoga o Soligatulafono lea ua i totonu o le Faavae lea faatoa uma ona tatou talanoaina, pei ona i ai le tofiaina o Faamasino faapea le faavaeina o le Faamasinoga Sili po o le Supreme Court ae le gata foi i lea o alauni ma totogi. Ou te talitonu o le agaga tonu lea na ala ai ona toe aumai le Tulafono lenei e toe teuteu lea ona o lea ua i totonu uma o le Faavae tulaga ia, o lea ua pei o le saunoaga a lau Afioga i le Minisita, o lea ua taatia lelei mai ua le duplicate. Malie ua ou fiu e mafaufau le faa-Samoa o le duplicate, a o le agaga tonu lena.

O le itu taua o le talosaga toe iloilo i le mataupu tau le va o tagata lea e taua ai le suiga lea na saunoa i ai le Minisita, ona o lea ua siitia mai ai i le 400 i le 3000 le aoga o se mataupu e toe talosagaina e mafai ona toe iloilo, aua o le tulaga sa i ai, lea sa i le 400. O le ala lea o lou tulai atu, pei ona fai atu, e taua lava i le Alataua Sisifo le faamulioatu ma faamanino atili ai le mea ua lagolagoina ai e lenei itumalo le Tulafono Tau Faaofi o le Faamasinoga o Soligatulafono 2020. Faafetai mo le avanoa.

FOFOGA FETALAI: Malo faafetai. Ou te tapa le Minisita e te saunoa i mea sa laga e sui usufono pe afai o i ai se mea e te fia faamalamalamaina.

Afioga Hon FAAOLESA KATOPAU T. AINUU: Faafetai i lau Afioga i le Fofoga Fetalai. O mataupu sa sausaunoa i ai sui usufono ua maea ona tali i ai le Afioga i le Taitai o le Maota. O lea foi o lo o alaala mai i i le Resitala o Faamasinoga, o la e faamaumau atoa, aua le taimi e tali atu ai. Ae faafetai mo le matau mai a sui usufono mamalu i le Tulafono Tau Faaofi, a o lea foi e maua le avanoa i le Komiti e pei ona e saunoa. Ma le agaga faaaloalo.

FOFOGA FETALAI: Malo.

Na faamaonia le lafo ma faitauina le Tulafono Tau Faaofi o le Faamasinoga o Soligatulafono 2020 i lona faitauga faalua.

FOFOGA FETALAI: Ou te tapa lau Afioga i le Taitai o le Maota.

18 MATI 2020

Tulafono Tau Faaofi o Fanua ma Suafa 2020
– faitauga faalua

Susuga Hon TUILAEPA AUELUA FATIALOFA LUPESOLIAI LOLOFIELE NEIOTI AIONO GALUMALEMANA Dr. SAILELE MALIELEGAOI: Lau Afioga i le Fofoga Fatalai ou te faatu le lafo, *Ina ia tuuina atu le Tulafono Tau Faaofi o le Faamasinoga o Soligatulafono 2020 i le Komiti Faapitoa e pei ona tofia mo le iloiloina ma toe lipoti mai i le Fono Aoao i se Fonotaga talafeagai i le lumanaí.*

Faaluaina e le Minisita mo Fesootaiga, Faamatalaga ma Fesootaiga Vavave Faaneionapo ma le Minisita mo Aoga, Taalogma Aganuu.

Na faamaonia le lafo.

TULAFONO TAU FAAOFI O FANUA MA SUAFA 2020
– faitauga faalua

FOFOGA FETALAI: Ou te tapa ma le faaaloalo lau Afioga i le Minisita mo Faamasinoga ma Mataupu tau Faamasinoga.

Afioga Hon FAAOLESA KATOPAU T. AINUU: Lau Afioga i le Fofoga Fatalai ou te faatu le lafo, *Ina ia faitauina nei le Tulafono Tau Faaofi o Fanua ma Suafa 2020 i lona faitauga faalua ma ou te fia tautala faamalamalama i ai.*

Faaluaina e le Minisita mo Aoga, Taalogma Aganuu ma le Minisita mo Fesootaiga, Faamatalaga ma Fesootaiga Vavave Faaneionapo.

FOFOGA FETALAI: Ia saunoa faamalamalama lau Afioga i le Minisita.

Afioga Hon FAAOLESA KATOPAU T. AINUU: Lau Afioga i le Fofoga Fatalai ua taoto i lumamea le Tulafono Tau Faaofi 2020 i ona tulaga uma ma lona auiliiliga. Ua maea foi ona saunoa le Afioga i le Palemia i le aso ananafi, e ui pau le mataupu sa tulai atu ai lana Afioga o le suiga i le Faavae, ae sa tali uma fesili sa agai i le suiga o le Faavae faatasi ai ma le Tulafono Tau Faaofi lenei.

18 MATI 2020

Tulafono Tau Faaofi o Fanua ma Suafa 2020
– faitauga faalua

O le Tulafono Tau Faaofi lenei ua aumai e sui ai le Tulafono Tau Faaofi o Fanua ma Suafa 2019 e pei ona folasia i lumamea i le tausaga na tea nei 2019. Ua faia lenei faiga ona sa toe silasila totoa i ai le Kabeneta, aua e i ai vaega e le i atoatoa lona tapenaina, ma sa fautuaina e le Loia Sili e ao ona faatino ni suiga i le Faavae ona talafeauga lea ona faigofie ma faigofie le teuteuga o le Tulafono o Fanua ma Suafa. Ma o le ala lea na tuu mai ai lenei suiga, faatasi ma suiga talafeagai o le Faavae ina ia ogatusa le Tulafono ma le suiga o le Faavae.

E leai ni suiga ogoga pe a faatusatusa i le Tulafono o Fanua ma Suafa 2019, lea foi sa fai i ai lau lauga umi lava i le tausaga lea na tea nei. E pei ona faafogoga i ai i le tatou semina faalauiola i le Aso Gafua, o suiga taua tele ua toe aumai e le Tulafono o Fanua ma Suafa 2020, ma ua faapea foi ona aiaia i le suiga o le Faavae ua maea ona saunoa i ai le Afioga i le Palemia, muamua, o le tutoatasi ma le tumaoti o le Faamsinoga o Fanua ma Suafa. O lona uiga e le toe aiaina e Tulafono faa-Peretania le Tulafono o le Faamsinoga o Fanua ma Suafa. O le a mafai ona iloilo faaiuga traditional review i lalo o le Faamsinoga o Fanua ma Suafa, ae le toe faia i lalo o le Faamsinoga o Soligatulafono.

Lona tolu, o le Peresetene o le Faamsinoga o Fanua ma Suafa, o le faauluuluga tutoatasi lea o le Faamsinoga o Fanua ma Suafa.

Lona lua o teuteuga lau Afioga, ua amanaia ma puipuia tu ma agaifanua a Samoa i lalo o le Vaega 9 o le Faavae. Ma e na o le Faamsinoga o Fanua ma Suafa e agavaa i lalo o le suiga fou o le Faavae e suesueina nei mataupu.

O nei suiga e pei ona saunoa i ai le Afioga i le Palemia ananafi, e afua mai i le fautuaga a le Komiti Faapitoa a le Palestine sa filifilia i le tausaga e 2016 e suesueina galuega a le Faamsinoga o Fanua ma Suafa. O lona uiga, o suiga nei sa amatamea le Maota lenei. O lea la ua toe momoli mai, o le taunuuga o galuega a le Komiti Faapitoa mo se finagalo o le Maota ma le pasiaina o lenei Tulafono Tau Faaofi, o le taualuga lea o le galuega sa amata atu i le Maota lenei. Ma ua maea ona faatino fuafuaga uma e tusa ai ma le Tulafono i le faasologa o galuega e amata mai i le valaauna o le atunuu e aofia ai Loia, o Faamsino, aemaise sui usufono o le Maota lenei e afifio mai e faaali ni finagalo i lenei mataupu i luma o le Komiti. Na mulimuli ane tuufaatasia e le Komiti Faapitoa se Lipoti o le aotelega o nei molimau, ma e pei ona taua e se tasi o sui usufono i le aso ananafi, e 98% molimau latou te lagolagoina suiga nei.

18 MATI 2020

Tulafono Tau Faaofi o Fanua ma Suafa 2020
– faitauga faalua

Sa talia e le Kapaneta le Lipoti a le Komiti ma le finagalo faaalia o le atunuu, ma sa faatonuina loa le Loia Sili e amata tapena le tusiina o Tulafono e pei ona i ai le Tulafono o Fanua ma Suafa 2020 i le aso. O faagaoioiga lena e tusa ai ma le Tulafono.

O lenei galuega tele sa nafa ma le Komiti sa filifilia e le Kapaneta e aofia ai le Loia Sili, o le Komisi o le Toefuataiga o Tulafono ma le Matagaluega o Faamasinoga. E lima masina sa faagaoioia ai lenei galuega, ma o le Tulafono Tau Faaofi o le Faamasinoga o Fanua ma Suafa 2020, o le autu lea o le latou galuega. Ae pei ona lausilafia e le Maota, e faaopoopo i suiga ua uma ona taua i luga, o nisi nei o suiga e ao ona silafia.

Muamua, ua tolu fogafale po o levels o le Faamasinoga o Fanua ma Suafa lea ua tuu i totonu o le Tulafono Tau Faaofi lenei. O le level muamua, o le Faamasinoga, Uluai Suesuega. O le level lona lua, o le Faamasinoga Maualuga po o le High Court o Fanua ma Suafa. O le level lona tolu, o le Faamasinoga o Fanua ma Suafa, o Apili ma Iloiloga Faaiu.

Ua aiaia foi i le Tulafono Tau Faaofi lenei le faatuina o se Komisi o Auaunaga a le Faamasinoga o Fanua ma Suafa, lea e taitaia e le Afioga i le Peresetene faatasi ai ma ni sui usufono se toalua.

E i ai ni teuteuga laiti o lo o i totonu o le Tulafono Tau Faaofi, ae ou te manatu o le auga o aute i suiga ogaga o lenei Tulafono lena ua i lumamea. O le i ai lea o le malosiaga faaletulafono e suesue ai ma iloilo e le Faamasinoga o Fanua ma Suafa ma ave ai le faamuamua i tu ma aga a Samoa i lalo o le faamalumaluga o ana faiga faavae faaletulafono.

Lau Afioga i le Fofoga Fetalai, o tulaga aaoatetele ia o lenei Tulafono Tau Faaofi ua taoto nei i lumamea, o lo o manino mai ai le taumafai o le faatinoga o fautuaga uma sa tuu mai e le Komiti Faapitoa a le Palemene.

Ia faamanuia mai le Atua i le soalaupuleina o lenei Tulafono Tau Faaofi o Fanua ma Suafa 2020 ma ia fesoasoani mai Lona agaga paia i le felafolafoaiga a le Palemene i le aso. Soifua ma ia manuia.

FOFOGA FETALAI: Malo. Se i tulai mai le sui usufono mo Salega Sasae.

Tofa OLO FITI AFOA VAAI: Lau Afioga i le Fofoga Fetalai, e puupuu lava le fesili lau Afioga. O lau fesili lava i lau Afioga i le alii Minisita, pe mafai e le Tulafono fou lea ua i ai le faamasinoga foi lea e toe faia reviews o mataupu, e mafai e le faiga fou lea ona toe oo i mataupu ia ua uma ona fai iuga a aiga ia ua leva ona uma ona fai iuga.

18 MATI 2020

Tulafono Tau Faaofi o Fanua ma Suafa 2020
– faitauga faalua

Pe mafai la, o se faataitaiga o au; e mafai la ona ou alu atu e toe faaulu sau talosaga foi lele e toe review ai le mataupu lea ua leva ona taatia ua sefulu tausaga talu ai? Ma le faaaloalo.

Afioga Hon Faaolesa Katopau T. Ainuu: O lau tali atu lau Afioga i le Fofoga Fetalai, o lo o i ai i lalo i aiaiga o le Tulafono le avanoa e iloilo ai mataupu, e iloilo e le Peresetene ma lana panel le avanoa e toe iloilo ai ni faaiuga ua uma ona fai, ae le faapea o se mea foi lele ou te alu atu loa talosaga atu talia, e leai. O le faigata ia o le tulaga lena, e le se tulaga faigofie ona talia e le Peresetene ma issue le mea e tau o le certificate. E i ai le tauga o le certificate lena i totonusi o le Tulafono. Ae o le mea lena, e i ai laasaga e tatau ona faamalieina muamua e le itu talosaga ona mafai ai lea ona award e le Peresetene le certificate lea e toe iloilo ai faaiuga ua maea ona fai. Ou te fai atu ma lou faaaloalo.

Tofa OLO FITI AFOA VAAI: Lau Afioga malie lou finagalo, o lea ua oo mai ia te au le popole i le Tulafono lea pe a faapea o le a toe lagalaga mataupu ua uma ona fai iuga. Ae malie lau Afioga i le Minisita, se i toe faamalamalama mai po o a tulaga foi lele e mafai ona toe fai ai se talosaga.

Susuga Hon Tuilaepa Auelua Fatialofa Luplesoliai Lolofietele Neioti Aiono Galumalemana Dr. Sailele Malielegaoi: Lau Afioga i le Fofoga Fetalai, e pei lava e le o malamalamama le sui usufono i lana fesili. O lea ua tali atu le Minisita. O mataupu uma ia, e avanoa lava le toe talosaga pe toe iloilo lau talosaga, se iuga na fai i le 1800, ae faalagolago le talia i le tilotilo a latou, ae faatoa maua mai, e ese lava le... e lua mea, talia i le toe iloilo ma le teena ina ua uma ona fai le iloiloga e le talafeagai.

Lau Afioga i le Fofoga Fetalai, o lea o le a tatou talanoa galuega e fai e le i faia se mea, ma o lea foi e oo i o i le Komiti e latou te tilotilo i ai i mea ia, a o lea o le a talanoa mai i mea maoti, o mea lautetele ia e alu atu ai le Tulafono i le faatinoga o galuega. Aua o le mea lea e i ai nei, o la e i ai le avanoa e talia ai i le taimi nei. Ia, ona faatalitali lea e toe review, le mea foi lea e taua o le judicial review i le taimi nei faatali ai lava, faatali ai lava, o isi e 20, 30, 40, 50 tausaga o la e lava e faatali le judicial review.

18 MATI 2020

Tulafono Tau Faaofi o Fanua ma Suafa 2020
– faitauga faalua

Lau Afioga i le Fofoga Fetalai, e pei la e ese le tulaga lea ua fuafua e ono vave ai faaiuga i mea ia. O la e avanoa le taimi e toe oo ai i o mataupu i le Komiti ona toe tilotilo lea i ai faatoa toe sau mulimuli ai ina ua oo atu i ai tagata i o e toe faatalanoa le mea lea pe a alu i le Komiti.

FOFOGA FETALAI: Malo faafetai. Ia, atonu ai ua manino le vaisua lea.

Tofa OLO FITI AFOA VAAI: Lau Afioga i le Fofoga Fetalai o lea ua faafofoga mai lou itumalo, o le fesili lea na aumai ou te fesili ai. O lea ua faafofoga mai o lea ua saunoa manino le Palemia, e toe iloilo uma lava faaiuga ua leva na uma ona fai.

Susuga Hon Tuilaepa Auelua Fatialofa Luplesoliai Lolofietele Neioti Aiono Galumalemana Dr. Sailele Malielegaoi: Lau Afioga o lena e sese le sui. E ave lau talosaga pe mafai ona toe iloilo. O le mea lena o lea na tali atu ai o la e fai nei, ae o le faalavelave la o le mea lea e i ai nei, e te fiu lava e tatali tatali tatali, o lea la e i ai se taumafaiga ina ia ese mai se isi faiga fou. Leaga o la e i ai foi le faulaiga o mau talosaga i mea ia o soligatulafono. Ia manatua e lua mea, o soligatulafono ma faaiuga i o i le Faamasinoga o Fanua ma Suafa. E i ai le isi toeaina matua i totonu o le Malo, fai mai ia te au, se, o au se ua ou le malamalama. O la e fai mai le Tulafono e mafai ona toe iloilo lau mataupu i lalo o le Judicial Review Section o le Tulafono. Ae ou alu atu ae fai mai, faatali, ua ova ma le 30 tausaga o faatali. O le mea la lena o lea e agai i ai le Tulafono, o le taumafai ina ia vave ona fai faaiuga i le tulaga o le a tilotilo latou i auala eseese e mafai ona faatino ai mea ia.

Lau Afioga i le Fofoga Fetalai, o le tulaga lena, e le faapea o le a talia lau talosaga e toe iloilo ona faapea ai lava lea o le a sao lau mataupu. O la e i ai taiala e faatino ai foi e le Faamasinoga latou faaiuga. O lea o le a tatou suesueina le mataupu o mataupu e faapitoa i le Faamasinoga. O processes ia tatou te talanoa i ai.

FOFOGA FETALAI: Malo faafetai. Ia se i...

Susuga Hon Laauli Polataivao Leuatea: Lau Afioga i le Fofoga Fetalai, o se avanoa laitiiti lava...

18 MATI 2020

Tulafono Tau Faaofi o Fanua ma Suafa 2020
– faitauga faalua

FOFOGA FETALAI: Ia se i tulai mai le sui usufono mo Gagaifomauga Nu.3.

Susuga Hon LAAULI POLATAIVAO LEUATEA: Malie lau Afioga i le Minisita si tamai vaisua lava lea e uiga i le faiga o matai, se i silasila ane lava lau Afioga ona o lea ua aumai le fautuaga a le Malo e faatapulaa. Ou te tautala ma le faaaloalo, e i ai le isi ou aiga i Falelatai, malie lou aiga i le tauga o le mataupu lenei, ona o lea ua tagofia, o tatou sa tagofia le mataupu lea. O le faatinoga o le Suafa Anae i Falelatai lau Afioga, e 35 tausaga o fai finauga a le aiga. Ua alu alu la finauga, ua leai ma ni matai o le aiga, a ua tupu le nuu i totonusi o le 35 tausaga. E silafia foi o le falefa lea i uta, tulou lava le nuu, ia Sila ma Misa ma Nanai, a o le suafa Anae ua matua leai ma ni tagata. Ona uma lea ua soalaupule ua teu le aiga, o le mea lena sa fai, ua fai nei, ua tai 400 matai o nuu uma talu le... o isi matai ia o le nuu, e tai 400 tai 500 matai o suafa ia, a o le Anae, tulou le matou aiga, ua leai se mea. O lea na filifili ai, fai le 200 matai, ma sa ou matai ai foi ma au. O mea ia e tau fetuunai ai le mafaufau leaga e i ai mea e tutupu i le olaga. Ua matua leai lava se Anae e vaaia le nuu, na mafua ai ona talo le aiga potopoto, omai e matua fai ni matai e faapaleni ai le nuu.

O le ala lea lau Afioga i le Minisita, na ona e seu silasila, leaga ou te talitonu o i tonu lava na faatupu manatu i le Malo, ua ova tele, a o le suafa o le faatumutumuga o le nuu, ae na ona ou tautaulemau lau Afioga i le Minisita, se i e silasila ane leaga e i ai mafuaaga o mea e tutupu. O ni isi foi taimi, ou te le tau fai atu i filiga a le atunu, na tofi oe a o e i le manava, manava o lou tina. E faapena filifiliga a le atunu e le fili i se matua po o se laitiiti ae na ona faatafatafa i lau Afioga.

O le isi mea, o le mea lenei o le tausaga e matai ai le tagata, leaga tasi lenei mea sa tatou feteenai ai foi i le Tulafono foi lenei o Faiga Palota, seiloga e te matai ona e alu lea i o i le itumalo e te entitle i ai. Peitai, e 25 tausaga lea e i ai i le taimi lenei, a o lea ua 21 tausaga o lou afafine, ae le mafai ona alu e palota ia te au i Savaii ona seiloga e aulia lona 25 tausaga. Ua poloka ai le aiatatau a le tagata o la e fia alu i le mea e fia alu i ai, ona seiloga e 25 tausaga faatoa matai. Silasila ane lau Afioga i le Minisita, leaga o i sa ou taua e taotaomia ai le aiatatau a le tagata e fia alu i lona faasinomaga.

18 MATI 2020

Tulafono Tau Faaofi o Fanua ma Suafa 2020
– faitauga faalua

O nai manatu na e na ona tuu atu i ou tafatafa, a o le Tulafono e tatau ona fai, e leai se isi mea tatou te agai i ai i le tulaga. Pau lava lea afai ua i ai le folasaga, finagalo ma le atoaga a le Ofisa o Faamasinoga ma le Matagaluega, o latou na e administer ina le Tulafono, o latou foi e mulimuli i ai, aua e leai se aoga e faufau ai e tatou le aufaipolokiki, ae tatou te le saofafai e administer le Tulafono. Ae afai ua i ai le maliega atoa a le Komiti, Faamasino, o ai uma tagata, o le Tulafono lea e tatau ona fai, o le atoaga lena. Ne i te i foi ua fai fai atu e tatou ae avatu e le talafeauga ma le faatinoga o le latou galuega. Ma lou agaga faaaloalo.

Tofa Nafoitoa Talaimanu Keti (Gagaemauga Nu.3): Lau Afioga i le Fofoga Fetalai, e fia maua se avanoa.

FOFOGA FETALAI: Tulai mai, masalo toe pau lea o le avanoa o le Afioga i le Sui Fofoga Fetalai.

Tofa NAFOITOA TALAIMANU KETI: Faafetai mo le avanoa i lau Afioga i le Fofoga Fetalai. E puupuu lava se fesili i lau Afioga i le Minisita e ana le Tulafono Tau Faaofi. Leaga o lea ua see ese ma le mataupu lea i le Peresetene e iloiloina talosaga. Application for leave to review cases twice. O le agaga lea e tau avatu ai se fesoasoani, a sao au, pei uma lava na o le Peresetene lena e faatinoa le galuega lena, ae o le fautuaga, o lea sa e saunoa i le panel, pe mafai ona taua po o ai le panel. O le finagalo o lenei itumalo, e tatau ona i ai ma ni tagata e fesoasoani i le Peresetene i le iloiloina o talosaga ia ma merits e consider ai leaga e le faigofie le mea lea. E le tatau la ona faia na o le Peresetene, a o lea ou te vaai atu pei o le agaga lena o lea e taoto mai ai. A o le tuualalo lena.

Lona lua, se i faamatala mai lava e lau Afioga le uiga o le Sui Peresetene ma le Peresetene Lagolago, Vice President ma le Deputy President please.

Ia o nai fesili laiti ia, a o le Tulafono lava ia, malo le fai o le faiva. E lagolagoina ma le agaga faafetai. Faafetai i lau Afioga.

FOFOGA FETALAI: Tulai mai le Palemia.

18 MATI 2020

Tulafono Tau Faaofi o Fanua ma Suafa 2020
– faitauga faalua

Susuga Hon Tuilaepa Auelua Fatialofa Luplesoliai Lolofietele Neioti Aiono Galumalemana Dr. Sailele Malielegaoi: Lau Afioga i le Fofoga Fetalai, ona o lena e i ai tiute foi o lena e avatu, o le a tonu lava le mataupu e fia malamalamā ai le sui usufono a o lena e i ai tatou Tulafono o avatu ai?

FOFOGA FETALAI: E a, e i ai se isi... ia se i toe tuu atu...

Tofa NAFOITOA TALAIMANU KETI: Ona o le agaga o lea e saunoa le Afioga... Faafetai i le faaopoopo a lau Afioga i le Taitai o le Maota. A o le agaga lea o lea e tuualalo, ona o lea e taua o le Peresetene ma lana panel. E lelei ona faailoa manino mai ona iloa atoa lea o le ata. O le agaga lea ma le faaaloalo.

FOFOGA FETALAI: Ia, se i... a e saunoa mai i lenei taimi pe se i i ai se taimi e tali mai i ai. Ia lelei, se i atoa uma ona e saunoa lea e tali. Ia se i tulai mai le sui usufono mo Faleata Sisifo.

Tofa LEALAILEPULE RIMONI AIAFI: Faafetai lava lau Afioga i le Fofoga Fetalai. E puupuu lava le... Sa fai lau molimau i le mataupu lea lau Afioga i le Tulafono Tau Faaofi. Faafetai lava i le Komiti i le tele o mea sa... tele le molimau tusitusia lea ua... a o le vaega lea na ave i ai lau faamamafa lau Afioga o matai, o le aveeseina o matai. Lau Afioga, o le mea lea o le a faatupu tele ai galuega i le Faamasinoga o Fanua ma Suafa, ona i lau tilotilo, ua open ended, ua matua tatala le mea e mafai ona aveese matai. O le matai lau Afioga, e le o se mea faigofie. Ia manatua foi lau Afioga, o le ala i le pule o le tautua. E ala ona matai le tagata ua uma ona tautua, a o lea la ou te vaai atu i ai i i, e le fia matai isi ona e tatau ona faaauau le tautua. Sa i ai le case, na pau lava lena o le mea sa ou alu ai i tai i le Faamasinoga lea o le fai mai o le isi matai e aveese lou matai, ioe, le tagata foi lea na matou o i le palota e le malo ia te au. Leai o le mea moni lau Afioga. O le mea e lagona ai lou faanoanoa, sa ave lau fautuaga i le Sui Peresetene sa faia le case, sa le tatau ona talaina. O le uiga o lau tala, na fai fai le case, e fai ifo le faaiuga ua le sau le tagata lea na avea e aveese o matou matai i le aso na lau ai le iuga ae saunoa mai le Sui Peresetene, e tusa ai ma le Tulafono, e le talaina le tou talosaga na aumai. A o lea na alu le talosaga atoa.

18 MATI 2020

Tulafono Tau Faaofi o Fanua ma Suafa 2020
– faitauga faalua

O le uiga o lau tala lau Afioga, afai ou te alu atu e faaulu sau tagi e aveese se matai o se isi o lou aiga, o la e ua i ai le Tulafono e manino aua la e na i ai lava le Tulafono i le taimi lea, ona faapea mai lea o le Resitara po o le Sui Resitara, e le talia lau mataupu ma le alu ai fua o le taimi o le tatou court, e le talia. Ia ona uma ai lava lea i ina, ae o le mea lea taumafai e faa-tuumalie le tagata, ia na o le tele o galuega fai ma tele o tupe alu. Ona fai lava lea o le case, atoa le vaiaso o fai le case ae o lea ou te iloa le iuga o le case e le tusa ai ma le Tulafono, lea lava na lau mai e le Peresetene. A o lea la ua aumai nei i i, o le mea lea ou te faanoanoa ai lau Afioga, o le Vaega lea 14(b), lea e faapea mai; afai o se o umia sea Suafa Matai ua ia le mafai ona faatinoina ma le tatau ona tiute faa-Matai. Ua tuutalaloa tele lea mea lau Afioga i lou talitonuga. O lona uiga o le ita lava o le matai sao ua le faia le faatonuga ua le faia se puaatele o saogamea a le aiga, ia sau i tai i le Aso Gafua e aveese le matai o le tama lea.

O le uiga o lau tala, o le a matua tele ma anoanoai ai ia... o lea foi e i ai faaiuga o Faamsinoga lea ua uma atu nei i le aveesega o matai o ni isi o tagata, e pei ua faafaigofie ona fai nei mea, ae le tatau ona faafaigofie lau Afioga, e le tatau ona faafaigofie le o atu o tagata e fai nei mea e aveese suafa matai o le mamalu o aiga.

Ia na pau lea o le vaega lea na ou fia... ae faafetai ua tuu mai lalo le tausaga mai le 25 i le 21, ma nisi o tulaga faapena, ae ou te matua puipui lava i le mea lea o le faafaigofie ona aveese measina a aiga, na uma ifo lea aveese i tai, ae o mea e mafai ona soalaupule e aiga latou latou mea. Ma le faaaloalo lava.

FOFOGA FETALAI: Malo faafetai.

Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoi: Lau Afioga i le Fofoga Fetralai, na pau le mea o lea ou te matau, o lea e le i aveesea le matai o le sui usufono. Ioe, o le a la le mea e sai ai fua? Afai o lea e le i aveesea, e faapena aga a le tatou atunuu. Ia e i ai tagata e manatu e le o faia lau galuega, e i ai isi e manatu o la e lelei, ia ona ave loa lea i totonu, a o la e i ai Mose ma le Au Perofeta latou te faia le iuga. O le a la le mea e te popole ai?

18 MATI 2020

Tulafono Tau Faaofi o Fanua ma Suafa 2020
– faitauga faalua

O le Tulafono tuai lena, a o le Tulafono fou lea e fai nei o le a 200% ai. E pei o lea ta te faalogo atu i le Minisita ua uma ona vaai i ai, o le Minisita foi o le Loia, ae malie ia e le i aveesea lou matai. O lona uiga o lo o sao lava le iuga a le Faamsinoga. Aua e te popole o le mea fou lea ua i ai. O lona uiga, o lea foi e i ai le Komiti, o le Komiti lea ua tofi o le matua lauia lava o lauia. O lona uiga o mea uma lava na lagalaga mai e faamatala atu, se o mea uma na e talau i o. A o le a le mea tatou te popole ai, e uma lava ona talau i o toe aumai foi lea tatou toe tilotilo i ai? O le fesoasoani atu lena. O le mea lea ou te popole i ai pei lava o le Tulafono lea o le a pasia a o lea e faatali e toe o tatou i o i le Komiti o Tulafono e toe talanoa auiliili i ai pe i ai ni koma e toe aveese ae toe faaopoopo nisi koma liliu.

FOFOGA FETALAI: Malo. Se i tautuana ma lau Afioga i le Minisita, vaai tatou sui ia o le a tauva e aua le aveesea suafa matai se i maea le palota ona faapena lea ona silasila ia lelei, ia uli ma sao le palota.

Ia, se i tulai mai le Minisita e saunoa i mea sa laga e sui usufono ona...

Afioga Fuimaono Teo Samuelu Teo (Falealili Sasae): E fia maua se avanoa i lau Afioga i le Fofoga Fetalai.

FOFOGA FETALAI: E te fia saunoa?

Afioga Fuimaono Teo Samuelu Teo: E puupuu lava lau Afioga pe a maua se avanoa.

FOFOGA FETALAI: Ia faapuupuu mai.

Afioga FUIMAONO TEO SAMUELU TEO: E lelei lava le faaleo o le lagona o le itumalo aua o lea e taoto le tatou Tulafono. Na pau lava le vaega, o le tali lea o le mataupu lea e 17 aua sa i ai foi le lagona faapena i nisi o le a aveese matai, a o lea e tali i ai le faafuaiupu 17 o le Tulafono lena e i ou luma Leala, e te le popole i ai, e mafai e oe ona talosaga ma tetee pe afai o le a aveesea lou matai. Na pau lava le mea la e tau aveese ai lou matai, o lou le alu i le fono a le nuu. A o le mea ia o la e lelei lava lau tautua, ae alu i le fono. O le vaega lea e i lalo o le Tulafono, ona o lea e le o aiaia, le mea lea o le tele o itu e faaulu e auga tasi. O le uiga o lau faamatatalaga.

18 MATI 2020

Tulafono Tau Faaofi o Fanua ma Suafa 2020
– faitauga faalua

Tofa LEALAILYEPULE RIMONI AIAFI: Ona o lea e faalogo mai lou nuu ma lou itumalo. A saunoa mai lava Galumalemana ia e usitai i ai Lealailyepule. Ae o le saunoa mai o le Gafatasi fai mai ia Vaitele e le oo i ai lona malosiaga. Faafefea ona ou leai i fono a le nuu o lou fale lea e fai ai fono...

Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoi: E faamaonia, o le matou fono a le matou nuu o Vaitele sa i ai le sui usufono.

Afioga FUIMAONO TEO SAMUELU TEO: Faafetai o na ua talia se tuualalo, aua o lau tuualalo lea na fai e alu i le fono a le nuu lea ua alu ai. O le tulaga lea o itu faamasinoga, o se mataupu e tasi, a ua avea le Tulafono i le faaiuga a faamasino e faapea o se vaega e lilifa i ai le toatele o molimau. O se mataupu e tasi e finauina se fanua po o se suafa, ona sau lea o le toeaina e toa lima le fanau, e lima foi itu, e tofu lava le suafa matai o lana fanau ma itu o le faamasinoga. Ae tasi lava si toeaina la e sau e finau mea a lona aiga. E sau le faaiuga, e lilifa le faaiuga i le mea e toatele i ai mau na avatu i itu faamasinoga. Ae o lea la ua tuu le mataupu o lea e finauina e si toeaina e le taualoa ona o le tulaga lea. Ua lilifa ai le tagai a faamasino ona o mau ia e aumai e itu faamasino. Ua leai se vaega se i iloilo po o le a le sootaga a tagata nei. O le toeaina ma lana fanau tama e toa fa, o lea e lima ai itu faamasinoga, ae sa tatau ona tasi le latou itu, aua e tasi foi la latou mau. Ae ua avea la le tele o itu faamasinoga ma mea ua au i ai le finagalo o faamasino ona e lilifa i le tele o molimau. E pei o le vaega lena e tuuina atu i le afioga i le Minisita, o lea ua faafofoga mai....ua e tasi lea vaega ua tele ina faoa ai measina, aemaise nai aiga toagaogao, na o si toeaina lava la le e faia le tautua, e sau e finauina mea a lona aiga, ua taufao ai e le toatele o le toatele o le aiga ma le agaga faaaloalo. Faafetai.

FOFOGA FETALAI: E faapena lagona, e avatu foi le fautuaga, pe o le a lava le toatele e tasi le maea ae lua pito maea, ina ia faasoa lufilufi lima lelei i ai alii o le Faamasinoga mo le lumanai. Faafofoga mai foi le Minisita, ia se i tautuana, fautua ifo i le faatinoga o le galuega. Tulai mai pe i ai se mea e te fia saunoa ai ae se i tuu atu le fesili.

18 MATI 2020

Tulafono Tau Faaofi o Fanua ma Suafa 2020
– faitauga faalua

Afioga Hon Faaolesa Katopau T. Ainuu: O lea ua faamaumau, ua faatupu manatu foi ia sausaunoaga a sui usufono i le Matagaluega lenei. O lea e alala mai foi i i le Resitala, e leai se mea o misi. E le o alotamala foi le Resitala i le faamaumauga o mea nei o lo o finagalo i ai....a ou tali atu nei taitoatasasi, tatou te momoe i i, ae taatia maia o outou finagalo o le a alo atu i ai le Matagaluega e faatino le tali. Ma le faaaloalo lava.

FOFOGA FETALAI: Se i vaai i leiloa le pepa a le Resitara...

Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoi: Lau Afioga i le Fofoga Fetalai, i le mataupu lea sa laga mai e le sui usufono mo Falealili, masalo ua lavea uma ai tatou lavea ai foi au. Ma e tasi lea itu taua o lea na outou faafogafoga atu ai, ua faamalolo isi faamasino ona o tulaga faapenei. E mafai ona ou faapea atu i le taimi lena i le feagaiga tuai ao lea ua tatou i ai i le feagaiga fou. I le tulai mai o le Tulafono lenei, o mataupu uma ia sa saunoa i ai le toatele o sui usufono e le o ni mataupu foi lea e fou, o mataupu uma lava ia. I le faatulai mai o mafaufauga, i le toe teuteu, o le uiga moni lena o le toe teuteuga o le Tulafono lenei, ona o le anoano o mea faapea na tutupu i lalo o le Tulafono tuai.

Lau Afioga i le Fofoga Fetalai, e sao uma lava mea ia e laga mai e sui usufono. E i ai le talitonuga o le taumafaiga lea ua taumafai i ai le Malo, o se taumafaiga e tali atu ai i faafitauli nei sa faafeagai ma le tatou atunu. O le ala lea o le matua ogaga ai o teuteuga ia ua fai. Ona o mea uma lava ia sa aumai e sui usufono, e faatatau ia latou experiences i meatotino a o latou aiga, o i ina tonu lea na faatupu manatu i le faia o le Tulafono lenei. O le ala foi lena o lea e limataitaina ai lava le vaega Faaupufai lenei ma le Malo, i isi Afioga ia a lo tatou Alii, o lea ou te iloa le mea e tatau ona fai ae le faia, o le agasala lea i luma o le Atua. Ma e lua ituaiga agasala, o le agasala i le iloa o le mea piopio e le tatau ona faia ae fai lava, e faia ma le iloa. Ma le agasala lona lua, o le iloa o le mea e tatau ona fai, ae gugu, ma nofonofe leai se mea e faia e faasao ai.

O le gaioiga la lea ua faatino e le Malo e taumafai e tali atu ai, i faapopolega ia e sausaunoa i ai sui usufono ia, leaga o mataupu e aafia uma ai lava tatou. Ou te talitonu o tatou uma lava nei, e tele taimi na tatou faafeagai ai ma faamasino, o le matua tele o le le mafaufau.

18 MATI 2020

Tulafono Tau Faaofi o Fanua ma Suafa 2020
– faitauga faalua

Ua latou faia ituaiga uiga ia ua le mafai ai ona toe alo le Palemene, ma toe faapea atu, o Tulafono ma Teuteuga nei, o Tulafono e afua atu i totonu o le tatou Palemene nei.

FOFOGA FETALAI: Malo faafetai. A o faafofoga tapuai mai Samoa, e leai e faapena le lagona, e maafaafuagalu le Palemene i ana Tulafono, e leai ma se isi o sui usufono mamalu o le Palemene e le i asa mai i faafitauli e pei ona saunoa i ai sui usufono. Aemaise foi o faafitauli lea na saunoa i ai le sui usufono mo Falealili, e pei ona malele i ai le taitai o le atunuu, ua aafia ai foi lou tagata, ae mafua ona fai suiga, ina ia siitia ai le auaunaga ina ia tulai mai i se auaunaga lelei ma le faamaoni. O le mea lea, tatou tatalo i le Atua ina ia faapena ona taunu le faamoemoe o le Malo ua mafua ai nei suiga, ina ia faamalieina ai le tagi mai ala o le le tonu ma le le sao o nisi o faaiuga ua faapena ona tulai mai i futia ua sola. Ae tatou tatalo ia fesoasoani mai le Atua i le faatinoga o le galuega.

Na faitauina le Tulafono Tau Faaofi o Fanua ma Suafa 2020 i lona faitauga faalua.

FOFOGA FETALAI: Ou te tapa lau Afioga i le Palemia mo se lafo.

Susuga Hon TUILAEPA AUELUA FATIALOFA LUPESOLIAI LOLOFIETELE NEIOTI AIONO GALUMALEMANA Dr. SAILELE MALIELEGAOI: Lau Afioga i le Fofoga Fetalai, ou te tulai atu e faatu le lafo, *Ina ia tuuina atu le Tulafono Tau Faaofi o Fanua ma Suafa 2020 i le Komiti faapitoa e pei ona tofia nei mo le iloiloina ma toe lipoti mai i le Fono Aoao i se Fonotaga talafeagai ma lata mai i le lumanaiai.*

Faaluaina e le Minisita mo Pisinisi, Alamanuia ma Leipa ma le Minisita mo Tina ma Tamaitai Atinae o Nuu ma Afioaga ma Agafesootai.

Na faamaonia le lafo.

18 MATI 2020

TULAFONO TAU FAAOFI O LE PULEGA O MALOSIAGA 2020
– faitauga faalua

FOFOGA FETALAI: Ou te tapa lau Afioga i le Minisita o Tupe.

Afioga Hon SILI EPA TUIOTI (Minisita o Tupe): Lau Afioga i le Fofoga Fetalai ou te faatu le lafo, *Ina ia faitauina nei le Tulafono Tau Faaofi o le Pulega o Malosiaga 2020 i lona faitauga faalua ma ou te fia tautala faamalamalama i ai.*

Faaluaina e le Minisita mo Aoga Taaloga ma Aganuu o Samoa ma le Minisita mo Tupe Maua.

FOFOGA FETALAI: O le avanoa lenei e saunoa ai lau Afioga e faamalamalama le tulafono.

Afioga Hon SILI EPA TUIOTI: Lau Afioga i le Fofoga Fetalai, talu mai le tausaga 2017 sa faaauau pea feutagaiga a le Matagaluega o Tupe ma Vaega eseese o lo o i lalo o Vaega o Malosiaga, Energy Sector. I nisi o vaega manaomia ona suia e sui ai le Tulafono talafeagai ma faiga-faavae, e tuufaatasia i se Tulafono Tau Faaofi i le Pulega o Malosiaga, ina ia tasi ai le Tulafono e faavae ma faatautaia ai galuega uma e patino i so o se mea tau malosiaga. E aofia ai malosiaga faasaoina po o le energy efficiency, malosiaga faafouina, renewable energy ma le vaavaaia o mataupu tau suauu ma penisini ma ia manino ai vaega e manaomia mo se mataupu e patino i vaega nei. Ma o le a tasi ai foi le Matagaluega e vaavaaia ma puleaina le tuufaatasia o faiga-faavae o mea tau tupe, o atinae ma teu faafaigaluegaina o tupe. E tumau pea le faatinoina o Ofisa eseese o a latou matafaioi. O le ala lea lau Afioga i le Fofoga Fetalai, ua toe tapenaina ai lenei Tulafono Tau Faaofi, ina ia fesoasoani tele i le toe faaleleia atili o le tele o galuega matafaioi ma atinae a le Malo e patino i malosiaga energy, ma le malosiaga faasaoina energy efficiency, malosiaga faafouina, renewable energy faapea ma suauu ma penisini po o petroleum.

E tele vaega eseese ua tuufaatasia i lalo o lenei Tulafono Tau Faaofi, i le taimi nei, o lo o tauaveina e le Matagaluega o Tupe le tele o galuega e patino i faiga-faavae ma le vaavaaia ma le faamaopoopoina o mataupu uma tau malosiaga, ma malosiaga faasaoina energy efficiency matters, e aofia ai ma le faagasologa o galuega tauave e ala i le Komiti o le faamaopoopoina o le mataupu tau malosiaga po o le National Energy Coordination Committee.

18 MATI 2020

Tulafono Tau Faaofi o le Pulega o le Malosiaga 2020
– faitauga faalua

Mo le silafia e lau Afioga, e toatolu Minisita o lo o i ai i totonu o le Komiti lea, o le Afioga i le Sui Palemia, o le Minisita o Galuega ma Atinae tetele faapea le Minisita o Tupe, ma o lo o auai uma ai ma Ofisa Sili o Pulega o Matagaluega nei o lo o i ai o latou sao i le tapenaina o Pulega faa-Malosiaga.

Lau Afioga o isi galuega e patino i malosiaga faafouina renewable energy, o lo o faatinoina lava e Matagaluega o Punaoa Faalenatura ma le Siosiomaga. O galuega e patino i suauu ma penisini, e ui o lo o i ai foi matafaioi a le Matagaluega o Felauaiga i auala ma Galuega tetele i lalo o le Tulafono o Suauu 1974 po o le Oil Fuel Supply Act 1974, ae o ole tele o galuega e faatatauina i suauu ma penisini o lo o faatino e le Matagaluega o Tupe, ma vaavaai e tusa ai ma le Tulafono o Penisini 1984 po o le Petroleum Act 1984. O le ala lea e taua ai tele lenei galuega i le toe tuufaatasia o se isi Tulafono e tasi, e ta-aofai uma ai ia Tulafono ma e faatatau i mataupu uma tau malosiaga, malosiaga faasaoina ma malosiaga faafouina ma suauu ma penisini. Ua maioio ai foi matafaioi a Ofisa eseese a le Malo, ma ia manino ai le mea e agai i ai. O le lipotiina o galuega faatino ma atinae aemaise o le Komiti autu e tatau ona faatoai uma i ai mataupu faapenei.

Ua tele faatalatalanoaga sa faatinoina talu mai le 2017 ma Vaega tumaoti a le atunuu faapea foi ma ofisa eseese a le Malo o lo o aofia i lea Tulafono Tau Faaofi. O vaega uma foi o lenei Tulafono Tau Faaofi ua maea faamaonia e le Komiti e faamaopoopoina o mataupu tau malosiaga po o le National Energy Coordination Committee i le aso 15 Aokuso 2019. Ma na autasi uma i ai ina ia tuuina i lalo le Matagaluega o Tupe, e vaavaaia mo le taimi lenei ina ia sosolo ai pea i le faatinoga o galuega ma matafaioi o lo o tauave e le Matagaluega o Tupe i le taimi nei. Ae o isi uma Ofisa a le Malo o lo o aafia ai, po o implementing agencies, e faaaauau foi lo latou tauaveina o tiute talafeagai ma patino i o latou lava ofisa. A ia feutagai pea ma le Matagaluega o Tupe ma saili faamaoniga a le Komiti mo so o se mataupu o lo o i ai i lalo o lenei Tulafono. E pau lava le Tulafono e le o aafia i lenei Tulafono Tau Faaofi, o le Tulafono o Eletise 2010, Electricity Act 2010. E pei ona malilie i ai faatalanoaga ma ofisa eseese a le Malo, mo le taimi nei, o le a faatumauina pea le vaavaaia e le Ofisa Faatonu po o le Office of the Regulator, ona e fai si tele o lavelave pe a aveese mai lea vaega e tuu i totonu o le Tulafono Tau Faaofi. Ma o lo o i ai lava vaega o le Tulafono Eletise 2010, e pa puipuia ai le aveese mai o ia galuega e faatino i lalo o isi ofisa.

18 MATI 2020

Tulafono Tau Faaofi o le Pulega o le Malosiaga 2020
– faitauga faalua

Ua manino i totonu o lenei Tulafono Tau Faaofi vaega autu e faamalosia ai le enforcement o le puleaina, e faapea i le faagasologa lelei o le faatinoina ina ia aua ne i i ai se feteenaiga po o se faalavelave i nisi Tulafono ma faiga-faavae ua i ai nei. Lau Afioga i le Fofoga Fetalai, e 10 vaega autu, o vaega taua o lo o i totonu o le Tulafono lenei ma o lo o faamatala ai le suiga ua mafai ona tuuina i totonu o lenei Tulafono Tau Faaofi, e i ai le manatu o le see atu foi o le Tulafono lenei mo le iloiloga a le Komiti, o le a faapena foi ona maua ai avanoa o le Ofisa o Tupe faapea Matagaluega o lo o aofia i lenei Tulafono Tau Faaofi ina ia faapena ona faamalamalama atili nisi o tapenaga tau i faiga-faavae ma tulafono ina ia faapea ona maopopo le faatinoina o lenei tulafono. E manatu o se tasi lenei o Tulafono taua tele i le vaai agai i luma. E tuu atu i luma o le laulau ma tuu atu i le Komiti e Iiloilo ma toe lipoti mai lea e toe talanoaina e le Palemene. Ma le faaaloalo lava.

FOFOGA FETALAI: Malo faafetai. Malo saunoa, o le tasi lenei o Tulafono sa lava se taimi na faamalamalama ma faapupula ai e le Ofisa Sili o Pulega o le Matagaluega o Tupe, le tulaga o lenei Tulafono i ona itu e pei ona saunoa i ai le Minisita. E ui i lea, afai e i ai se sui usufono e le lava lona malamalama i le faamalamalamaina, e mafai ona tuu atu le avanoa.

E i ai le manatu ua lava ta oso uma le Palemene i le faamalamalamaina e le susuga i le Ofisa Sili o Pulega o le Matagaluega o Tupe.

E tasi la lea sui usufono e le i malamalama... aua e fai ma tulai mai fafo... Saunoa maia le sui usufono mo Vaisigano.

Afioga TAPULESATELE MAUTENI TAMASONE METULI II ESERA (Vaisigano Nu 2): Faafetai i lau Afioga i le Fofoga Fetalai, e le faapea foi o le a faaali mai sou finagalo ona tetee atu lea i ai. Sa ta nofonofo lelei lava i le tatou pre-sitting lea na fai i le Aso Gafua. Ta te le i alu i fafo, faalogologo lelei lava, e pei ona manaomia mai matou, sui usufono o le Palemene sa auai. E leai e laititi lava le mea lea na ou fia faailoa atu i lau Afioga ma le mamalu o le Fono. E le aiaina lava le tulaga lea ua fuafuaina, lea ua agai uma vaega ia e faatino e le Matagaluega o Tupe, ae pei foi lea e tau popole lava lo ta mafaufau i le taumafai e faitau ia tau manino ia le tulaga o Tulafono Tau Faaofi.

18 MATI 2020

Tulafono Tau Faaofi o le Pulega o le Malosiaga 2020
– faitauga faalua

O le tulaga lea na aofia mai i le... ai pau lava ai se misprint a o lea e tau matau atu, e pei o lea, ia silafia lelei foi le uiga o nei upu ma le faasamoaina. A tagai lau afioga i le tulaga lena i le vaevaega, na e i ai le vaevaega muamua, itulau e 4, o le fuaiupu 14. O lo o sau ai le upu lea o le petroleum, ae faasamo faasamo i le penisini. I le tulaga lea, ou te iloa o la e silafia lelei lava, ou te le iloa po o se misprint po o le a tonu le tulaga lea, leaga a tau le petroleum, e tatau ona faaaaoga le isi faasamoaga lea e i ai i le fuaiupu 16, o oloa tau penisini, le upu lea e i ai... o le tulaga lea e taumafai atu ai, o oloa nei, e le talafeagai le faapea mai o petroleum products ae faaaaoga le upu lea, faaaaoga na o le penisini. Leaga o petroleum e le na o le penisini. O le taua o le Tulafono lea Tau Faaofi, ona o le ave o le levy lea i le penisini ma le kiso. E le mafai la ona faapea mai o le petroleum ae tusi na o le penisini. O le petroleum products le upu e tatau ona faaaaoga na e faaaaoga i le vaega 16 ma le 17. Ona faasamo lea, e le na o le penisini, o le penisini ma le kiso, faatasi ai ma isi vaega ia o suauu afi ma mea faapena.

O le tulaga lea o lea e ala ai ona... e le faapea e faia le levy lea na o le penisini, o le kiso ma le penisini. A tilotilo atu i le mea lea, ua le iloa po o fea e i ai le kiso ia. A o lea e aumai le kiso, i le faatulagaga lea o le levy lea. Ia malamalama lelei aua a faitau atu i ai, e atili ai le le malamalama o le vaega lea e le malamalama i mea ia. Ae o le tulaga lena lau Afioga i le Fofoga Fetalai, aua a lelei ma sao le faasamoaina e faigofie foi ona malamalama. Ma le ava lava i lau Afioga.

FOFOGA FETALAI: Malo lava.

Afioga SULAMANAIA FETAIAI TAUILLILI TUIVASA: Lau Afioga i le Fofoga Fetalai, pe maua se avanoa o lenei itumalo. E puupuu lava lau Afioga.

Na pau le agaga e faafetai i le Afioga i le Minisita aemaise le Ofisa Sili o Pulega ma le Matagaluega i lenei foi Tulafono. O le agaga o le faafetai e tolu Tulafono ia ua ta-aofai ai i totonu pe ua faaleaogaina i se Tulafono e tasi, o lou lea agaga faafetai. Ae pau lava le tuualalo a lenei itumalo, se i silasila ane i lenei vaitau, o lea ua tatou i le vaitaimi o le faamai ma le faaitiitia o le aumaiga i totonu o feoaiga mo vaa.

18 MATI 2020

Tulafono Tau Faaofi o le Pulega o le Malosiaga 2020
– faitauga faalua

O le tatalo la a lenei itumalo, o lea manaia le tuufaatasiga o le Tulafono i se Matagaluega e tasi na te... ae talosagaina ina ia fai ni isi tatou reserve tane ia, ina ia lava ai le supply, o le a le taimi e oo mai ai foi i si o tatou atunuu ia vaa feoai ia o le a ban foi i nei atunuu o lenei lalolagi, ia lava, o le tuualalo lea. E lagolagoina le Tulafono a o le tuualalo ina ia silasila ane i le vaega lena. Ona o le suauu e pei o le tulaga e tua i ai si o tatou atunuu i taimi o feoaiga, i le taimi e pipisi ai le faamai ma mea faapena. Pe te i foi ua oo atu ua le aumaia ni vaa, se i silasila ifo lau Afioga i le Minisita i le vaega lea.

O le isi o vaega, o le faafetai lava ona o le tulaga lea o le penisini ma le tulaga lea i le suauu, e fai lava si le safety. O lau toe tuualalo atu se i silasila ane i tane ia lea e aumai i tai i Sogi. E pei o lea e sau i totonu o le tatou taulaga ia paipa, ia i te i ua liki i tai i le uafu ma faasau....se i silasila ane i lenei vaitau. O lea foi ua alu i luga le suiga o le tau, a o lea e taoto ai paipa i o i le auala laupapa foi lea e sau mai tai. Se i silasila ane i ai lau Afioga i le Minisita i le safety o si o tatou atunuu. Aua a faaletonu alapaipa ia e utu mai ai le penisini, sau mai tai sau ai i inei i Mulinuu, o lona uiga ua le aoga atoa totonu o le tatou taulaga. Na o le tuualalo e tuuina atu i lau Afioga ina ia lava mea e tua i ai si o tatou atunuu. Ae e lagolagoina e lenei itumalo le tulaga i le tasi o le faamalu. Ae faafetai ai foi i nai Matagaluega ia na tuufaatasia ma tulai mai foi ia faafaigofie. Ia manuia le Fonotaga a le atunuu lau Afioga i le Fofoga Fatalai. E pau lena o se tuualalo a lenei foi itumalo.

FOFOGA FETALAI: Malo faafetai, se i saunoa atu le Palemia.

Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoi: Lau Afioga i le Fofoga Fatalai, e fesoasoani atu e toe faaopoopo atu i le vaega lea. A silasila ifo i le Tulafono lea sa saunoa i ai le sui, ua tolu Tulafono ia ua soloia i le Vaega 55. Soloia le Tulafono lea i le 2017, 1974 ma le 1984 ua 36 tausaga talu ai. O le Tulafono lea na fai i le 1984, a e manatua na tulai mai le HRPP e avea ma Malo i le faaiuga o le 1982. Ona faatino ai lea o nisi o fuafuaga i le 1983, ao le mataupu na sili ona avea ma toatuga i le Malo.

18 MATI 2020

Tulafono Tau Faaofi o le Pulega o le Malosiaga 2020
– faitauga faalua

O le faaletonu o le Foreign Reserves, ma ua faulai i inei tupe a kamupani nei i Samoa ua le mafai ona ave i fafo, ua leai ni tupe e sui ai tupe ia, teugatupe a le atunuu. Ma ua agai ai ina augata ia kamupani e aumai ni a latou suauu i Samoa, manu e pogisa faasoloatoa ai. Ona fai ai lea o le matou faaiuga a le Kabeneta i le taimi lena, o le a fai loa se faiga fou, e tender ia supply, ona manumalo ai lea o le Shell. Tapuni lea o le British Petroleum tapuni le Mobil. Ona aumai ai lea na o le Shell, e tasi lava le tausaga na supply ai o le 1984, lea la e i ai le Tulafono lea, ae na aliali ai i le taimi lena le tele o le faaletonu. E tatau ona i ai ni tane a le atunuu lenei, tank farm, o le ala lena o lea na aumai ai le tupe tele lava mai le faaputugatupe a se tasi foi o Faalapotopotoga le OPEC ma fai ai loa a tatou tane ia e i ai nei. Ma ave ai e tatou ma tane a le Mobil lea na i ai, ina ia faafaigofie ai ona tender suauu. O lona uiga e na o le tau lava o le suauu ae avatu e tatou ia storage. O tane laia e i ai nei o tane a le Malo, na ala ona mafai ona fai le faiga lena ona o le Tulafono lea i le 1984. Ona faataoto mai ai loa lea o le faiga-faavae a le Malo, o lea la ina ua uma ona fausia tane fou ia, o lea la e alu ai lava le tatou supply ia, o mea ia o petroleum products, o suauu eseese e aofia ai tiso, se i tau mai lava i le taimi lenei.

O lea la sa gafatia ai e Samoa ona taugofie ana suauu, penisini ma tiso mea eseese na i lo isi atunuu o le Pasefika. O le tulaga lena o le taua o le Tulafono lenei e pei ona faamanino e le Minisita, lea faatoa tatou taunu tonu lava i le One Stop Shop. E tasi lava le coordination nei, lea ua faatu i le faiga lea ua faatulai mai i le Tulafono. E faafetai ai foi i le Afioga i le Minisita. E na ona oo mai lava o i latou nei mai fafo foi, i ni a latou mataupu e aafia ai mea ia, e tasi lava le fono uma. E tasi lava le feiloaiga uma na i lo le faiga lenei e alu... a uma ona fono ma le isi alu i le isi alu i le isi, uma ifo ua ono fitu, valu masina o faatali se iuga. A o le faiga la lea ua faatulai mai nei e le Minisita, o le a faigofie ai ona fai iuga, ma televave ai tulaga o faatinoga o tatou taumafaiga, e taua tele le mea lea, le faiga lea ua i ai nei, o lea la ua i ai le faamoemoe, o lea e i totonu o tatou plans uma ia mo le tatou uafu fou lea e fuafua nei. Ma o lea e faatali se faaiuga e tatau ona maua mai i le tausaga lenei. Afai e faatino ia fuafuaga ia, ua aveese uma lava ia tane ia lea e tu lata mai i, ona ave loa lea tu i tai i le itu i sasae....le itu atu i o i sisifo i le faatausiusiuga o le uafu fou ona saogalemu loa lea o le taulaga i lo le mea lea o lo o i ai nei.

18 MATI 2020

Tulafono Tau Faaofi o le Pulega o le Malosiaga 2020
– faitauga faalua

Lau Afioga i le Fofoga Fetalai, o le faamatalaga lena i le mea lea o lo o laga mai e le sui usufono, ona e taua tele le tulaga o tane. Ia saogalemu na i lo le mea lea tatou te faia nei, o le aumai i lalo o le sami ma pamu mai ai ia tulaga ia. E i ai foi le uafu, o la e fuafua faapitoa e taula ai lava vaa. Ia talosia ia, ia taunu lo tatou faamoemoe lea, ona o lea foi pei ua tau **fulusikopu** uma mea uma ona o le faamai lea e i ai nei. Ae talosia ia e le o toe mamao ona maua mai lea o se tali mai le tatou talosaga i Saina ma e taua tele mataupu nei tau penisini ma suauu, ona o lea e i ai tatou i renewable energy, tatou te tua i ai.

FOFOGA FETALAI: Malo faafetai. Pe i ai se isi mea e fia saunoa i ai lau Afioga i le Minisita o Tupe.

Afioga Hon SILI EPA TUIOTI: E leai, na o le toe faaopoopo atu lava i le saunoaga malamalam a le Afioga i le Palemia. O le taimi lenei masalo o le 12 i le 18 masina talu ai, sa fai ai feutagaiga a le Ofisa o Tupe ma le OPEC o i latou ia sa aumai le tupe e faatupe ai le tatou tank farm lea e i Sogi i le taimi lenei, ma o lo o malosi lava lo latou fia fesoasoani mai, i le faateleina lea o tatou tane penisini. E le gata la i inei i Upolu ae faapea foi la le tulaga, aua o lea ua taumafai lava ia aua nei lalo ifo i le tolu masina le supply a le tatou penisini tiso ma suauu, ina ia aua ne i i ai se tulaga pe alu, agi se afa se tulaga faapena, ona le lava lea o le suauu ma tulaga faapena. O le matau atu a faapea mo Salelologa mo Savaii lava ia, e faalua ona alu le vaa i le vaiaso e ave le suauu i Savaii.

O le tulaga la e i ai, o lo o faagasolo le tulaga o le faateleina o le fanua, ma o lea ua malie mai le OPEC e fesoasoani i le faateteleina o tatou tane suauu i Savaii, masalo ua faigofie. O le taua lea o le mea lea o le proactively, e vaai i le lumanai, o a mea e tatau ona fai ona faapena foi lea ona talatalanoa i a tatou paaga, e vave lava le fesoasoani mai i lo le faatali se i oo i le taimi ua manaomia ai faatoa talanoa atu, ia o talanoaga foi ma paaga po o faletupe o le lalolagi po o faletupe o Asia ma Faalapotopotoga faapenei, a puupuu le taimi e talanoa ai maua ai se tali, o le tolu i le lima tausaga. A o le mea lena e taua ai tele fonotaga nei faaletausaga a le IMF ma le World Bank ma le ADB ma i latou na, e faaali i ai ma vave ona tau i ai o a tatou fuafuaga ia e agai i ai i le lumanai, o a galuega tetele e manaomia ona fesoasoani, ia e vave lava ona tali mai.

18 MATI 2020

**Tulafono Tau Faaofi o Teuteuga o le Tulafono o Faiaoga 2019
- iloiloga auiliili**

A o le tulaga lena e le gata i Upolu nei, a o lo o vaai foi i ai i Savaii i Salelologa, e tatau ona faatele le tatou campus o lo o i ai, ae o le lumanai foi latou ia, o le a se tulaga o tau atiae ai foi le tatou uafu tele i Asau, ia ua tatau foi ona tagai i ai ina ia faapena ona fai foi se facility ina ia aua ne i poloka ai le tatou galuega. A o le tasi faamuamua lea e ave ai foi i le taimi lenei pei foi ona tapenaina e le Kapaneta ma le Komiti o lo o matauina le tatou faamai lenei, o le taumafai lea ia aua lava ne i taofia vaa oloa ia e aumai, ona o le popolega i le tulaga lena i te i ua le maua oloa o lo o mananao i ai le atunu.

A o le isi vaega aupito sili ona taua, ia aua ne i motu le sau o tatou vaa suau ia mai Sigapoa ina ia aua lava ne i le toe maua se suau i inei. O le tulaga lena o lo o ave ai priorities na ona e le gata i le itu tau i le soifua maloloina a o le tulaga foi lea ina ia tau faaitiitia se afaina o le tatou tamaoaiga aemaise foi le galuega a le Vaega Tumaoti. Na pau le tulaga o le faamalulu atu i le sui usufono sa talanoa mai i le tulaga, ae masalo ou te le o manatua po o le Ofisa o le Tupe po o le Ofisa o le Fono lea sa faa-Samoaina le tulaga lea. Ae sao ai, masalo o le tau lena o le faapapalagi o le petroleum products – ma tulaga na o oloa tau penisini ma suau. Ae faafetai tele lau Afioga mo fautuaga na tuuina mai i lenei Tulafono Tau Faaofi.

Na faamaonia le lafo ma faitauina le Tulafono Tau Faaofi o le Pulega o Malosiaga 2020 i lona faitauga faalua.

FOFOGA FETALAI: E tusa ai ma Tulafono Tumau, o le a tuuina atu le Tulafono Tau Faaofi o le Pulega o Malosiaga 2020 i le Komiti o Tupe Maua ma Tupe Totogi mo le iloiloina ma toe lipoti mai i le Fono Aoao i se fonotaga o lumanai.

TULAFONO TAU FAAOFI O TEUTEUGA O LE TULAFONO O FAIAOGA 2019 – iloiloga auiliili

FOFOGA FETALAI: E tusa ai ma Tulafono Tumau e ao ona faamaonia muamua e le Fono Aoao le Lipoti a le Komiti ona sagai atu loa lea mo le iloiloga auiliili o le Tulafono.

Ou te tapa lau Afioga i le Taitaifono o le Komiti o le Vaega tau le Va Fealoai.

18 MATI 2020

**Tulafono Tau Faaofi o Teuteuga o le Tulafono o Faiaoga 2019
- iloiloga auiliili**

Afioga Hon GATOLOAIFAANA AMATAGA ALESANA GIDLOW: Faafetai i lau Afioga i le Fofoga Fatalai mo le avanoa. Lau Afioga ae le i faatu le lafo, ou te lagona e ao pea ona ou faaleo ma faamau le agaga faafetai mai lenei itumalo i le amanaia foi o le sui usufono o le Faasaleleaga Nu.1 i Sisifo e i ai i totonu o le Komiti e iloiloina suiga ua i ai le tatou Faavae ma nisi o suiga i le tatou vaega o Faamasinoga o Fanua ma Suafa. A o le faafetai lea e faaleoina faamolemole lau Afioga i le Fofoga Fatalai.

Lau Afioga i le Fofoga Fatalai ou te faatu le lafo, *Ina ia faamaonia e le Fono Aoao le Lipoti a le Komiti o lo o fautuaina ai ina ia faagasolo le Tulafono Tau Faaofi o Teuteuga o le Tulafono o Faiaoga 2019 faatasi ma Faasaoga.*

Faafetai lava.

Na faamaonia le Lipoti.

FOFOGA FETALAI: O lea ua faamaonia e le Fono Aoao le Lipoti a le Komiti i le Tulafono Tau Faaofi ma o le a sagai atu loa mo le iloiloga auiliili.

E tusa ai ma Tulafono Tumau e amata le iloiloga auiliili i le fuaiupu e 2.

FUAIUPU 2: Ua teuteuina le fuaiupu 27.

Faamaonia.

FUAIUPU 3: Ua faaofiina le fuaiupu 44A fou.

Faamaonia.

FUAIUPU 4: Ua teuteuina ai le fuaiupu 46.

Faamaonia.

18 MATI 2020

**Tulafono Tau Faaofi o Teuteuga o le Tulafono o Faiaoga 2019
- iloiloga auiliili**

FUAIUPU 1 MA LE IGOA:

FUAIUPU 1: Igoa puupuu ma le amataga.

IGOA: Teuteuga o le Tulafono o Faiaoga 2019.

FOFOGA FETALAI: O lo o i ai le Faasaoga a le Komiti i le Fuaiupu 1 ma le Igoa.

Ou te tapa lau Afioga i le Taitaifono o le Komiti.

Afioga Hon GATOLOAIFAANA AMATAGA ALESANA GIDLLOW: Lau Afioga i le Fofoga Fetalai ou te faatu le Faasaoga i le Fuaiupu 1 ma le Igoa o le Tulafono e faapea:

“FAASAOGA:

Ia aveese le fuainumera 2019 ma suia i le fuainumera 2020 ma fatauina ai le Igoa o le Tulafono e faapea:

“Teuteuga o le Tulafono o Faiaoga 2020.””

Ma lou faaaloalo lava.

Faamaonia le Faasaoga.

Faamaonia le Fuaiupu 1 ma le Igoa e pei ona Faasaoina.

Na faagasolo le Tulafono Tau Faaofi o Teuteuga o le Tulafono o Faiaoga 2020 faatasi ma Faasaoga.

18 MATI 2020

**TULAFONO TAU FAAOFI O TEUTEUGA O LE TULAFONO O
LE FAAFOEGA O LAFOGA 2019 – iloiloga auiliili**

FOFOGA FETALAI: E tusa ai ma Tulafono Tumau e ao ona faamaonia muamua e le Fono Aoao le Lipoti a le Komiti ona sagai atu loa lea mo le iloiloga auiliili o le Tulafono.

Ou te tapa lau Afioga i le Taitaifono o le Komiti o le Vaega tau le Tamaoaiga.

Tofa LAUOFO FONOTOE NUAFESILI PIERRE LAUOFO: Lau Afioga i le Fofoga Fetalai ou te faatu le lafo, *Ina ia faamaonia e le Fono Aoao le Lipoti a le Komiti o lo o fautuaina ai ina ia faagasolo le Tulafono Tau Faaofi o Teuteuga o le Tulafono o le Faafoega o Lafoga 2019 faatasi ma Faasaoga.*

Na faamaonia le Lipoti.

FOFOGA FETALAI: O lea ua faamaonia e le Fono Aoao le Lipoti a le Komiti i le Tulafono Tau Faaofi ma o le a sagai atu loa mo le iloiloga auiliili.

E tusa ai ma Tulafono Tumau e amata le iloiloga auiliili i le Fuaiupu 2.

FUAIUPU 2: Ua teuteuina le fuaiupu 9.

Faamaonia.

FUAIUPU 3: Teuteuga faatupulaia i le Tulafono o le Ofisa o Tiute 2014.

Faamaonia.

FUAIUPU 1 MA LE IGOA:

FUAIUPU 1: Igoa puupuu ma le amataga.

IGOA: Teuteuga o le Tulafono o le Faafoega o Lafoga 2019.

FOFOGA FETALAI: O lo o i ai le Faasaoga a le Komiti i le Fuaiupu 1 ma le Igoa.

18 MATI 2020

**Tulafono Tau Faaofi o Teuteuga o le Tulafono o Taavale Feoai i Ala
Tetele 2019 – iloiloga auiliili**

Ou te tapa le Afioga i le Taitaifono.

Tofa Hon LAUOFO FONOTOE NUAFESILI PIERRE LAUOFO:
Lau Afioga i le Fofoga Fetalai ou te faatu le Faasaoga i le Fuaiupu 1 ma le Igoa e faapea:

“FAASAOGA:

“Ia aveese le fuainumera 2019 ma suia i le fuainumera 2020 ma faitauina ai le Igoa o le Tulafono e faapea:

“Teuteuga o le Tulafono o le Faafoega o Lafoga 2020.””

Faamaonia le Faasaoga.

Faamaonia le Fuaiupu 1 ma le Igoa e pei ona Faasaoina.

Na faagasolo le Tulafono Tau Faaofi o Teuteuga o le Tulafono o le Faafoega o Lafoga 2020 faatasi ma le Faasaoga.

**TULAFONO TAU FAAOFI O TEUTEUGA O LE TULAFONO O
TAAVALE FEOAI I ALA TETELE 2019 – iloiloga auiliili**

FOFOGA FETALAI: E tusa ai ma Tulafono Tumau e ao ona faamaonia muamua e le Fono Aoao le Lipoti a le Komiti ona sagai atu loa lea mo le iloiloga auiliili o le Tulafono Tau Faaofi.

Ou te tapa lau Afioga i le Taitaifono o le Komiti o le Vaega o Atinae Eseese.

18 MATI 2020

**Tulafono Tau Faaofi o Teuteuga o le Tulafono o Taavale Feoai i Ala
Tetele 2019 – iloiloga auiliili**

Afioga TAFUA MALUELUE TAFUA: Ma le faaaloalo lau Afioga i le Fofoga Fetalai ou te faatu le lafo, *Ina ia faamaonia e le Fono Aoao le Lipoti a le Komiti o lo o fautuaina ai ina ia faagasolo le Tulafono Tau Faaofi o Teuteuga o le Tulafono o Taavale Feoai i Ala Tetele 2019 faatasi ma Teuteuga ma Faasaoga.*

Na faamaonia le Lipoti.

FOFOGA FETALAI: O lea ua faamaonia e le Fono Aoao le Lipoti a le Komiti i le Tulafono Tau Faaofi ma o le a sagai atu loa mo le iloiloga auiliili.

E tusa ai ma Tulafono Tumau e amata le iloiloga auiliili i le fuaiupu 2.

FUAIUPU 2: Ua teuteuina le fuaiupu 37.

FOFOGA FETALAI: O lo o i ai le Teuteuga a le Komiti i le fuaiupu 2. Ou te tapa lau Afioga i le Taitaifono o le Komiti.

Afioga TAFUA MALUELUE TAFUA: Lau Afioga i le Fofoga Fetalai ou te faatu le Teuteuga i le fuaiupu 2 e faapea:

“TEUTEUGA:

Ia faaofi le fuaiupu 2 fou e faapea:

“2. Ua teuteuina le Fuaiupu 2 – I totonu o le Fuaiupu 2 o le Tulafono Autu ia faaofi i lona faasologa o le pi faitau faaperetania le faamatalaga fou lenei e faapea:

“solo a taavale afi a le Malo” o lona uiga o se taavale afi po o se vaega o taavale afi o malaga faatasi mo le faamoemoe o le feaveaiina o malo faaaloalogia a Samoa po o malo i fafo, po o mo so o se faamoemoe ua faamaonia e le Komesina, ma e faafeaoina e Leoleo ina ia mautinoa le saogalemu ma le le faalavelaveina o le faigamalaga mo le taavale afi po o taavale afi;””

18 MATI 2020

**Tulafono Tau Faaofi o Teuteuga o le Tulafono o Taavale Feoai i Ala
Tetele 2019 – iloiloga auiliili**

Faamaonia le Teuteuga.

Faamaonia le Fuaiupu 2 e pei ona Teuteuina.

FUAIUPU 3: Ua faaofiina le fuaiupu 38C fou.

FOFOGA FETALAI: O lo o i ai le Teuteuga a le Komiti i le Fuaiupu 3.

Ou te tapa lau Afioga i le Taitaifono o le Komiti.

Afioga TAFUA MALUELUE TAFUA: Lau Afioga i le Fofoga Fetalai ou te faatu le Teuteuga i le Fuaiupu 3 e faapea:

“TEUTEUGA:

3. Ua teuteuina le fuaiupu 37 – Ia aveese upu “galuega o faalavelave faalenatura ma galuega manaomia i se taimi vave” ma suia i upu “tulaga o faalavelave matuia ma faalavelave tutupu faafuasei” mo faamoemoega o le Tulafono o le Faafoga o Faalavelave Matuia ma Faalavelave Tutupu Faafuasei 2007.”

Faamaonia le Teuteuga.

Faamaonia le Fuaiupu 3 e pei ona Teuteuina.

FOFOGA FETALAI: Ou te tapa le fioga i le Taitaifono mo le faaofiina o le fuaiupu 4 fou.

18 MATI 2020

**Tulafono Tau Faaofi o Teuteuga o le Tulafono o Taavale Feoai i Ala
Tetele 2019 – iloiloga auiliili**

Afioga TAFUA MALUELUE TAFUA: Lau Afioga i le Fofoga Fetalai ou te faaofi le fuaiupu 4 fou e faapea:

“TEUTEUGA:

FUAIUPU 4: Ia faaofi le fuaiupu 38C fou:

- (a) I totonu o le ulutala o le fuaiupu 38C fou ua fautuaina:
 - (i) Aveese upu “lē faatagaina”.
 - (ii) Aveese upu po o taavale tutu e saoloto le saoasaoa i le mamao ma le taimi faatulagaina”; ma
 - (iii) Suia upu “po o isi gaoioiga faasaina e fesootai i ai i luga o ala tetele” i upu “po o le le mafai ona taofiofia le saoasaoa o le taavale i luga o ala tetele”.
- (b) I totonu o le faafuaiupu (2)(a), mo upu “lima (5) tausaga po o i se sala tupe e le silia le 20”, ia suia i upu “fitu (7) tausaga po o i se sala tupe e le silia le 200”
- (c) I totonu o le faafuaiupu (3)(a), mo upu “lima tausaga po o i se sala tupe e le silia le 20”, ia suia i upu “sefulu (10) tausaga po o i se sala tupe e le silia le 250”;
- (d) I totonu o le faafuaiupu (4)(a), ia aveese le fuainumera “10” ma suia i le fuainumera “45”
- (e) I totonu o le faafuaiupu (5) ia aveese upu “tagata ofisa faatagaina” ma suia i le upu “leoleo”;
- (f) mo le faafuaiupu (6) ia suia e faapea:

“(6) O lenei fuaiupu e le tatau ona faaaogaina e tusa ai o so o se taavale afi o faaaogaina i so o se faaaliga taavale, e pei ona faatonuina e Tulafono Faatonutonu.””

Faamaonia le Teuteuga.

Faamaonia le Fuaiupu 4 fou e pei ona faaofiina.

18 MATI 2020

**Tulafono Tau Faaofi o Teuteuga o le Tulafono o Taavale Feoai i Ala
Tetele 2019 – iloiloga auiliili**

FOFOGA FETALAI: Malie ia lau Afioga i le Taitaifono, ona o le galuega lava, o lo o i ai foi le isi Teuteuga, se i tulai mai.

Afioga TAFUA MALUELUE TAFUA: O le mea foi la lea o le tolo o le Fono o lea ua ova le 1 o le taimi malolo, ae o le a taumafai atu lava lau Afioga. Ma le faaaloalo.

Lau Afioga i le Fofoga Fatalai ou te faaofi le fuaiupu 5 fou e faapea:

“TEUTEUGA:

“5. Ua teuteuina le Fuaiupu 39A-Mo le fuaiupu 39A o le Tulafono autu, ia suia e faapea:

“39A. Avetaavale faatamala ua faaoo ai manuiaga i le tino po o le oti-(1) E le tatau i se tagata ona aveina pe tietie i se taavale i luga o se auala i se faiga faatamala po o le faatalale.

(2) O se tagata o ia lea na solia le faafuaiupu (1) ma ona o lena gaoioiga ua na faaoo ai o se manuiaga i so o se tagata:

- (a) ua faia o se soligatulafono ma e noatia i luga o se moliaga ua faamaonia faaletulafono i le nofosala i le falepuipui mo se vaitaimi e le silia le fitu (7) tausaga po o i se sala tupe e le silia le 200 iunite tau faasalaga; ma
 - (b) e tatau i le faamasinoga ona poloaiina le tagata ina ia faaleaogaina lona umia po o le mauaina o se laisene avetaavale mo le tasi (1) le tausaga po o le sili atu.
- (3) O se tagata, o ia lea ua na solia le faafuaiupu (1) ma ona o lea gaoioiga ua faaoo ai le maliu o so o se tagata:
- (a) ua faia o se soligatulafono ma e noatia i luga o se moliaga ua faamaonia faaletulafono i le nofosala i le falepuipui mo se vaitaimi e le silia le sefulu (10) tausaga po o i se sala tupe e le silia le 250 iunite tau faasalaga; ma

18 MATI 2020

**Tulafono Tau Faaofi o Teuteuga o le Tulafono o Taavale Feoai i Ala
Tetele 2019 – iloiloga auiliili**

- (b) e tatau i le faamasinoga ona poloaiina le tagata ina ia faaleaogaina lona umia po o le mauaina o se laisene avetaavale mo le tasi (1) le tausaga po o le sili atu.”

Faamaonia le Teuteuga.

Faamaonia le Fuaiupu 5 fou e pei ona faaofiina.

FOFOGA FETALAI: Ia, ua toe tea atu foi lau Afioga i le Taitaifono le isi Faasaoga. Tulai mai lau Afioga i le Taitaifono mo le faaofiina o le Fuaiupu 6 fou.

Afioga TAFUA MALUELUE TAFUA: Lau Afioga i le Fofoga Fetalai ou te faaofi foi le fuaiupu 6 fou o le Tulafono e faapea:

“TEUTEUGA:

6. Ua teuteuina le Fuaiupu 42-I le tuanai ai o upu “avetaavale matautia” ia faaofi upu “i tuuga i magaala po o le le mafai ona taofiofia o le saoasaoa o le taavale”.

Faamaonia le Teuteuga.

Faamaonia le Fuaiupu 6 fou e pei ona faaofiina.

FOFOGA FETALAI: Ou te tapa foi lau Afioga mo le faaofiina o le Fuaiupu 7 fou.

18 MATI 2020

**Tulafono Tau Faaofi o Teuteuga o le Tulafono o Taavale Feoai i Ala
Tetele 2019 – iloiloga auiliili**

Afioga TAFUA MALUELUE TAFUA: Lau Afioga i le Fofoga Fetalai ou te faaofi le fuaiupu 7 fou i le Tulafono e faapea:

“TEUTEUGA:

**“7. Ua teuteuina le Fuaiupu 45-I le tuanai ai o le fuaiupu
45(1)(q) o le Tulafono autu, ia faaofi e faapea:**

- “(r) ia faamamaluina aloaia ai le faagaoioiga o solo a taavale afi a le Malo;
- “(s) e faatulagaina ai o aiaiga ma tulaga faaitiitia mo le faagaoioiga o taavale afi mo le faamoemoe o so o se faaaliga taavale.”

Faamaonia le Teuteuga.

Faamaonia le Fuaiupu 7 fou e pei ona faaofiina.

FUAIUPU 1 MA LE IGOA:

FUAIUPU 1: Igoa puupuu ma le amataga.

**IGOA: Teuteuga o le Tulafono o Taavale Feoai i Ala Tetele
2019.**

FOFOGA FETALAI: O lo o i ai le Faasaoga a le Komiti i le Fuaiupu 1 ma le Igoa.

Tulai mai lau Afioga i le Taitaifono o le Komiti.

Afioga TAFUA MALUELUE TAFUA: Faafetai. Masalo lau Afioga ae le i faaiuina le vaega mulimuli lea o le Tulafono, malie se i avatu lenei avanoa e momoli atu ai le faafetai i le Ofisa o le Loia Sili, le Ofisa o Leoleo, le Minisita, faapea foi le toatele o vaega avepasi o faalapotopotoga avepasi ma faalapotopotoga o avetaavale laiti.

18 MATI 2020

Lafo mo le Faataatiae o Tulafono Tumau

Ae le gata i lea, e faapea foi le vaega o le V8 sa matou faatasi ai, faapea foi le vaega o Leoleo, le Komesina o Leoleo ma le latou Matagaluega sa tele le latou sao i le vaega o lenei Tulafono.

E fai ai au ma sui o le Maota nei e momoli atu ai le agaga faafetai aemaise le Komiti faapea foi le Komiti faigata.

Ma le faaaloalo i lau Afioga, o le a faaiu atu ai e faapea, ou te faatu le Faasaoga i le Fuaiupu 1 ma le Igoa e faapea:

“FAASAOGA:

Ia aveese le fuainumera 2019 ma suia i le fuainumera 2020 ma faitauina ai le Igoa o le Tulafono e faapea:

“Teuteuga o le Tulafono o Taavale Feoai i Ala Tetele 2020.””

Ma le faaaloalo.

Faamaonia le Faasaoga.

Faamaonia le Fuaiupu 1 ma le Igoa e pei ona faasaoina.

Na faagasolo le Tulafono Tau Faaofi o Teuteuga o le Tulafono o Taavale Feoai i Ala Tetele 2020.

LAFO MO LE FAATAATIAESE O TULAFONO TUMAU

FOFOGA FETALAI: Ou te tapa ma le faaaloalo lau Afioga i le Palemia.

18 MATI 2020

**Tulafono Tau Faaofi o Teuteuga o le Tulafono o Faiaoga 2020
– faitauga faatolu**

Susuga Hon TUILAEPA AUELUA FATIALOFA LUPESOLIAI LOLOFIELE NEIOTI AIONO GALUMALEMANA Dr. SAILELE MALIELEGAOI: Lau Afioga i le Fofoga Fatalai ou te tulai atu e faatu le lafo, *Ina ia faataatiae Tulafono Tumau 108(4) ina ia avanoa ai le faitauga faatolu o Tulafono ia sa iloiloina auiliili i le aso Fono lenei.*

Faaluaina e le Minisita mo Pisinisi, Alamanuia ma Leipa ma le Minisita mo Tina ma Tamaitai, Atinae o Nuu ma Afioaga ma Agafesootai.

Na faamaonia le lafo.

TULAFONO TAU FAAOFI O TEUTEUGA O LE TULAFONO O FAIAOGA 2020 – faitauga faatolu

Afioga Hon LOAU SOLA KENETI SIO (Minisita mo Aoga, Taaloga ma Aganuu): Lau Afioga i le Fofoga Fatalai ou te faatu le lafo, *Ina ia faitauina nei le Tulafono Tau Faaofi o Teuteuga o le Tulafono o Faiaoga 2020 i lona faitauga faatolu.*

Faaluaina e le Minisita o Tupe ma le Minisita mo Faamasinoga ma Mataupu tau Faamasinoga.

Na faamaonia le lafo ma faitauina le Tulafono Tau Faaofi i lona faitauga faatolu ma faapea ona pasia le Fono Aoao Faitulafono.

TULAFONO TAU FAAOFI O TEUTEUGA O LE TULAFONO O LE FAAFOEGA O LAFOGA 2020 – faitauga faatolu

Afioga Hon TIALAVEA FEA LENIU TIONISIO HUNT (Minisita mo Tupe Maua): Lau Afioga i le Fofoga Fatalai ou te faatu le lafo, *Ina ia faitauina nei le Tulafono Tau Faaofi o Teuteuga o le Tulafono o le Faafoga o Lafoga 2020 i lona faitauga faatolu.*

Faaluaina e le Minisita mo le Soifua Maloloina, Minisita o Faatoaga ma Faigafaiva ma le Minisita o Tupe.

18 MATI 2020

**Tulafono Tau Faaofi o Teuteuga o le Tulafono o Taavale Feoai i Ala
Tetele 2020 – faitauga faatolu**

*Na faamaonia le lafo ma faitauina le Tulafono Tau Faaofi i lona
faitauga faatolu ma faapea ona pasia le Fono Aoao Faitulafono.*

**TULAFONO TAU FAAOFI O TEUTEUGA O LE TULAFONO O
TAAVALE FEOAI I ALA TETELE 2020 – faitauga faatolu**

Susuga Hon PAPALIITELE NIKO LEE HANG (Minisita mo Galuega, Felauaiga ma Atinae Eseese): Lau Afioga i le Fofoga Fetalai ma lou faaaloalo ou te faatu le lafo, *Ina ia faitauina nei le Tulafono Tau Faaofi o Teuteuga o le Tulafono o Taavale Feoai i Ala Tetele 2020 i lona faitauga faatolu.*

Faalauaina e le Minisita mo Faatoaga ma Faigafaiva ma le Minisita mo le Soifua Maloloina.

*Na faamaonia le lafo ma faitauina le Tulafono Tau Faaofi i lona
faitauga faatolu ma faapea ona pasia le Fono Aoao Faitulafono.*

ILOILOGA O LIPOTI A KOMITI FAA-PALEMENE

**P.P.2019/2020 NU.190, LIPOTI A LE KOMITI O TUPE MAUA MA
TUPE TOTOGI I LE MATAUPU A LE SUI USUFONO MO
GAGAIFOMAUGA NU.3**

FOFOGA FETALAI: Ou te tapa le Taitaifono o le Komiti.

Afioga ALIIMALEMANU ALOFA TUUAU: Lau Afioga i le Fofoga Fetalai ou te tulai atu ma le ava tele e faaleo le Lipoti a le Komiti o Tupe Maua ma Tupe Totogi e ala i le lafo faatu a le Taitai o le Malo i Pepa na tuuina mai i le Maota e le sui usufono mo Gagaifomauga Nu.3.

SUESUEGA A LE KOMITI O TUPE MAUA MA TUPE TOTOGI.
Sa taulimaina e le Komiti molimau tusitusia a le Matagaluega o Tiute ma Tupe Maua ma faamauina ai ana duesuega e faatatau i lenei mataupu.

18 MATI 2020

**P.P.2019/2020 Nu.190, Lipoti a le Komiti o Tupe Maua ma Tupe
Totogi i le Mataupu a le Sui Usufono mo Gagaifomauga Nu.3**

Na toe tauaaoina e le Komiti e ala mai i le Matagaluega o Tiute ma Tupe Maua le isi kopi o le pepa faaulufale po o le Bill of Lading a le Pacific and International Freights forwarders na tuuina atu e le Matagaluega o Tiute i le sui usufono mo Gagaifomauga Nu.3.

Na matauina ai e le Komiti ni eseesege i vaega nei.

<u>PEPA TUUINA ATU I LE PALEMENE</u>	<u>PEPA TUUINA MAI I LE KOMITI</u>
<ul style="list-style-type: none"> • <u>Bill of Lading 1</u> Shipper: Rosary Schmidt Manukau Auckland 	<ul style="list-style-type: none"> • <u>Bill of Landing 2</u> Shipper: Rosary Schmidt 23 Koka Rise Papakura
<ul style="list-style-type: none"> • <u>Consignee:</u> Laauli Schmidt Apia Samoa 	<ul style="list-style-type: none"> • <u>Consignee:</u> Laauli Schmidt Vaitele Apia
<ul style="list-style-type: none"> • <u>Measurements:</u> 6.68m 	<ul style="list-style-type: none"> • <u>Measurements:</u> 6.44m
<ul style="list-style-type: none"> • <u>Description of goods:</u> 1sh fridge 1sh chair 1sh bbq 2 sh TV 1 generator Number of pieces: 6 	<ul style="list-style-type: none"> • <u>Description of goods:</u> ADD: 1 sh fridge 1 chair 1sh bbq 1 sh generator 2 sh TV Pieces: 6 <i>*(\$1348 hand written)</i>
<ul style="list-style-type: none"> • <u>Signature and date:</u> Robert 23 January 2020 	<ul style="list-style-type: none"> • <u>Signature and date:</u> Vini 8 December 17
<ul style="list-style-type: none"> • <u>Delivery Agent:</u> Freight Plus Samoa LTD Vailoa Faleata Samoa Ph 31132 	<ul style="list-style-type: none"> • <u>Delivery Agent:</u> NONE (Colored Black)

18 MATI 2020

**P.P.2019/2020 Nu.190, Lipoti a le Komiti o Tupe Maua ma Tupe
Totogi i le Mataupu a le Sui Usufono mo Gagaifomauga Nu.3**

I le matau a le Komiti, e tele le eseesege o faamaumauga i vaega taitasi o Pepa Faaulufale (Bill of Lading) a le Pacific & International Freight Forwarders, ma ua fesiliglia ai le faamaoni (genuine) o nei pepa Faaulufale sa tuuina mai e le sui usufono. Ona o le eseesege o Pepa Faaulufale ua tauaaoina e le sui usufono i le Palestene i le aso 27 Ianuari 2020, ma le isi pepa na ia tuuina mai i le Komiti e ala i le Matagaluega o le Tiute, ua faamaonia ai o le uluai faamaumauga (Bill of Lading 1) e le o se pepa sao ma ua faaseseina ai le mamalu o le Palestene.

O le manatu o le Komiti, sa tatau ona tutusa lelei le Pepa Faaulufale muamua (Bill of Lading 1) sa tuuina mai i le Palestene i le aso 27 o Ianuari 2020 ma le Pepa Faaulufale lona 2 (Bill of Lading 2) lea sa tuuina mai i le Komiti i le aso 10 o Mati 2020.

TAUNUUGA O ILOILOGA MA SUESUEGA O LE KOMITI

I le maea ai o Iloiloga ma sailiiliga a le Komiti i Pepa na tuuina mai e le sui usufono mo Gagaifomauga Nu 3 i le Palestene, faatasi ai ma Pepa Faaopoopo ma Faamatatalaga tusitusia ma Molimau sa valaaolina, o lea e tuuina atu ai le lipoti i le Fono Aoao Faitulafono e pei ona taua i lalo.

PEPA TUUINA ATU I LE PALEMENE:PEPA TUUINA MAI I LE KOMITI

• Pepa Faaulufale mai o Oloa (Bill of Lading)	Pepa Faaulufale mai o Oloa
23 Ianuari 2020	8 Tesema 2017
• Pepa o Taufaailo (Quotations)	Pepa totogi mo le Afi (Invoice)
24 Ianuari 2020	7 Tesema 2017
• Pepa totogi (receipt) tau o le Afi	Pepa totogi (receipt) tau o le afi
Leai se pepa	NZD\$13,500

18 MATI 2020

**P.P.2019/2020 Nu.190, Lipoti a le Komiti o Tupe Maua ma Tupe
Totogi i le Mataupu a le Sui Usufono mo Gagaifomauga Nu.3**

<u>MALOSI O LE AFI NA TUUINA I LE PALEMENE</u>	<u>MALOSI O LE AFI NA TUUINA I LE KOMITI</u>
• 200KVA	30KVA/33KVA
• STA\$100,000	NZD\$13,500 (SAT\$22,950)
• Tiute fuafua e \$18,818.57	Tiute fuafua e \$6,293.99
• Tiute totogi – Leai	Tiute Totogi – Leai

O nisi o vaega maumaututu (facts) ua faamaonia e le Komiti e tusa ai ma lenei mataupu:

- O le tele o le malosi o le afi faaleoleo na faatauina mai e le sui usufono mai le Q-Power, Dunedin NZ, e **30KVA** e pei ona ia taua i lana folasaga.
- E le sao le saunoaga a le sui usufono ole tausaga na tea nei (2019) na faatauina mai ai lana afi faaleoleo. O Tesema 2017 na faatauina ai le afi faaleoleo a le sui usufono, ma aveina i tua mai le Fale Teu Oloa a le Freight Plus i le aso 9 Januari 2018.
- O le tau o le afi faaleoleo a le sui usufono e **NZD\$13,500 (SAT \$22,950)** ae le **STA\$100,000** e pei onaia folasia i le masota o le Palemene.
- Na maua ai i suesuega a le Komiti, e le i totogiina le tiute o lenei afi faaleoleo lea na faaulufale mai i le atunu i le aso 30 Tesema 2017

18 MATI 2020

**P.P.2019/2020 Nu.190, Lipoti a le Komiti o Tupe Maua ma Tupe
Totogi i le Mataupu a le Sui Usufono mo Gagaifomauga Nu.3**

- Na maua ai foi i suesuega le le usitaia o aiaiga o le Tulafono o le faaulufaleina mai o nei oloa i Samoa e le Matagaluega o Tiute ma Tupe Maua ma le Kamupani Tumaoti sa faatinoina le kiliaina o nei oloa.
- Ua faamaonia mai e le EPC o le 30KVA, e na o se aiga e tasi e faaaoga ai.

FAUTUAGA.

I le maea ai o ana sailiiliga i lenei mataupu, e fautuaina ai le Fono Aoao e faapea:

1. Ina ia faamaonia lana lipoti i le Suesuega o lenei mataupu e pei o le lafo faatu a le Palemia, ina ia faamauina ai le le faamaonia o Pepa na faataatia mai e le sui usufono o Gagaifomauga Nu 3 i le aso 27 Ianuari 2020.

Ma lou faaaloalo faafetai.

FOFOGA FETALAI: Malo le faafetai...

Susuga Hon Laauli Polataivao Leuatea: Lau Afioga i le Fofoga Fetalai... ma le agaga faaaloalo pe maua lava sina avanoa se i fai atu se upu, leaga o lea ua folasia le lipoti a le Komiti. Ma lou agaga faaaloalo. E pei lava ona silafia lau Afioga i le Fofoga Fetalai, e leai lava sou agaga e faataumatatao, leaga o lea ua maea le lipoti a le Komiti. E pau lava lea o lau talosaga ma le agaga faaaloalo, silasila foi lau Afioga. Ua matua tele le aafiaga ona o le suesuega lea na fai, e pei ona ou tatalo atu i le avatuga o le mau. E tofi se Komiti tutoatasi, aua silasila lau Afioga i le amataga o le mataupu lenei. O au ma le va o le Komiti o Tupe sa matou fetuunai. O lea ua aumai nei le latou lipoti e faaalia ai o latou lagona, e le i valaaulia au lau afioga. Sa ou manatu e tatau ona ou i ai e faamalamalama mataupu ia e atugalu i ai le latou lipoti.

18 MATI 2020

**P.P.2019/2020 Nu.190, Lipoti a le Komiti o Tupe Maua ma Tupe
Totogi i le Mataupu a le Sui Usufono mo Gagaifomauga Nu.3**

O lea foi e maua o lea foi e tuuai le... e tuga tuuaiga lau afioga, e le sao pepa. O lea e ia te au uma faamaumauga o fetusiaiga ma le Ofisa o Tiute. O le tusi mulimuli ananafi, ua faailoa mai ai le latou faatoesega e sese le Ofisa o Tiute. O lea ou te fia tuu atua i lau afioga i le Fofoga Fetalai, malie e a pe a finagalo malie, o lea ua aumai le latou lipoti ae conflict of interest leaga o matou lea sa matou finau i mea tau tupe. A o le tatalo i lau Afioga i le Fofoga Fetalai, e a pe a faasee le matou mataupu independent a le Palemene, e Iloilo ma aumai ai le faamasinoga o le amiotonu. Ta te popoe leaga o lea ua faafogaga le atunu, ua tuuai e leai se tiute, ua tuuai e sese pepa. Lau Afioga o lea e i uma faamaumauga na ou tapa i le Ofisa o le Tiute ua leva ona matou feiloi. O le tatalo lena lau Afioga i le Fofoga Fetalai, ina ia manino ina ne i tutasi le pito ua aumai e le Komiti o Tupe, e le i faia sa ta upu, e le i faia foi se upu a le na aumaia le faia, ona manino lea lau Afioga. Ma lou agaga faaaloalo.

FOFOGA FETALAI: O lenei lava mataupu sa faapena ona lava foi se taimi sa fetuunai ai...

Afioga Faumuina Asi Pauli Wayne Fong: Lau Afioga i le Fofoga Fetalai pe maua se avanoa.

FOFOGA FETALAI: Malie le sui usufono, se i alala mai i lalo, se i fai le faaaliga a le Nofoa. Sa faapena foi ona ou pai atu i le sui mamalu ina ia fetuunai lou finagalo, aua e i ai lava le taimi tatou te naunau ai i le ia, ae galo ai le masae o le upega. E i ai foi le taimi tatou te naunau ta ai, ae galo ai, e i ai lavelave mulimuli e tulai mai. E oia ai foi finagalo o nisi o sui usufono o lo o faapena ona aafia i le saunoaga. O lea lava sa tuu atu le avanoa, o lou finagalo lava lea na fai. Ma o lea la sa tuuina atu i le Komiti e pei ona tuuina mai le latou lipoti, ina ia agai tonu lava le latou suesuega i pepa sa e tuuina mai. O lea la ua aumai le latou lipoti, ia taoto maia i le Palemene, o lea foi ua faalava le amoia i lou finagalo, ia malo faafetai. A foi o le aganuu lenei e faapena., O le Palemene e faapena. A tatou o loa tatou te saili i le sao o le Tulafono, e leai la se isi i luga o le Tulafono. O le mea la lea, e talu ai o lea ua faafogaga le Palemene aemaise foi Samoa, i le lipoti a le Komiti e pei ona tolaulauina nei le Fautuaga a le Komiti e pei ona tuuina mai. Se i tuu atu la le fesili e pei ona aga masani.

Na faamaonia le Lipoti.

18 MATI 2020

Lafo mo le Tofia o le Komiti o Tulaga Aloaia ma Amio Taualoa

Susuga Hon Laauli Polataivao Leuatea: Lau Afioga i le Fofoga Fetalai, tulai lava ma le faaaloalo.

FOFOGA FETALAI: O lea la ua maea le tatou galuega ae se i tuu atu le lafo i le Afioga i le Palemia. O lea foi ua tatou toai taunuū i siui o le tatou galuega i lenei aso.

LAFO MO LE TOFIA O LE KOMITI O TULAGA ALOAIA MA AMIO TAUALOA

Susuga Hon TUILAEPA AUELUA FATIALOFA LUPESOLIAI LOLOFIETELE NEIOTI AIONO GALUMALEMANA Dr. SAILELE MALIELEGAOI: Lau Afioga i le Fofoga Fetalai, a o le i faatuina lau lafo. Oute momoli atu lau faamalo i le Komiti, ou te matua faafetaia le Komiti, o le Komiti lea tau Tupe o lo o i ai lauia uma o le Palemene lenei. O latou e silasila totoa i tupe alu ma tupe maua a le atunuū. O le mea lena e tatau lava ona oo i le Komiti lenei le lipoti.

Ma o le itu taua ia te au, ona o lenei mataupu na laga, e pei o se mataupu na fesiligia ai le amiontonu a le pulega a le Falepuipui i le tulaga o le aumaiga o se afi e faaleoleo e mu ai le falepuipui i le taimi e pe ai le eletise. O lea foi la ua faamaonia, e leai lava se tulaga na sese ai auala na faatino i le latou tauofoga sa fai. Sa sao auala o ala o mea sa faatino ai le latou galuega, aua le atinae tetele taua lenei e puipui ai le atunuū faapea foi ma le toesi i taimi e pea i le uila. Afai e i ai se maota i Samoa nei e tatau ona ola i taimi uma, o le falepuipui. Ma o lenei foi mataupu na laga, e pei e masalomia ai le tuuaia e le i uia e le latou pulega o le falepuipui le amiontonu. O lea la ua faamaonia i i, e leai sa uia ala o mea. A o le taua o le mataupu lenei, o lea o le faaiuga o le mataupu ua faamalolo ai ma se tagata faigaluega o le tiute. Ua mautinoa ua saisaitia i i, i le feuiaiga lea sa fai. Ma ina ia aloaia foi le talosaga ua aumai nei e le sui usufono o Gagaifomauga, o lea ou te faatu ai le lafo, Lau Afioga i le Fofoga Fetalai, o lea ua faataoto i le Laulau a Fono, le lipoti a le Komiti o Tupe Maua ma Tupe Totogi e tusa ai ma le lafo sa faamaonia e le Fono Aoao i le Fonotaga talu ai, faataoto i le Palemene le faamaoniga, o pepa na saunoa i ai le sui usufono mo Gagaifomauga 3, e faatatau i le mataupu e pei ona tatou faafogafoga i ai o laulauina e le Taitaifono o le Komiti o Tupe Maua ma Tupe totogi.

18 MATI 2020

Lafo mo le Tofia o le Komiti o Tulaga Aloaia ma Amio Taualoa

Lau Afioga i le Fofoga Fetalai, a silasila lelei le Maota i le lipoti a le Komiti, ua matua auiliili atoa ai le felafolafoaiga o le Taualumaga a le Fono Aoao i le aso 24 Ianuari i luga o le iloiloga auiliili o le Tala Faatatau Faaopoopo (Nu 1)2019/2020, e pei ona afua ai lenei mataupu. E pei ona faamauina i felafolafoaiga a le Palestine atoa ai ma le lipoti a lenei Komiti, o lo o faaalia manino ai le sini ma le faamoemoe autu o le lafo. O le lafo faatu e le gata i le sailia o le amiotonu o saunoaga a le sui usufono

O le lafo faatu e le gata o le sailia o le amiotonu o saunoaga a le sui usufono ae o le sailia foi o le faamaoni o pepa faataatia e le sui usufono o Gagaifomauga Nu.3 i totonu o le Laulauafono a le Palestine.

Lau Afioga i le Fofoga Fetalai ma sui usufono o le Fono Aoao Faitulafono, ua tuuina mai le fautuaga a le Komiti o Tupe Maua ma Tupe Totogi ma ou te faatu ai le lafo e faapea:-

1. Tuuina atu le Lipoti o Komiti o Tupe Maua ma Tupe Totogi o lo o auiliili mai ai ana saililiga ma fautuaga i le Komiti o Tulaga Aloaia ma Amio Taualoa e tusa ai ma Vaega 35 o Tulafono Tumau a lo tatou Palestine o Samoa.
2. Ina ia faamaonia ia le filifilia o sui usufono nei, e avea ma sui auai o Komiti o Tulaga aloaia mo Amio Taualoa. O sui auai o Komiti o Tulaga Aloaia ma Amio Taualoa e pei ona aiaia i Tulafono Tumau, e aofia ai le Taitai o le Maota, o au lea, po o so o sou sui. Taitai o le Itu Agai po o sona sui ae talu ai e le o aloaia sona sui i le Itu e agaia le Malo i le taimi nei, o le a filifilia ai isi sui usufono sinia, e avea ma sui auai ma o sui auai nei ua faatu atu.
 - i. O le Sui o le Taitai o le Malo, le Afioga i le Sui Fofoga Fetalai, Nafoitoa Talaimanu Keti. O ia foi o le Taitaifono.
 - ii. Tafua Maluelue Tafua, sui auai
 - iii. Lauofo Fonotoe Pierre Lauofo, sui auai.
 - iv. Taefu Lemi Taefu, sui auai.
 - v. Alaiasa Sepulona Moananu, sui auai.
 - vi. Aumua Isaia Lameko, sui auai.
 - vii. Tofa Foleni Galu, sui auai.

18 MATI 2020

Lafo mo le Faataatiae o Tulafono Tumau 30(2) ma le Tolopoina

O taiala o iloiloga a le Komiti o Tulaga Aloaia ma Amio Taualoa, e aofia ai:-

- i. Iloilo totoa o sailiiliga ma fautuaga a le Komiti o Tupe Maua ma Tupe Totogi po o ua aafia ma solia ai tulaga aloaia ma amio taualoa a le Palemene, e tusa ai ma aiaiga o Tulafono Tumau, 186.
- ii. Ia toe lipoti mai i le Komiti i se Fonotaga o lumanai nei a le Fono Aoao Faitulafono ma o le lafo lea lau Afioga i le Fofoga Fatalai.

Faalauaina e le Minisita o Pisinisi, Alamanuia ma Leipa, Minisita mo Tupe Maua ma le Minisita o Tupe.

Na faamaonia le lafo.

FOFOGA FETALAI: E i ai le manatu o lea foi ua taua ma le Komiti, ia e ao lava ona tuu atu... ia aua a pasia le lafo po o le faatuina mai o le Komiti, ina ia faasee atu i ai ia le tulaga lea, ua ou manatu o lena ua i ai le maliega a le Fono Aoao Faitulafono.

Ia lau Afioga i le Taitai o le Malo, sau saunoaga e faaiu ai ia le tatou...

**LAFO MO LE FAATAATIAESE O TULAFONO TUMAU 30(2) MA
LE TOLOPOINA**

**Susuga Hon TUILAEPA AUELUA FATIALOFA LUPESOLIAI
LOLOFIETELE NEIOTI AIONO GALUMALEMANA Dr.
SAILELE MALIELEGAOI:** Lau Afioga, o lea ua maea ia galuega na atofa mo le Fonousu a le atunu. Ma ou te tulai atu e momoli atu le faamalo lau Afioga i le Fofoga Fatalai i lou lavapapale. Ia faapea foi le paia maualuga i sui usufono o le Palemene. Ou te avatu le faamalo i a outou Afioga, i finagalo faaalia ao faafogafoga foi ia lo tatou atunu.

E ogaoga mataupu sa tatou lotea. O mataupu e aafia ai le soifua saogalemu o Samoa atoa i ona tulaga faalupe. O lea foi ua taoto atu i le Komiti Faapitoa ua tofia nei mo le iloiloina o le tatou Faavae. Ma o le tagofia o le Faavae, e oooo i le fatu o tu ma agaifanua faa-Samoan, e le itiiti galuega o le a faafeagai ma Komiti o le Palemene.

18 MATI 2020

Lafo mo le Faataatiae o Tulafono Tumau 30(2) ma le Tolopoina

O le a malolo le tatou Fono, ia ona sagai atu foi lea o le tatou Malo, aua le faafeagai ai ma isi foi tiute tauave aemaise faaiuga ogaoga, i le puipuiga o Samoa mai i faamai ua aafia ai le lalolagi atoa. Ma e le o ia tatou se tomai. O lo o i le Atua o le Tupu Silisili o le lagi ma le lalolagi ia faamanuiaga uma, ma e o lo o avea pea ma o tatou malu, e tatou te sulufai pea i ai mo se malu o le Malo nei.

O le tulaga foi lea e tatou te faafetaia ai pea ia o tatou Taitai Faale-agaga, aua ia le itupa o le aufaigaluega Paia a le Atua ma le latou faanonogamanu. Ia aemaise ia le aufaitatalo a Samoa latou te talosia pea i le ao ma le po, ia malu ia lo tatou atunu mai le tele o faamai o lo o faamalumalu mai, o lo o aafia ai le lalolagi atoa.

Lau Afioga i le Fofoga Fetalai, o a foi ni tulaga o fesiliai ai ia o tatou manatu, ia o aga lava ia e masani pe a oo ina feiloai tatou i le Maota nei, ia a e tetele lava i pesega a e matua lava i le oo. O le a faaiu ia le tatou Fono i lenei aso, ia e tuu atu i lo tatou Matai Sili e puipuia malutia lo outou ola, ia ae o taliu atu i aiga ma galuega.

Lau Afioga i le Fofoga Fetalai, ou te faatu le lafo, *Ina ia faataatiae o Tulafono Tumau 30(2), e toe avanoa ai le toe tauaofia o le Palemene i le masina fou, i le Aso Lua 28 Aperila 2020, e iloilo ai isi Tulafono e ao ona faamaonia, a o le i maea lenei Paeaiga.*

O lenei lafo ua faatuina ona ua maea ona tatou pasia le Kalena o Fonotaga mo le tausaga atoa aepeitai, ua i ai le Fonotaga faapitoa lea ua ou faatu atu le lafo mo le 28 Aperila i le Aso Lua, e tatou te toe feiloai ai, aemaise lenei vaitau. O le vaitau o le faamalumalu mai o mala ma puapuaga i le lalolagi, e ono manaomia ai ni isi foi faaiuga taua ua tatau e faia e Taitai o le atunu o a outou Afioga ia i totonu o le Palemene o Samoa. Soifua ma ia manuia.

Faaluaina e le Minisita mo Pisinisi, Alamanuia ma Leipa.

FOFOGA FETALAI: Malo. faafetai. Ia ua faafofoga le Palemene i le saunoaga a le Taitai o le Malo, po o le Taitai foi o le Maota, e tusa ai o a tatou galuega ua faapena ona faaiuina. O galuega uma e pei ona tuuina mai e tatou te galulue ai, ia o lea na faasili le tatou taimi galulue, ina ia mafai ona tagofia uma tatou galuega, ona e pei e le o po se lilo, tatou te taumafai ina ia tulimatagau le ufi a Sina, ina ia faapena ona faagasolo a tatou galuega, e fua i lea taimi mai lea taimi.

Ia o lea foi ua faatuina le lafo ma ua faaluaina, ina ia toe tauaofia Fonotaga i le Aso Lua, 28 Aperila 2020 i le itula e 9:00 i le taeao.

18 MATI 2020

Lafo mo le Faataatiae o Tulafono Tumau 30(2) ma le Tolopoina

Na faamaonia le lafo.

FOFOGA FETALAI: Ia malo faafetai, faafetai o lea ua saunoa le Taitai o le Maota, le Taitai foi o le Malo ia e faamalulu foi i le Paia o le Palestene. O le tatou galuega e faapena o ona ooooga ia e sua lalo, sua luga e faapena ona sailimalo. E le saili gofie le auro, ia e faapena foi le ario. E saili lava i le moana ia le penina tautele ia e faapena foi i le manava o le eleele.

Ae o le tatou aganuu lava ma lo tatou soosoo tauau, e tumau leaga o le tatou aganuu o le avafatafata ia ma le nofo fealofani e pei ona finagalo le Atua ia tatou maua le agaga o le fealofani ma le fetausiai. Ia tatou maua le agaga o le fefaamagalaoai, o a upu ma saunoaga o lenei aso, ua faapena ona tulai mai e oia finagalo o ni isi o sui usufono, ia o uiga ia o le soifuaga. E faapena ona tetele lava i le naunau i le ta, ia ae galo ai, ia le aafia ai o lou uso, i le tulaga o le tatou nonofo ai. Ui i lea, tatou o i le finagalo o le Atua, tatou maua le agaga o le fefaamagalaoai.

Ia le tapuaiga a Samoa, ia e manuia faiva o le faalagolago mea uma i lau tatalo e faapena ona faalagolago i le aufai tatalo ma le aufai lotu, o lo o latou faanonomanu i le ao, po ma le ao, ina ia tapuaia faiva o le Palestene ia aemaise foi le malutia o le soifua ma le ola o le atunu, ia ae a faamai e pei ona tulai mai i lenei vaitau, ae a mafuie ma lologa ma le fesuiaga o le siosiomaga ua o tatou i ai, ia e tasi lava ia lo tatou talita ma lo tatou lafitaga, e na o le tatou Atua Silisili ese, tatou te malu ai.

O le mea lea lau tapuaiga Samoa, malo tatalo malo tapuai. Momoli foi le faafetai i le tapuaiga a Faauluuluga o Matagaluega eseese ma Faalapotopotoga a le Malo ma latou foi fatuaiga, ia e faapena ona outou lagolago mai i le galuega a le Palestene. Ia e manuia faiva o le Palestene ona o la outou fautuaga. Ia maua lo outou finagalo maua le malosi, e faatini ai ma faatino ai ia lo tatou galuega. O le tatou galulue faatasi aua se manuia o le atunu. Ia ae tatou te le i tolopo, ou te tapa le sui usufono o Falealili Sasae, e na te faaiuina le tatou Fonotaga i se tatalo.

Na tolopo Taualumaga a le Fono Aoao Faitulafono i le itula e 2:10 i le afiafi seia aulia le itula e 9:00 i le taeao, Aso Lua, 28 Aperila 2020.